

ANTONII A LEEUWENHOEK
CONTINUATIO
ARCANORUM
NATURÆ
DETECTORUM.



LUGDUNI BATAVORUM,
Apud JOH: ARNOLD: LANGERAK,
M D C C XXII.

Digitized by the Internet Archive
in 2019 with funding from
Wellcome Library

https://archive.org/details/b30542832_0001

INDEX ARGUMENTORUM,

Quæ in Epistolis pertractantur.

EPISTOLA 93.

Quo pacto conflatum sit vitrum, in quo pulvis nitratus est accensus. Quomodo istius-modi pulveris granum in vitro collocetur, & postea accendatur. Incredibilis exiguarum particularum, ex uno pulveris nitrati grano factarum, numerus. Quantum aeris ex sphaera vitrea ab incenso pulveris grano proveniat. Inquiritur quantum spatii requirat granum pulveris incensum. Sphaera vitrea, ex qua densior aer est exclusus, obturata, & mox infracta, fragorem edit. &c.

pag. 1

EPISTOLA 94.

De ostreis inter conchas captis. Multis ovis, sive exiguis ostreis in iis, sed multo imperfectioribus iis, quorum præcedenti epistola mentio facta est; idque qua de causa. Auctor sibi imaginatur semen masculinum sibi in ostreis apparere. De exiguis animalculis rosis adherentibus, eorum forma & generatione. Ea in muscas mutantur. Eorum alæ tripliciter sunt complicatæ; vascula in iis adeo tenuia, ut vix credi possit. Quibusdam horum animalculorum cadaveribus inerant exigui vermes, qui & in muscas mutantur. De Chyli in muscæ cujusdam exigua intestinis motu. Animalculis innatæ perfectiones non dependent ab ipsis, sed jam à genere ex quo orta sunt &c.

7

EPISTOLA 95.

De pisciculis testaceis inter conchas captis, & ovario in iis. De pisciculis nondum natis in ovario repertis, eorumque motu. De magna agitatione in pisciculorum testaceorum barba. Pisciculi testacei triduo extra aquam vivebant. De ostreis sive conchis quæ in paludibus & fossis inveniuntur (Belg: Veen-Oesters of Mosselen) De magno numero animalculorum in vasis carneis ejusmodi conchæ, quæ ejus semen masculinum esse censentur. De ovario in ejusmodi conchis. Unumquodque ovum membranæ est involutum. Ova in membrana ligulis erant conjuncta. Materia in earum intestinis constat ex cæno & minutissimis arenulis. De multis minutissimis

INDEX ARGUMENTORUM.

animalculis inter partes carneas. Animalcula ex semine masculino concharum supra dictarum. Ubi multa ex his animalculis se mutuo attingerent, ita sibi mutuo adhærebant, ac si coiissent. Quomodo hæ conchæ locum mutant. De conchis innatis jam eo provectis, ut testæ possent dignosci. De loco ovarii. De vita & agitatione concharum innatarum & membranæ involutarum. Si maris littora inhabitaremus, ubi pro lubitu pisces testaceos videre liceret, major esset occasio obturandi os illis, qui adhuc pertinaciter statuunt pisces testaceos sponte oriri. De absurda quorundam sententia, statuentium conchas ex aëre decidere, aut è vaporibus marinis formari.

14.

EPISTOLA 96.

De innatis conchis ex fossis captis (Belg. Veen-Mosselen) & aquæ impositis, si forte in ea superstites manerent. De multis animalculis inter has conchas repertis. Hæc animalcula conchas ex testis suis exedunt. Rationes cur hæ conchæ non majori numero procreentur. Exigua hæc animalcula incredibili copia procreabantur in aqua, cui concha marina, testis exempta, imposita erat. Subita horum animalculorum generatio. Perpenditur num animalcula in aquis degentia se mutuo comedant, ut pisces solent. Animalculorum coitus. Aqua duos asses pondere æquans tubo vitreo indita, & quam variae animalculorum generationes in ea observatæ fuerint. Excerpta ex litteris datis ad Regiam Societatem Londinensem X. Kalendas Apriles 1677. de incredibili copia animalculorum in gutta aquæ. Ut & excerpta ex litteris datis Tertio Nonas Octobris 1677. &c.

30.

EPISTOLA 97.

Piscium fluvialium intestina multa pinguedine esse obsita, quum è contrario multi pisces marini ea plane sint destituti. Halec multa gaudet pinguedine. Vulgo ferunt nullum in halecum stomacho reperiri cibum. Quis autem cibus in iis inveniat. Halec fellis etiam vesicula prædita est. Halec cibo destituta propriis vescitur ovis. Vermiculi in halecum ventris cavitate detecti, quomodo illi eoque penetrarint. Cur haleces modo in profundo mari, modo
circa

INDEX ARGUMENTORUM.

circa loca vadosa capiantur. Gallinae oclusae, prae filicum aut calcis particularum inopia, aliquando vescuntur aciculis, quae transversim quidem per ventriculum ac musculos carneos protruduntur. Sturionem aëre tantum ac aqua vesci, ut vulgo ferunt, pro falso compertum est. Aselli majores, &c: non habent vasa adipem afferentia. De tempore insipiditatis asellorum majorum; unde illa oriatur, &c.

45

EPISTOLA 98.

Quendam scriptorem asserere pediculos esse Hermaphroditas. Sæpe sibi Auctorem persuasisse omnes pediculos continere ova. Pediculos non esse Hermaphroditas. Sequioris sexus pediculos instructos esse ovario ovis repleto; ex ovis ovario exemptis non prodiiisse pediculos. Eorum ovorum numerus accurate supputari nequit, nunc enim sexaginta videbantur, & mox quidem septuaginta. Quæ in pediculorum maribus pro ovis haberi possent, sunt testiculi, qui quatuor numero, bini juxta se sunt locati. Materia in testiculis & ovis. Membra pediculorum genitalia, & aculeus. Ubi pediculus masculinus duriuscule tractatur, aculeum suum extra corpus profert. Pediculorum fæmellæ aculeo sunt destitutæ. Pediculi pyxidulis inclusi ut ova in iis ponerent. Quomodo pediculi sint pasti & quot, quantoque tempore, posuerint ova. Pediculi alteri ex tibialibus impositi, ut in eo ova parerent, ac fœtus procrearent. Pediculus sex dierum spatio quinquaginta peperit ova. Fœtus ex iis orti. Pediculus, partis jam quinquaginta ovis, alia adhuc quinquaginta in ovario continebat. Ova octiduo indigent, antequam pediculi ex iis prodeant. Ex ovis à pediculis in pyxidula posititis etiam fœtus prodire. Membrum virile pediculi delineatum; ut & testiculi & vasa semen adferentia & deferentia. Aculeus pediculi masculini depictus, ut & aculeus quem pediculi intra caput habent, ejus tenuitas. Pediculorum ova delineata. Duum generum pediculi. Magna pediculorum multiplicatio ob oculos posita. Duæ pediculorum fæmellæ intra octo hebdomadam spatium possunt plures quam decem millia pediculorum videre ex se natos. Varii citati scriptores & quam fabulosa de pediculorum generatione omnes

INDEX ARGUMENTORUM.

illi proferant, quæ tam altas in plerorumque hominum animis egere radices, ut multo opere ex iis erui non possint. 56

EPISTOLA 99.

Putatum olim flores myristicos albos (Witte Foulie) oriri annis non frugiferis, in qua tamen opinione fuerunt decepti. Vermium tela inter flores myristicos reperta. Illi vermes in animalcula volatilia mutantur. Omnia folia involuta sunt tenuibus membranis, qua materia intermedia ab exhalatione vindicatur. Flores myristici à vermibus intra membranas suas comeduntur, & hinc albi fiunt. Ejusmodi vermis delineatus, ut & animalculum volatile ex hoc verme ortum; atque ejus alæ. Vermiculi qui nucibus myristicis nocent, non item noxii sunt floribus myristicis. Folium floris myristici delineatum, in quo & exhibetur, quo pacto albedinem suam contrahat. Nux myristica cortici suo involuta ope ligulæ alitur; hoc transfertur ad animalium in utero materno incrementum. Animalcula nuces myristicas comedentia, cortices duros, quibus eæ involutæ sunt, perforare queunt. Ligula, cujus ope nux myristica alitur, tam varia habet vasa, ac ipsa arbor. Tabulata, in quibus flores myristici servantur, undequaque sunt pingenda. Animalcula volatilia, dum flores myristici siccantur, ova sua iis imponere queunt. Acari florum myristicorum odorem non ferunt. 83

EPISTOLA 100.

De Metallo quod in media Tartaria effoditur. Ubi id liquefit, aëris prodeunt bullæ, atque etiam plumbum. De spiritu qui ignis vi ab eo metallo depellitur. De particulis salinis in eo spiritu. De metallo, quæ in insula Sumatra effoditur, & exiguis auri argentique particulis in eo. In lapidum cavitatibus aurum argentumve non invenitur. De metallo, quod ex America advehitur, & argento plurimo est imprægnatum. Argentum atque aurum jam ab initio intra lapides duros hæsit; principio rerum argentum lapidibus cessit, lapides argento. Quomodo metalla per vapores sursum elatos augeri possint. Quæ figura fuerit auro & argento magna copia terræ nigræ permixtis. Formicæ ineptæ sunt ad conficien-

INDEX ARGUMENTORUM.

ficiendam resinam, seu ceram Hispanicam, Belg: Lak, sed ex ea aluntur. Formicæ non mordent, sed aculeo pungunt, atque ad punctum aliquantum liquoris cuti ingerunt, &c. 110

EPISTOLA 101.

Professorem quendam, telluris motum tueri conatum, coactum fuisse theses suas suppressere. Quam facile intelligi queat telluris motus diurnus. Auctoris propositum est hanc ob causam nemini litem movere. Si tellus quiesceret, nubes in aëre suspensæ manere non possent, sed necessario versus tellurem deprimerentur. Sphæra vitrea adornata, cui indita aqua, cera Hispanica, ac globulus plumbeus, idque ad telluris motum exhibendum. Globulus ille plumbeus in sphæra vitrea repræsentat tellurem nostram; cera Hispanica nubes. Celer sphæræ vitreæ circumrotatio, ac dein quies.

120

EPISTOLA 102.

Excerpta ex litteris ad Auctorem datis ab Illustri Christiano Hugenio a Zuilichem, de anguillarum generatione. Nullæ detectæ anguillæ, quæ masculæ dici possent, sed omnes uteris erant instructæ. Quorundam exiguum animalculorum corpora omnia foetibus sunt imprægnata, adeo ut nullus inter ea mas inveniatur. Num autem hoc etiam ita sit in anguillis, an vero eæ sint Hermaphroditæ, id adhuc investigandum restat. Anguillæ de novo dissectæ, sed nil ulterius detectum. Sanguinis circulatio in exiguis anguillis. Multæ minutissimæ venæ sanguinem in majorem transfundunt venam. Miranda & subita reciprocatio protrusionis sanguinis, tam in cauda, quam pinnis capiti proximis. Celerrimus cordis motus, & sanguinis protrusio. Mira agitatio earum partium, quas branchias, Koonen, Nostrates vocant. Acari plane alio modo formati, quam ii quos nos videre solemus. Multi in fico acari. Recens planta ex semine fici. Risu dignum effatum, ex ficis magna copia esis oriri posse pediculos. Unicuique seminis in fico granulo binæ sunt ligulæ, quæ ejus incremento inserviunt. De membrana materiam interiorem cingente. Multa in una fico semina. Planta ex semine fragi. Exigui pili quibus muscarum pedum extremita-

INDEX ARGUMENTORUM.

tes sunt instructa, minutissimis armati sunt uncis. Cancri marini posteriorum suorum pedum extremitates instructas habent pilis, quorum singuli binos ferrarum instar habent dentes, quorum ope rupes marinas facile adscendere possunt, &c.

126

EPISTOLA 103.

De particulis rotundis, quæ, in ostreis inventæ, pro eorum ovis haberi possent, cum tamen viva sint animalcula. Hæc animalcula inter natandum aliquando quidem conjunguntur, max vero separantur. Animalcula sunt semen ostreorum masculinum; ex duplici constant genere, masculino, nempe, & feminino. Non tot in universo regno inveniuntur homines, quot ex eo genere sunt animalcula in ostreo masculino. In ingenti ostreo feminino centum myriades ostreorum innatorum esse censentur, & quidem viventium. Ostrea imperfecta ex aliis ostreis exempta, &c.

142

EPISTOLA 104.

Errare eos qui rubiginem [Belgis Honigdauw] ex aëre delabi asserunt. De magna ovorum copia in folio tilia. De duplici genere animalculorum ex iis ortorum. Hæc variae sunt molis, foetus procreant, ac mutantur in animalcula volatilia. De incredibili hujusmodi animalculorum numero in una arbore. De vermiculo in tali animalculo invento, ex quo musca nigricans prodibat, & unde is ortum duxerit. Multa exigua animalcula aliis minoribus pro cibo utuntur. De incredibili nigricantis ejus muscæ exiguitate, & ejus ovis. Muscæ illæ nigrae, quæ arboribus nocent, ex aqua oriri nequeunt. Frondium recens ortarum ariditas non fit ex ventis asperis, sed nigricantes muscæ in causa sunt. Erucæ ex illis ortæ mutantur in pupulas. Vermis qui malum perforaverat mutabatur in pupulam, atque ex illa pupula prodibat musca. Ostrea mense Augusto admodum bona erant & sapida. Rationes, cur vulgo dicant ostrea esse insipida, nisi mensis nomen ingrediatur littera R. Ostrea in fluentis nostris mediterraneis admodum mole augentur.

148

EPISTOLA

INDEX ARGUMENTORUM.

EPISTOLA 105.

De ligno querno, quo in focis uti solent, quodque Nostrates Tel-hout vocant. In media ejusmodi ligni parte septendecim erant vermiculi albi viventes. Hi frigidi parum, at calefacti aliquantulum, plus habebant motus. In ligni cortice exteriori nulla foramina dignosci poterant, cum tamen ipsum lignum adeo à vermibus esset perforatum, ut instar caulis cannabini diffringeretur. Lignum tubo viureo inclusum. Ex uno ejusmodi ligno triginta vivi vermiculi exempti. Hi vermiculi in pupulas mutantur, illæ vero in animalcula volatilia. De oculis ejusmodi animalculorum. Horum animalculorum corpora clypeolis non sunt instructa. Vulgo homines existimant, ubi in cortice ligni exteriori foramina non animadvertunt, at contra intra lignum ejusmodi foramina à vermibus excavata apparent, tum vermes intra lignum sponte sua oriri. Animalcula illa volatilia etiam subere vescuntur. Lignum quernum, quod subito crescit est firmum & solidum, nec tam facile à vermibus perforatur, ac lignum quod lente crescit. Lignum quod exteriori suo cortice manet cinctum magis vermibus est obnoxium, quam lignum cortice exutum. Ejus rationes &c. 158

EPISTOLA 106.

De Medico quodam, statuente nullo in posterum vesci asido, nec piscibus, rato se hoc pacto vitam suam protrahere posse. Acido & piscibus frui non nocet valetudini; imo è contra pisces censentur sanitati magis prodesse, quam carnes. De coagulo. Lac in vitulorum intestino, quod Lebbe vocant Belgæ, admodum dure coagulatur. Lac hoc coagulatum eidem Meet vocant. Coagulum vino, ut & aceto permixtum. Exigua in lacte particula, quæ non coagulabatur. Globuli, qui butyrum erant. Pars lactis coagulati in stomacho vituli, quæ referebat testam, quam peëtinem St. Jacobs Schelp Nostrates vocant. Lac coagulatum à puella evomitum. In agnorum subrumorum stomachis etiam coagulatur lac, sed lac bovinum citius ovino. Coagulum sanguini permixtum. Coagulum saporem habet magis amarum, quam acidum. Coagulatio in ventriculis nostris necessaria est. Particula cretæ, ut & sculi cancri aceto inditi. De fellis vesicula in vitulo, & quomodo fel

INDEX ARGUMENTORUM.

in intestina infunditur. Coagulum aliquamdiu sepositum acidum habebat odorem. Judicium Chirurgi cujusdam de aliquot in infantis ore tuberculis aqua repletis. Fellis vesicula, reperta in vitulo, omni plane felle destituta. De morbo ex tabaci suctione orta. Vir quidam ubi acetum edit rubescit, & sudor ei erumpit. De exiguo in vitulis ventriculo, ab laniis Souter dicto. Sphæra ex pilis constans in vituli stomacho reperta. Ubi excrementa vitulorum & agnorum subrumorum sunt tenuia & fluida, non invenitur lac coagulatum in vitulorum intestino, Lebbe dicto, nec in agnorum ventriculo. Si ope acidæ fiat coagulatio, acidum nobis necessarium est &c.

167

EPISTOLA 107.

Pisces in aquis limpidis & fluentibus nullis obnoxios esse morbis. Haleces ab piscatoribus nostris captas annum nondum esse natas, & ortas ex lactibus & ovis præterito anno emissis. Haleces, lactibus ovisque suis emissis, ex mari Septentrionali migrant, nec unquam in illud revertuntur. De halece supra modum magna. Haleces in sinum Hollandiæ Australem veniunt ad ova sua illic parienda. Pisces alosæ Elft dicti intrant flumina, ut lactes ac ova sua in iis emittant. De araneo marino, Belg: Pieterman, & acutis ejus circa caput pinnis. Conjectura circa magnum dolorem ad ejus punctum excitatum. De punctu scorpionum, & polyporum Indicorum. Censuerunt antehac piscium squamas quotannis novo circulo cingi, easque sic mole augeri, at in hac opinione errarunt. Quod pro circulo priorem squamam cingente habebant, est squama plane nova, priori conjuncta. Squamarum incrementum quotannis aliquo temporis spatio cessat. Piscium duodecennium singula squamæ constant ex duodecim squamulis coacervatis. Perca longior duodecim pollicibus latis, & tamen quinquennium nondum nata &c.

186

ANTONII a LEEUWENHOEK,
 Continuatio
 ARCANORUM
 NATURÆ.

Epistola 93.

Data ad Illustrissimum Virum

DOMINUM

ANTONIUM HEINSIUM,

*Illustrium & Præpotentium D. D. Or-
 dinum Hollandiæ Syndicum, &c.*

Agitur in ea

*Quo pacto conflatum sit vitrum, in quo
 pulvis nitratus est accensus. Quomodo istius-modi
 pulveris granum in vitro collocetur, & postea ac-
 cendatur. Incredibilis exiguarum particularum,*

A

ex

ex uno pulveris nitrati grano factarum, numerus. Quantum aeris ex sphaera vitrea ab incenso pulveris grano proveniat. Inquiritur quantum spatii requirat granum pulveris incensum. Sphaera vitrea, ex qua densior aer est exclusus, obturata, & mox infracta, fragorem edit. &c.

Illustri & Generoso Viro, Domino

ANTONIO HEINSIO, &c. &c.

ANTONIUS a LEEUWENHOEK. S. D.



Nte hac, Vir Illustris, ad Regiam Societatem Londinensem scripsi, quo pacto ex pulvere nitrato incenso aer producat, ut & quantum, ex accuratissima mea observatione, loci granum pulveris accensum requirat.

Quum vero tunc temporis modum agendi a me circa hanc rem institutum non indicarem, nunc animus fert eum in medium proferre.

Igitur sumsi tubum vitreum qualiscunque longitudinis, sit V: G: ut Fig. 1. LM cui afflavi sphaeram HIKM ac postea granum pulveris nitrati per aperturam L ad fundum I demitto, quando sphaerae vitreae do Fig. 2. PONQR qua fit ut granum pulveris incidat in tubum vitreum circa N.

His peractis exiguum fumo tubum, quo fabri argentarii ferruminare solent; & ne visui noxa inferatur, perspicillum naso impono, ac sic sphaerae appropinquo, ut pulveris incensi videam effectum; quando ope tubi illius ante memorati, flammam, sive can-

fig: 1.




fig: 2.




fig: 3.



fig: 4.



candelæ, sive lampadis eo deduco, ubi granum pulveris situm est, quod inde statim incenditur.

Pulveris hoc granum in sphæra vitrea incensum, magnum in ea excitat motum, tum magna celeritate per eam circumvolitando, tum aliis modis; magna vero oritur copia minutissimarum particularum, quæ pro fumo haberi possent, præter incredibilem particularum, tum vitro quietè adhærentium, numerum; imo tantus est particularum, in quas ejusmodi granum dividitur, numerus, ut concipi nequeat ab aliquo qui ejus effectum non contemplatus est.

Posthæc conflo vitrum Fig. 3. S T V W & curam gero, ut circa T aliquanto sit crassius, idque aqua repletum manu teneo ea fere obliquitate, qua hic depictum videri potest.

Porro Fig. 2. in qua granum pulveris fuit incensum, parte tubi N Q R ingero aperturæ vitri Fig. 3. W adeo ut pars obtusa R fundum T premat, quam pressionem tamdiu persequor, donec tubus vitreus circa Q infringatur; qui dum frangitur comperi aerem compressum in cavitate vitri Fig. 2. per pulverem incensum, magna vi ex Fig. 2. in Fig. 3. se effundere. Cum vero aër ex Fig. 2. in Fig. 3. migrans per aperturam W egredi nequeat, sed necessario se intra hoc vitrum circa V collocet; hinc etiam tantum aquæ ex Fig. 3. circa W effunditur, quantum aeris ex Fig. 2. in Fig. 3. infunditur.

Quum vero Fig. 3. aqua repletam ad assen libaverim, idemque repetam ubi aqua, ut supra dixi, effusa est, exacte scire tum possum quantum aeris compressi ex Fig. 2. migrarit.

Porro aliquot sphæras sumsi vitreas forma similes Fig. 2. eo solummodo discrimine, quod N Q sit tubus rectus circa Q apertus; eumque tubum ingessi aperturæ W, adeo ut orificium Q in vitro Fig. 3. fundum T non tangat, sed aliquantulum ab eo distet.

His ita peractis pari ut antea modo granum pulveris incendo, ubi mox magna celeritate aliquantulum aeris ex sphæra Fig. 2. in aquam, Fig. 3. intra S T V contentam; infunditur, itemque æqualis aquæ moles ex W migravit.

Pulvere hoc accenso, & flamma inde intra sphæram vitream Fig. 2. N O P orta majus sibi spatium quærente, atque inde etiam ex ea migrante, statim, & ut ita dicam, temporis quidem puncto, aqua iterum per orificium Q in Fig. 2. infunditur, eaque majori copia quam quis sibi forte persuadeat.

Quum vero ex pulveris incensione vitrum circa N admodum incalescat, id ab aqua intrusa facili negotio disrumpitur, & magno sæpe fragore ad pulveris inflammationem in partes dissilit; adeo ut ad has observationes instituendas necesse sit, id, si vitrum frangatur, aliquoties repetere.

Cum ante multos annos Nobilis quidem Alieni-gena me measque levidenses observationes visere dignaretur, incidit sermo in aëris pressionem, & inter alia, quo pacto aerem intra vitrum aliquod arcte premendo, illud vitrum posset magno sonitu diffringi, cujus rei multa me vidisse experimenta asserui; simulque, si densior aer ex vitro aliquo vi extrahatur, donec vitrum infringatur, tum illud etiam vitrum fragorem edere.

Hoc

Hoc vero meum assertum Viro illi fidem mereri non videbatur.

Hoc ergo ut vulgo exhiberem, concepi conflare sphæras vitreas æquales, & etiam majores Fig. 4. XYZ & quam primum ejusmodi sphæra foret conflata, eam celeri manu, licet hoc in actu aliquot digitorum cutis exterior adureretur, ita obturavi, ut ei multum materiæ subtilis inesset; quum vero densior hic, in quo respiramus, aer vitrum penetrare non possit, illud undique ab eo valde premitur, quam pressionem multi, utpote captum suum superantem, non credunt.

Hac vero aeris pressione sæpe mihi accidit, ut ejusmodi vitra quatuor minuti secundarum (ut vocant) spatio ita obturata non jacuissent, quin fragore satis magno disrumperentur, adeo ut præ fragore illo repentino & inexpectato sæpe obstupescim.

Ejusmodi sphæras vitreas, ex eo tempore, quo primum eas conflare, & earum ope aeris pressionem exhibere cœpi, per duos tresve menses variis Viris eximiis ostendi, simulque earum cum fragore edito disruptionem. Atque tum temporis addidi, si conflare possem sphæras vitreas decuplo majores præcedentibus, easque ex eadem vitri massa, & tamen adeo crassas, ut iis subtilis ille aer includi posset; tum fore ut tali vitro hic in terris, vel potius in hoc aëre, non esset locus, sed illud magna velocitate in aërem sublatum iri, eatenus, donec aeris gravitas æquaret aerem vitro inclusum, & simul ipsum vitri pondus.

Sæpius etiam , post sermonem hunc habitum , ad oculos eorum sphæram ejusmodi vitream fragorem edentem confregi.

Sed forsan , Vir Illustris , ex hisce colliges me peritum esse artis conflandi vitra in candelæ five lampadis flamma ; Tu vero scias , eam artem me non alio modo callere , quam quod , quum in encæniis nostris vir quidam eam aliis , mihiq̃ue , lucri gratia exhiberet , ego tum temporis ad ejus agendi modum attenderim , atque ex eo idem facere instituerim , adeo ut jam solummodo id noverim conflare quod mihi in negotiis meis opus est.

Vale Vir Illustris &c.

Dabam Delphis Batavorum XV. Kalendas
Septembris 1695.

Epistola

Epistola 94.

Data ad Nobilissimum Generosissimumque Virum,

DOMINUM

FRIDERICUM ADRIANUM,

Baronem Rhedæ, Dynastam in Renswoude & Emminkhuysen, Toparcham in Moerkerken &c. &c.

In qua de

Ostreis inter conchas captis. Multis ovis, sive exiguis Ostreis in iis, sed multo imperfectioribus iis, quorum præcedenti epistola mentio facta est; idque qua de causa. Auctor sibi imaginatur semen masculinum sibi in ostreis apparere. De exiguis animalculis rosis adhærentibus, earum forma & generatione. Ea in muscas mutantur. Eorum alæ tripliciter sunt complicatæ; vascula in iis adeo tenuia, ut vix credi possit. Quibusdam horum animalculorum cadaveribus inerant exigui vermes, qui & in muscas mutantur. De Chyli in muscæ cujusdam exiguæ intestinis motu. Animalculis innatæ perfectiones non dependent ab ipsis, sed jam a genere ex quo orta sunt &c.

Nobi.

Nobilissimo Domino

FRIDERICO ADRIANO,
Baroni Rhedæ &c.

ANTONIUS a LEEUWENHOEK. S.



Nimus quidem jam fuit, Vir Illustris, hoc anno observationibus, circa ostrea instituendis, supersedere; sed propositum hocce meum mutare me coegerunt, duodecim ostrea supra modum magna, nec non aliquot minora, mihi a Conchyta quodam, post missas posteriores meas ad Te litteras, allata, & ab ipso inter conchas capta.

Hæc ostrea omnia perscrutatus sum, ac in variis eorum detexi multa ova, sive ostrea nondum nata, sed multo minus adhuc perfecta iis, de quibus in præcedenti epistola egi; quantumvis enim accurate attenderem, inter perfectissima quidem ostrea innata, quæ mihi videre dabatur, vitam eorum animadvertere non potui, ex quo colligebam posteriora hæc a me observata ostrea, multo magis aquis fuisse tecta, quam ea quæ antea ex Zelandia arcessiveram, atque idcirco ea non tantum habuisse caloris, ac ea quæ in Zelandiæ littoribus in vadis reperiuntur.

Hac in parte ut mihi satisfaceret adii illum Conchy-
tam, ex quo didici, ostrea illa, quæ is mihi mi-
serat, esse capta eo loci, ubi tempore refluxus marini
aqua 10. aut 12. quidem pedes alta erat.

Præ-

Præterea ex illo didici in locis illis septis , ubi ostrea in Zelandia saginantur , aquam non esse altiorrem duobus circiter pedibus ; atque etiam illic ostrea non multa sibi invicem imponi , ne inferiora suffocarentur ; ac porro loca hæc septa ita esse fabricata , ut pro mercatorum arbitrio aqua ex illis posset educi , & alia denuo in ejus locum intromitti.

Porro tralatitia tantum opera , otio destitutus , in ostreorum semen masculinum inquisivi , idque me vidisse mihi persuasi ; sed antequam de eo aliquid dicam , in posterum (volente Deo) ulterius mihi id erit perscrutandum.

Non possum quin his addam ea , quæ circa animalcula in rosis reperta annotavi , eaque Tecum , Vir Illustris , communicem.

Circa medium Julium detexi animalcula in rosis , & præcipue quidem in ramis recens ortis , eorumque foliis. Hæc animalcula coloris erant præsini , & corporibus majoribus pedibusque longioribus instructa , ac ea animalcula quæ in Ribetibus , Cerasis & Prunis antea detexi. Multa quoque ex his animalculis aperui , ac comperi ea etiam tot animalculis esse imprægnata , ita ut de aliis dixi animalculis.

Vidi etiam horum animalculorum , quæ Rosarum dicam pediculos , foetus etiam parte corporis postica primum ex utero prodire , eaque in partu partem corporis posticam attollere ; cumque animalculum eatenus extra matris corpus erat protrusum , ut ejus oculos jam dignoscere possem , illud , aliquo adhuc capitis parte matris corpori insertum , sex suos pedes proferebat , eosque tantopere movebat , acsi currere

B

vellet ;

vellet; paulo vero post mater partem corporis posticam usque adeo inclinabat, ut foetus nondum plane natus pedes figeret in caule folii cui mater insidebat, quando mater bis corpus concutiebat, simulque ejus partem posticam attollebat, atque ad secundam quassationem foetum plane enitebatur.

Hæc animalcula nudo oculo ejusdem fere formæ videbantur, cum animalculis in Prunis viventibus; sed ubi ea microscopii ope intuerer, inter utriusque pedes, cornua, ac totum corpus satis magnum vidi discrimen.

Quum hæc animalcula etiam in muscas mutentur, eo tempore, quo alæ nondum erant perfectæ, & complicatæ jacebant, eas sæpe a corpore abscidi, ac explicare conatus sum, sed eas adeo vidi fragiles, ut id exsequi non potuerim.

Postea incidi in animalculum, cujus alæ dimidia tantum parte erant explicitæ, ac extensæ; in his mihi clare ob oculos venit eas tripliciter fuisse complicatas, ac eas plicas admiranda fuisse rotunditate. Attendens præterea ad multiplicia vasa, ex quibus res adeo tenuis necessario constaret, simulque cogitans quot articulos nervus, sive partes ossæ hujus alæ, haberet ut rigida esse posset; iterum obstupui ob sapientiam qua res adeo exigua, & ne millesimo quidem homini cognita, erat formata.

Varia etiam ex his animalculis foliis, pedibus suis, sive unguiculis, vidi affixa, & mortua, quorum corpora etiam erant inflata, & color viridis in flavum erat mutatus.

Multa ex his animalculis mortuis cepi, quorum quædam aperui, ac comperi singulis vivum inesse
ver-

vermem , ex aliis vero vermibus jam in exiguum mutatus erat muscam , quæ duplici quasi plica intra corpus ejus animalculi jacebat.

Aliquot etiam ex mortuis his animalculis , quibus vermiculi inerant , inclusi vitro subere obturato , atque indies provenientes ex iis vidi exiguas muscas , alterius plane generis , quam illæ in quas viridia hæc animalcula mutata forent ; his enim muscis , nigricantibus , breves erant alæ , partem corporis posticam aliquantulum tantum longitudine superantes , præterea pars corporis postica adeo erat acuta , ac si non alium in finem foret facta , quam ad ova sua aliorum animalculorum corporibus ingerenda.

Hæ muscæ in summitate partis corporis posticæ mortuorum horum animalculorum rotundum fecerant foramen , per quod ex eorum corporibus evaserant : quin & vitro inclusæ , non ultra triduum vitam protrahabant , ex quo colligebam alimentum iis decesse.

Ex hac mea observatione mihi iterum constat , formicas non esse in causa propter quam hæc animalcula verme imprægnarentur ; præterea cogitavi , si hæc nigræ muscæ non incidant in erucas , quæ in eo sunt ut pelliculam suam mutant , vel in viridia hæc animalcula , quæ Ribetum , Cerasorum , Prunorum ac Rosarum dixi pediculos , ut ova sua iis imponant , illud genus non posse propagari. Cum autem ejusmodi musca multa ova uni imposuit erucæ , atque ita ex illa eruca , pro uno animalculo volatili & majusculo , multæ exiguæ oriuntur muscæ , ut alibi sæpius dictum , multi id mirantur , non capientes hujus mutationis causam.

Varias ex his muscis, quarum pars corporis postica subflava erat, cum per horam tantum unam aut alteram extra mortuorum animalculorum fuissent corpora, aperui, ac animadverti, eorum corporibus jam aliquot inesse ova.

In harum muscarum dissectione apparuit mihi intestinum, in quo non sine admiratione vidi Chylum per vices, nunc huc, nunc illuc ferri, cum vero Chylus ex aliqua intestini parte versus aliam protruderetur, cito intestinum occludebatur; hæc Chyli protrusio, ac intestini, Chylo vacui, occlusio fiebat ter quaterve, tempore admodum exiguo, & præterea nullam in intestino vel minimam vidi agitationem.

Ubi hæ muscæ ex mortuis animalculis migrassent, animalculi inspexi cutem, quam tenuissimam, & parte interiori tela tectam inveni, unde mihi apparebat hos vermiculos intra animalcula jacentes & plane adultos, sese more erucarum telæ suæ involvere.

Postea aliud adhuc genus minutissimorum animalculorum mortuorum ex Cerasis cepi, quorum etiam corpora vidi vermiculis esse imprægnata, quos occlusi, vidique minutissimas ex iis prodire muscas, quarum corporum pars postica valde erat acuta, nec longior parte anteriori; hæ etiam muscæ ornatae erant binis cornibus, totum fere corpus longitudine æquantibus.

Atque ita quo magis rerum generationes indagemus, eo certius nobis constat nullas nunc novas creari.

Sæpe enim mihi in mentem venit id quod ante dixi, quod nempe ejusmodi exiguum animalculum, ut tanto citius foetus suos deponeret, partem sui corporis

poris posticam inclinaret, ut foetus adhuc in partu hærens hoc pacto pedem figere queat, quodque paulo post eandem partem concutiens attolleret, & sic foetus suos eniteretur. Unde quæso hanc perfectionem dependere dicemus, non utique ab animalculo sponte, aut ex putredine nato; sed potius affirmemus, nullam ulli rei inesse perfectionem, quam non debeat primo generis sui individuo, in rerum principio creato, & iisdem perfectionibus ornato. Sed hisce finem imponam &c.

Dabam Delphis Batavorum XV. Kalendas Septembris 1695.

B 3

Epistola

Epistola 95.

*Data ad Serenissimum***ELECTOREM PALATINUM.***Ec. Ec. Ec.*

In qua de

*Pisciculis testaceis inter conchas captis ,
& ovario in iis. De pisciculis nondum natis in
ovario repertis , eorumque motu. De magna
agitatione in pisciculorum testaceorum barba.
Pisciculi testacei triduo extra aquam vivebant.
De ostreis sive conchis quæ in paludibus & fossis
inveniuntur (Belg: Veen-Oesters of Mosselen)
De magno numero animalculorum in vasis carneis
ejusmodi conchæ , quæ ejus semen masculinum esse
censentur. De ovario in ejusmodi conchis.
Unumquodque ovum membranæ est involutum.
Ova in membrana ligulis erant conjuncta. Materia
in earum intestinis constat ex cæno & minutissimis
arenulis De multis minutissimis animalculis inter
partes carneas. Animalcula ex semine masculino
concharum supra dictarum. Ubi multa ex his ani-
malculis se mutuo attingerent , ita sibi mutuo ad-
hærebant , acsi coiissent. Quomodo hæ conchæ lo-
cum*

cum mutant. De conchis innatis jam eo provectis, ut testæ possent dignosci. De loco ovarii. De vita & agitatione concharum innatarum & membranæ involutarum. Si maris littora inhabitaremus, ubi pro lubitu pisces testaceos videre liceret, major esset occasio obturandi os illis, qui adhuc pertinaciter statuunt pisces testaceos sponte oriri. De absurda quorundam sententia, statuentium conchas ex aëre decidere, aut e vaporibus marinis formari.

Serenissimo ac Potentissimo

ELECTORI PALATINO &c.

Domino suo Clementissimo

ANTONIUS a LEEUWENHOEK. S. D.

Serenissime Elector, Domine Clementissime.



Oluptas, quam Tu, una cum Illustri tuo consortio, capere mihi visus es ex detectionum aliquot naturalium contemplatione, eo tempore quo eas domi meæ Tibi exhibere licuit; atque etiam quod postea aliquot ulteriores meas observationes Tibi, per Expertissimos Tui, ac Serenissimæ Conjugis, Medicos ac Chirurgos, communicare potuerim, animos mihi addidit, ut sequentes a me circa generationem detectas veritates Tibi mittere ausus sim, eas Tibi haud ingratas fore sperans.

Dic

Die 18. Augusti a Conchyta quodam accepi manipulum vulgarium pisciculorum testaceorum inter conchas captorum. Hi pisces testacei dum erant generum, quos aperui, & tam testas quam barbas inspexi, sed nil repperi, quod aliquo modo ovum aut exiguum piscem testaceum referret.

Ad hæc partem ipsius pisciculi aperui, ubi locum fore ovarii suspicabar, eamque tam diu & accurate inquisivi, ut eo fatigarer. Tandem incidi in partem pisciculi, ubi ne cogitabam quidem latere ovarium, atque ibi magnum detexi numerum particularum, quæ per Microscopium non multum augens videbantur albæ, sed ubi eas admovissem Microscopio magis augenti, non sine admiratione vidi omnes vivere, singulasque in medio corpore habere maculam pellucidam; ac singula animalcula inclusa esse circumferentiæ pellucidæ, non secus acsi nudo oculo appareret membrana (quam secundinas vocant) cui inclusa esset bestia quadrupes nondum nata.

Plerosque perquisivi pisciculos, ac vidi omnia illa animalcula, quæ pisculos testaceos innatos vocare licet, ejusdem esse magnitudinis; cum vero magnus horum pisciculorum numerus magnæ mihi esset voluptati, sæpe tam diu oculorum aciem in eos converti, ut speculando fatigarer; non solum enim in omnibus vidi motum, sed & passim corpora sua aliquantum in longitudinem extendebant, quo factò aliam corporis particulam aliquanto longius proferebant, in qua particula tunc rotundum apparebat orificium. His peractis pisciculi priorem recipiebant figuram, quæ erat rotunda aliquomodo longiuscula.

Quam-

Quamprimum autem pisciculi priorem hanc nacti essent figuram iterum eodem modo se movebant, nec (membranæ inclusi) locum mutabant.

Omnes hi motus duorum minuti secundorum spatio, ut opinor, peragebantur.

Porro Conchytaam jussi in posterum mihi plures pisciculos testaceos comparare, is vero, gravi tempestate prohibitus, post quatuordecim demum dies mihi aliquot attulit pisciculos, quibus omnibus dissectis, nec ullos pisciculos innatos, nec ova in iis detexi.

Licet mihi persuaderem pisciculorum testaceorum generationem hoc anno jam esse peractam, postridie tamen Kalendarum Septembris adii littus nostrum marinum, quoniam vero tum mare æstuabat, quinque tantum adeptus sum pisciculos testaceos, quos aperui, sed nullos foetus in iis detegere potui.

Postridie, tempore refluxus marini, iterum adii littus, quando in vadis multos repperi pisces testaceos, similes Fig. 1. &, ut existimabam, triennium natos; pauci aliquot alii duplo quidem erat majores, & tales erant plerique eorum quos Conchyta mihi attulerat. Ex his pisciculis quadraginta quidem dissectui, sed non detexi quod quærebam.

Dum innata hæc animalcula quærebam, sæpe mihi videre contigit particulas barbarum horum pisciculorum, in quibus tam varii erant motus, ut multi vel jurando dixissent singulos motus singulorum esse animalculorum; sed luce meridiana clarius mihi apparebat omnes hos motus ex parva tantum barbæ parte ortum habere.

Aliquot ex his pisciculis plus integro triduo in Musæo meo deposui, involutos tantum linteo madafacto, ac non sine admiratione vidi post elapsum hoc tempus, aliquos adhuc esse superstites.

Eo tempore, quo ego littus adieram, bini Piscatores, quorum quisque trahebat rete ad capiendas squillas, eousque in mare progrediebantur, ut vix brachia ex aquis eminerent; hos ego, littus legens, secutus sum, ratus eos reti per fundum tracto majores capturos pisciculos testaceos, quam ii erant quos ego habebam. Tribus vero vicibus, quibus rete evacuabant nullum vidi pisciculum testaceum, sed separatas quidem testas, quod mirabar, quoniam tantâ copiâ testæ illæ cassæ indies in littoribus nostris colliguntur, ut integræ iis naves onerentur, ex quibus combustis tum calx fit; adeo ut hinc concludere liceat, pisces testaceos, & præsertim majores, in profundo mari latere.

Cum primum pisciculos hos testaceos observarem, mihi in mentem venit, me, dum canales, sive fossæ, quæ agros nostros secant, quotannis purgarentur, vidisse genus quoddam magnorum piscium testaceorum, sive concharum ex fundo in terram evehi, quod genus Nostrates *Veen-Oesters*, aut *Veen-Mosselen* vocare didici.

Ex his piscibus testaceis, quos conchas dicam, quatuor accepi, qui tres quatuorve quidem pollices latos longitudine æquabant, & testas habebant tenuissimas.

Primam ex iis frustra aperui, ut ovarium in ea detegerem; at quandam piscis partem dissecans,
vidi

vidi in sectione ex multis tenuissimis venis albam profluere materiam, quam microscopio admovens & observans, censui omnes illas particulas, quas videbam, non aliud esse nisi minutissima animalcula viva liquori pellucidæ & aqueæ innatantia, eaque tanto numero in arenulæ spatio, ut vix aliquis id credat, nisi ipse id viderit.

Sed ubi accuratius attenderem, vidi non omnes illas exiguas particulas, quas in motu conspexeram, esse animalcula, sed & particulas aliquot rotundas & pellucas, quas pro globulis habebam sanguineis, quorum motum excitari existimabam ab contactu animalculorum eos impellentium, vel ipsum liquorem agitantium, unde ipsi globuli quietem habere non poterant.

Hi quoque globuli sanguinei mole sua animalcula longe superabant.

Ex hoc spectaculo tantæ copiæ animalculorum vivorum, ejusdem, prout mihi apparebat, molis & formæ, conclusi piscem illum testaceum, cujus anatomen institueram, generis esse masculini, atque ea animalcula esse semen ejus masculinum; ubi enim piscem ulterius examinarem, nil in eo mihi apparuit, quod vel ova, vel ovarium, vel exiguos pisciculos aliquo modo referret.

Secundum, tertiumque piscem testaceum, a me dissectum, omni ex parte primo similem vidi.

Sed cum quarti institui anatomen, in eo ovarium detexi, cumque ova microscopio paulo magis augenti admoverem, vidi unumquodque ovum esse rotundum, & paulo majus, quam antea de exiguis Ostreis dixi.

Circumferentia, five maxima ovorum pars; constabat ex substantia pellucida; quæ, ut opinor, erat membrana, repleta magna ex parte liquore fluido.

Hæc membrana adeo erat flexilis, ut ad aliorum ovorum contactum ejus latera versus interiora flecterentur, unde tunc ejusmodi ovis latera erant plana. Inter alia incidi in ovum sex aliis cinctum, unde fiebat ut medium ovum ita premeretur ab aliis, ut aliquot ejus latera redderentur plana, & illud vice versa alia ita premeret, ut & eorum latera complanarentur, adeo ut nullum ex his ovis plane esset rotundum.

Illud quod medium erat cujusque ovi, & membranæ inclusum, ex quo ipsum piscem oriturum mihi persuadebam, erat obscurum, figuræque ovalis; & in omnibus ovis ejusdem molis. Sed quantumvis accurate attenderem, vitam in pisciculis imperfectis & ovo inclusis animadvertere non potui, unde collegi hos pisciculos nondum eousque esse perfectos, ut eorum vita in iis conspici posset.

Porro vidi hos pisciculos testaceos, ovis inclusos, instructos esse tenuissimis ligulis, quæ cujusque ovi membranæ alligatæ esse videbantur.

In unoquoque ovo unam, vel duas aut tres ejusmodi animadverti ligulas; quo viso cogitavi per hæc forte ligulas pisciculos, ovis inclusos, ali.

Quum contemplerer materiam, quam ex intestinis exemeram, nil vidi nisi lutum nigrum, mixtum plurimis minutissimis arenulis, variæ molis, & inter eas quibusdam adeo exiguis, ut credibile vix sit tam minutas inveniri alicubi arenulas.

Porro

Porro in aqua , testis , sive ipso pisce testaceo , contenta , vidi admodum multa minutissima animalcula variæ formæ & molis ; ex hisce cogitavi hos forte , ut & cæteros pisces testaceos , ut plurimum ali ex exiguis animalculis , quæ incredibili copia in omnibus aquis inveniuntur , quæque ob parvitatem suam oculos nostros effugiunt : idque eo magis , quia nobis liquet , inter omnes passim pisces majores ex minoribus alimentum ac incrementum suum capere.

Hæc a me detecta me contentum reddere non potuerunt , quare non piguit plures ejusmodi conchas mihi capiendas curare.

Undecim ergo accepi ejusmodi conchas haud exiguas , quas omnes successive aperui , & inter eas quinque aut sex vidi , quas masculos esse statuebam ; in tribus vero animalcula in semine masculino vidi viventia , in aliis nullum , vel minimum , animadvertere potui motum , & in his posterioribus mihi persuasi semen masculinum nondum plane esse maturum.

Omnia quæ excogitare potui adhibui media , ut formam animalculorum semen masculinum constituentium detegerem , ac post varias vidi observationes eorum corpora aliquanto longiora esse quam lata , eaque esse instructa longa ac tenuissima cauda , quæ sextuplo quidem longior erat corpore ipso , quæque ob tenuitatem suam haud facile poterat dignosci.

Præterea mihi persuasi hæc animalcula etiam aliis , præter caudas , instructa esse organis , multa enim , cum se mutuo attingerent , tam firmiter sibi mutuo adhærebant , ac si se invicem amplexa essent , aut

coiissent, atque ita cohærentia natabant. His vero animalculis mortuis, & liquore cui innataverant exhalato, videbantur mihi corpora eorum interiora constare ex aliquot globulis, atque ita proxime accedere ad figuram animalculi ex semine quodam masculino, cujus delineationem ego Anno 1677. ad Regiam Societatem Londinensem misi, quamque Celeberrimi ejus Collegii Socii æri incidi fecerunt, ac cum aliquot ex Litteris meis excerptis, Latino Idiomate inter Acta Philosophica N^o. 141. Pag: 1040. orbi Erudito communicarunt, atque illic Fig. 2. aut 3. exhibuerunt.

Posthæc quantitatem horum minutorum animalculorum occurate definire studui, ac, quantum pote attendens, censui centum horum animalculorum myriades vulgaris arenulæ molem non æquare.

Quod ad cæteras conchas, in his incredibilem ovorum detexi numerum, adeo ut mihi persuaderem percam pedalis longitudinis non tot imprægnatam esse ovis, quot ejusmodi concha.

Die Augusti 28. iterum ejusmodi conchas mihi capi curavi, quarum multas aperui, quæ omnes aut ova aut animalcula masculina continebant. In quibusdam vero ova multo erant perfectiora quam in aliis; atque ita etiam in quibusdam multo plura mihi apparebant animalcula masculina, quam in aliis.

Unam ex conchis aperui, in qua multa ova non ulterius erant provecta, quam ut exigui tantum mihi apparerent globuli rotundi, qui nil continere videbantur præter limpidum liquorem aqueum, & inter hæc ova natantia plurima animalcula, quæ pro animalculis ex semine masculino habui.

Agricola

Agricola quidam , qui quodam tempore me præfente hujusmodi conchas capiebat , mihi dixit , eas in fossarum ripis & vadis inter frondes esse quærendas , quemadmodum & eas illic loci ab eo capi vidi : quoniam vero pro certo habebam , hosce pisces testaceos magno gelu in locis hisce vadosis superstites esse non posse , quia aqua illic ad fundum usque congelaretur , didici has conchas locum suum posse mutare.

Ut mihi hac in parte satisfaceret bis cepi sex aut octo ex his conchis , quas imposui vasi figulino , cui fundus erat planus , eique infudi aquam , in qua hæ conchæ captæ erant ; hoc vas ita in Musæo meo deposui , atque animadverti , conchas , cum eas primo omnes seorsim deposuisssem , post aliquot horas , omnes locum mutasse , & quasdam ad se invicem appropinquasse.

Porro animadverti has conchas , sive pisces testaceos , circa medium aperturæ testarum , extra testas , ad longitudinem duarum tertiarum partium testæ , exferere partem carneam , latam circiter sesquipollicem & in extremitate acutam : quum autem locum mutare vellent , hanc partem exsertam sub testa ferebant , eaque celeriter fundum premebant , quopactò non solum concha loco movebatur , sed & vidi eam hoc modo plane inverti.

Præterea observavi quam lepide excrementa ex intestini extremitate egererentur per exiguas partes.

Pridie Kalendas Septembris iterum sex aperui hujusmodi conchas , ac tum vidi multa jam ova usque adeo esse perfecta , ut jam testæ in iis dignosci possent,

possent, adeo ut jam non ova, sed conchæ nondum natæ recte dicerentur.

Inter sex has conchas duæ erant parvæ, quas unum tantum annum natas censebam, cum alias, sex, octo, aut novem quidem annos natas judicarem. In minoribus his conchis etiam vidi conchas innatas ejusdem molis ac in majoribus.

Die quinto Septembris iterum jusseram mihi tales conchas capi, cum vero mihi quinquaginta circiter afferrenter, statim duodecim ex iis aperui, inter quas duæ tantum erant, quarum foetus brevi pariendos censebam. Passim enim comperi ovarium locatum esse in partibus corporis carneis, cumque ova ad maturitatem pervenissent, ea ex utraque corporis parte demitti in illas partes, quas in ostreis barbas dicimus, quæque tunc ex innatarum concharum multitudine intumescunt.

Alias conchas jam foetus suos enixas esse censebam; eas vero, quarum ova valde adhuc erant imperfecta, mihi persuasi, non longo ante tempore se ex profundo versus loca vadosa contulisse; eæ enim conchæ, quæ me præsentem captæ erant, non multo altius latitudine palmi sub aqua latebant, idque ab ea fossæ parte, quam Sol circa meridiem directe urebat, ac consequenter conchæ illic multo majori gaudent calore, quam si in profundo jacerent.

Quod ad reliquas conchas a me apertas, in iis nil detexi nisi quod jam antea observaveram.

Cum vero mihi persuadeam multis hoc concharum genus esse ignotum, vel alios forte incessuram cupidinem observationes meas investigandi, visum fuit eas delineandas curare.

Fig.

Fig: 1.



Fig: 2.



Fig: 3.

I



Fig: 4.




Fig: 5.




Fig. 2. D E F exhibetur concha vulgaris magnitudinis.

Fig. 3. G H I K L exhibetur etiam concha ita aperta, ut omnes piscis partes alteri insint testæ.

Eadem figura in H I K designatur testa vacua, & circa M M duæ partes nervosæ dissectæ, quarum ope testæ clauduntur & aperiuntur.

Hi pisces testacei, ob testarum longitudinem, binis ejusmodi partibus nervosis sunt instructi, cum Ostreis, & Conchis marinis sit tantum una.

Fig. 3. N O P est pars piscis tenuis, & hic implicata, quæ alioquin alteram testam, nunc vacuam, quasi vestivit.

Fig. 3. Q R S exhibet alterum ex binis ovariis, in quæ demittuntur ova matura; quæque partes tunc ob ovorum copiam intumescunt, cum e contrario, ubi nulla iis insunt ova, admodum sint tenues. Hæ in ostreis barbæ dicuntur.

Fig. 3. T V alterum est corpus, quod etiam in ostreis barba dicitur, sed in eo nil notatu dignum repperi, præter mirabilem & artificiosissimam ejus formationem.

Fig. 3. W X Y est pars carnea solida, in parte exteriori rugis obsita, & ratione aliarum partium admodum firma, quam, ut dixi, concha solito longius extensam extra testas profert, quum locum mutat: dum autem quiescit, passim exiguum ejus partem extra testas exferit; cumque ea vel leviuscule tangitur, statim eam intra testas retrahit.

In eadem parte circa Y exhibetur locus ovorum, antequam in partes, quas barbam dicimus, demittuntur;

tuntur; cumque illic fit quædam incisio, ova una cum liquore quodam aqueo inde effluunt.

Eodem autem modo, quo nunc apparet piscis hic, sese haberet, si testæ nunc vacuæ inesset, si, nempe, pars nunc inferior fieret superior.

Die undecimo Septembris iterum alias aperui conchas, quæ ab die quinto in Musæo meo impositæ fuerant vasi fictili aqua impletæ, quasque quotidie conspexeram & quidem viventes. Has coram sculptore aperui, ut is, quam primum ego conchas nondum natas ex ovario exemissem, eas statim delinearet; quum enim eæ per aliquot horas extra ovarium jacuerunt, ab iis, ob mollietatem earum, aliquot effluunt partes, & sic figuram suam perdunt.

Innatas has conchas, quamprimum eas ex ovario exemeram, indidi tubo vitreo, eosque sic Microscopio opposui, ac statim magna cum admiratione ac voluptate vidi, quomodo conchæ hæ nondum natæ, ac membranis adhuc involutæ, lente circumvolutarentur, neque id per breve aliquod tempus, sed quædam per tres horas continuas in hoc suo motu perseverabant.

Hic singularum concharum innatarum, intra membranas suas, motus tanto majori mihi erat voluptati, quia eæ in omni hac agitatione, nec ad hanc, nec ad illam membranæ, cui inerant, magis accedebant partem, sed undique æque ab membrana distabant, non aliter quam si sphæram circum axem suum circumvolvi videremus.

Atque hoc pacto sæpe mutationem in innatis his conchis animadvertere erat, modo enim nobis apparebat

rebat plana ejus pars , ac tum videre licebat formam ac partes tenuissimas testæ , unde & nobis patebat quomodo testa queat augeri ; modo apparebant conchæ latera. Ac ut verbo dicam , hocce spectaculum , quo , una cum nata mea , & sculptore , per duas continuas horas fruebamur , amænitate sua omnia alia longe superabat , quamcunque enim adspiceremus concham innatam , apparebant phænomena captum nostrum longe superantia.

Fig. 4. A B C D E exhibet sex conchas innatas , membranæ suæ involutas , quas pictor in motu , in quo erant , quantum potuit accurate delineavit.

Quum autem non soleam multa de rebus , semel tantum , bisve , mihi visis , dicere , sed eas pro viribus perscrutari , die 17. Septembris iterum conchas mihi capi curavi , atque ipso hoc die , quo hæc litteras misi , aperui concham , in qua duo illa ovaria , Fig. 3. Q R S exhibita , supra modum intumuerunt. His apertis , ac conchis ex iis exemptis , magna cum voluptate vidi , plerasque conchas nondum natas jam eo pervenisse perfectionis , ut non tantum multo essent majores , sed & ut earum testæ , quarum quædam erant clausæ , aliæ aliquantum patebant , tam accurate Microscopii ope possent dignosci , ac si adultæ hujus generis conchæ nudo oculo apparerent ; hoc solummodo discrimine , quod adhuc membranis essent involutæ ; & has sæpe magna cum voluptate contemplatus sum. Vidi quoque paucas aliquot nondum adeo perfectas , sed tantum ita formatas ac motas , uti de iis dixi , quæ Fig. 4. sunt exhibitæ.

Microscopio etiam opposita habebam ostrea nondum nata, quæ ante quinque jam hebdomadas ex Ostreo exemeram; hæc, quoniam adhuc adeo erant perfecta, acsi recens ex ostreo fuissent exempta, etiam delineanda tradidi, quæ hic Fig. 5. F G H I apparent.

En Tibi, Serenissime ac Potentissime Elector, annotata a me circa generationem duum generum piscium testaceorum; unde pro certo habemus, si habitaremus littus maris, aut fluminis alicujus, ubi quovis anni tempore omnis generis pisces testaceos pro lubitu habere, & earum generationi investigandæ incumbere daretur, sic, si non omnium, saltem ple-
rorumque generationem, posse detegi, atque Orbi Erudito ob oculos poni; ac simul illos, qui summa adhuc pertinacia tueri conantur pisces testaceos, vel sponte, vel ex cœno nasci, meliora & veriora edoceri.

Non possum quin his addam excerpta quædam ex litteris, ad me datis a Viro quodam degente in loco, circa quem multæ capiuntur conchæ, & meis thesibus circa rerum generationem plane assentiente. Hic Vir, inter alia, de Conchytarum, ac vulgi, circa concharum generationem, sententia, sic scribit.

Non solum Conchyta, sed & complures alios in eo consentientes comperi, conchas ex aere delabi, atque illic ex vaporibus marinis, exhalationibus &c: produci: imo ubi quendam hujus Urbis Concionatorem, qui aliquot annis vixerat in quadam hujus insulæ parte, circa quam multæ oriuntur conchæ, perversæ, circa animalium generationem, sententiæ, convincere

concha-

conarer, is tam pertinaciter opinioni suæ, quam de concharum generatione conceperat, adhæsit, ut nullis ab ea rationibus avelli se passus fuerit, licet iis etiam tuas adjungerem observationes. &c.

Plura quidem ex his litteris adjungerem, de aliis aliquot ridiculis hujus Concionatoris thesibus, ut & Viri cujusdam Celebris, circa multorum animalium generationem ex exhalationibus, aut ex corporibus putrefactis, & quomodo conchæ ex malis pendeant *; Sed pudet me plura talia excerpere, ac dolendum mihi videtur, tot etiamnum inter nos reperiri homines, inter quos & quidam Viri Docti audiunt, quorum est veteribus sese opponere erroribus, ac veritatem amplecti, qui tam parum sapiunt.

Si enim ex exhalationibus oriantur animalia, qui fit ut post prælia, in quibus aliquando quinquaginta, aut plura, cæduntur hominum millia, qui in campo putredini relinquuntur, non etiam oriatur magnus numerus infantum, aut hominum adultorum, vel aliquid, quod vel hominem, vel equum (quum enim in prælio multi cæduntur homines, non pauci etiam cadunt equi) referat. Sed hisce finio &c.

* Quæ conchæ dicebantur, inventæ sunt partes erucarum telis involutarum, postea enim muscæ ex iis proveniebant.

Dabam Delphis Batavorum XIV.
Kalendas Octobris 1695.

Epistola 96.

*Data ad Serenissimum***ELECTOREM PALATINUM.***&c. &c. &c.*

In qua

De innatis conchis ex fossis captis (Belg :

*Veen - Mosselen) & aquæ impositis, si forte in ea
 superstites manerent. De multis animalculis inter
 has conchas repertis. Hæc animalcula conchas
 ex testis suis exedunt. Rationes cur hæ conchæ
 non majori numero procreentur. Exigua hæc ani-
 malcula incredibili copia procreabantur in aqua,
 cui concha marina, testis exempta, imposita erat.
 Subita horum animalculorum generatio. Perpen-
 ditur num animalcula in aquis degentia se mutuo
 comedant, ut pisces solent. Animalculorum coitus.
 Aqua duos asses pondere æquans tubo vitreo indita,
 & quam variæ animalculorum generationes in ea
 observatæ fuerint. Excerpta ex litteris datis ad
 Regiam Societatem Londinensem X. Kalendas
 Apriles 1677. de incredibili copia animalculorum
 in gutta aquæ. Ut & excerpta ex litteris datis
 Tertio Nonas Octobris 1677. &c.*

Sere.

Serenissimo ac Potentissimo

ELECTORI PALATINO &c.

ANTONIUS a LEEUWENHOEK. S. P. D.

Serenissime Princeps , Domine Clementissime.



Ir Illustris D^o. ad me scripsit eo die quo Dusseldorpia secessit &c.

In litteris meis datis XIV. Kal: Octob: scripsi me aperuisse concham, ex genere earum quæ ex fossis capiuntur, atque ex ea exemisse foetus jam usque adeo perfectos, ut perfectos censerem, quoniam testæ eorum videbantur perfectæ.

Harum concharum innatarum aliquot millia cepi, quas imposui vasi figulino albo, cui statim infudi aquam ex fossa haustam; ut hoc pacto mihi innotesceret, num aliquot ex iis superstites manerent ac crescerent.

Conchas has innatas & aqua tectas per aliquot continuos dies contemplatus sum, sed nullam, quod ad molem, mutationem in iis animadverti: quoniam vero, ob imbres qui deciderant, canales in Urbe nostra repleti erant aquis, quas ex agris delapsas per Urbem nostram deferri necesse erat, præter opinionem vidi magnam copiam animalculorum vivorum varii generis, & molis, inter conchas aquæ innantium; inter alia vidi vermiculos figura haud ab- similes iis vermibus, quos infantes nostri aliquando egerunt;

egerunt ; hos ego crassitie quartam circiter capilli partem æquare censui.

Dein conspexi animalcula , quæ caudis suis oblongis sibi mutuo erant juncta & contigua , quæ animalcula , ut & varia alia , nunquam mihi visa fuerant , atque horum motus contemplatio magnæ mihi erat voluptati.

Præterea vidi horum animalculorum numerum indies augeri.

Primo post 4. aut 5. dies aliquoties recentem infudi aquam conchis his nondum natis. Adeo ut primo omnem fere aquam effunderem , ac mox recentem iis affunderem , ex canalibus nostris haustam.

In hac investigatione mihi persuasi conchas innatas ab exiguis illis animalculis comedi , quia sæpius vidi multa ejusmodi animalcula intra concharum testas penetrasse , adeo ut quinquaginta quidem animalcula intra unam concham me videre putarim.

Hæc dum observarem vidi indies materiam concharum adeo imminui , ut post dilapsos 12. dies parum , aut nil fere , intra testas dignosci posset , sed eæ plane pellucidæ redderentur.

Post illud tempus etiam non animadverti animalculorum numerum tantopere augeri.

In ea vero opinione , (quod conchæ innatæ ab exiguis his animalculis , licet decem forte millia ex iis unius conchæ nondum natæ molem non æquarent , ex parte consumantur) confirmatus fui , quando postea inspexi conchas , eodem tempore , quo alias in vase figulino , in Urbe nostra cocto , aquæ imposueram , a me variis tubis vitreis inclusas ; animad-
verti

verti enim omnes conchas innatas , quas vitris incluferam , intra testas suas integras remansisse , licet eæ etiam aquæ inessent , ac multarum testæ satis essent apertæ.

Sæpe obstupui ad magnum numerum concharum hujus generis imperfectarum , quas uni conchæ inclusas vidi , non percipiens causam , cur non canales nostri , fossæ , ac paludes , plane sint repletæ hujusmodi conchis , quoniam aquæ non tanta vi deferuntur , ut hujusmodi conchæ , quantumvis exiguæ , ab iis una deferri queant ; quumque præterea ad cibum non capiantur ; unde putabam ex una ejusmodi concha aliquot millia posse oriri. Sed advertens eas ab exiguis his animalculis ita consumi , satis magna hæc mihi visa est ratio , cur hæ conchæ non majori numero inveniantur.

Post hæc aquam illam adhuc per 12. dies in eodem reliqui statu , adeo ut recentem illi non affunderem , scire cupiens num exigua animalcula adhuc majori copia progenerarentur ; at comperi ea indies imminui , adeo ut die octavo Octobris ne unum quidem , præ centenis eorum , quæ antea videram , mihi esset conspicuum : illa vero , quæ ex maximo genere supererant , tarde admodum progrediebantur , & corpus habebant valde tenue , præterea omnes innatarum concharum testæ usque adeo factæ erant pellucidæ , ut aliquot centenas partes , easque minutissimas , ex quibus compositæ erant , facile dignoscere possem , adeo ut ex hac mea observatione mihi constaret , hæc animalcula præ alimenti penuria esse extincta.

E

Ut

Ut mihi circa hanc animalculorum in aqua multiplicationem, quæ breviter tempore fiebat, ulterius satisfaceret, sumsi aliquanto plus aquæ ex fossa haustæ, quam vulgaris vini cyathus capit, eique indidi concham marinam ex testis suis exemptam, ut, si pote, viderem num animalcula ex alimento, quod ex hac concha traherent, non supra modum multiplicarentur.

Postquam jam concha 24. horis in aqua jacuisset, aliquantum ex aqua superiori sumsi, eamque microscopii ope observavi, &, non sine admiratione, magnam vidi animalculorum copiam, & post alias 24. horas vidi animalculorum in aqua numerum valde esse auctum.

Aliquantulum ex hac aqua indidi tubo vitreo, cujus diameter decimam quintam circiter pollicis æquabat partem, quique ad pollicis lati altitudinem aqua erat repletus.

Huic aquæ innatantia vidi pauca aliquot animalcula, quorum aliquot millia simul sumpta arenæ molem non æquabant. Hæc animalcula lepide admodum erant formata, rotunda enim corporum eorum circumferentia constare vibebatur ex decem aut duodecim exiguis ac pellucidis globulis, mediam cingentibus maculam obscuram, singulis globulis paulo majorem.

Hæc animalcula in progressu suo (qui lentus erat) passim in gyrum circumvolvebantur.

Quum hæc animalcula brevi tempore in tubo illo vitreo fuissent, exiguum vidi ac tenuem particulam, haud absimilem venæ ramo, in septem, octove ramulos minores diviso, quorum singuli centuplo
qui-

quidem tenuiores erant capillo; & simul vidi singulis ejus rami extremitatibus adhærentia animalcula, in quibus nullam primo animadverti motum, sed post dilapsum circiter minutum vidi aliquot animalcula sese huc illuc motitantia, unde singuli ramuli variis modis flectebantur.

Hæc agitatio sensim augebatur, donec tandem unum ex animalculis per eam ab ramulo avelleretur, ac natando ab eo recederet, atque ita etiam cæteris fiebat; adeoque hic venæ ramus ab omnibus conspicuis animalculis liberabatur.

Ex hoc spectaculo mihi persuasi ejusmodi animalcula singulis his ramulis ova sive foetus suos imposuisse, atque eos illic sensim crevisse, atque perfectos esse.

Porro hic venæ ramulus passim obfitus erat materia pellucida, quam ex globulis constare censebam.

His visis cogitavi omnes has forte partes rotundas, quæ mihi apparebant, esse ova sive foetus eorum animalculorum, & ex illis forte partibus ejusmodi etiam nascitura animalcula.

Post dilapsas denuo 24. horas & ramulum hunc iterum observavi, ac vidi tunc de novo aliquot animalcula adulta illi adhærentia, ac multa ex illis animalculis circa illum natitantia, atque partes illas rotundas, quas pridie videram, multum esse imminutas.

Medio circiter pollicis spatium ab hoc ramulo aquæ innatabat exigua fibra, cui etiam animalcula adhærebant, quæ, ut opinor, ex partibus rotundis, huic fibræ adhærentibus, nata erant.

Hæc animalcula post biduum adeo numero aucta erant, ut jam quinquaginta quidem apparerent, ubi antea unum tantum videram.

Nos igitur certi quum simus 24. horarum spatio animalcula prodire plane adulta, eaque, prout ego mihi persuasi, ex exiguis particulis rotundis esse orta, non est quod miremur magnum animalculorum numerum, quæ paucis diebus in aquis generari advertimus, modo alimentum non desit. Et quid si hæc animalculorum aquatiliū genera se mutuo comedant, & alimento utantur, prout in majoribus piscibus contingere cernimus? imo si hoc non ita se haberet, aquæ his animalculis plane implerentur.

Postridie iterum animalcula inspexi, ac magnam cum admiratione vidi multa eorum coiisse, atque etiam aliquot in conspectu meo coeuntia, quæ sub coitus initio tremulum habebant motum, & postquam coiissent una natabant, vel etiam in quiete vitro adhærebant.

Tunc quoque vidi singulorum animalculorum corpora esse rotunda, quocunque enim modo natando circumvolverentur, semper eandem servabant figuram, quæ referebat exiguum rotundum racemum, cujus uvæ arcte sibi mutuo cohærent, & cum animalcula natando progrederentur singulæ illæ uvæ (ut ita vocem globulos ex quibus animalcula constabant) movebantur.

Posteriores hanc observationem sub vespere institueram, ac sequenti mane multa animalcula vidi mortua, vesperi vero usque adeo erant imminuta, ut quatuor tantum viva apparerent. Unde etiam

con-

concludebam alimenti penuriam esse causam mortis horum animalculorum.

Post sequentem noctem unum tantum apparebat animalculum, & mortuorum animalculorum corpora in aqua usque adeo erant dissoluta, ut nil nisi exiguas, &, meo judicio, rotundas viderem particulas, quæ aquam, cui hæc animalcula innataverant, turbidam reddebant.

Tertia post præcedentes observationes die denuo contemplatus sum aquam, quæ tubo vitreo inerat, actum vidi magnam copiam minutissimorum pisciculorum, sive animalculorum, quæ anguillas dicere licet, quod, dum natarent, corpora sua anguillarum in morem inflecterent, idque celeritate incredibili.

Hi pisciculi non longe a se invicem recedebant, sed juxta tubi rotunditatem magno numero sibi invicem prope adjacebant; horum longitudo, ut opinabar, circiter æqualis erat axi unius globuli, ex iis, qui sanguinem rubrum reddunt. Hi per septiduum circiter manebant superstites, & postea subinde tantum unum aut alterum dignoscere poteram.

Inter hæc animalcula, sive pisciculos, natitantia etiam vidi pauca aliquot animalcula minora, quorum octo non majora censebam globulo ejusmodi sanguineo. Et jam illam partem, quam antea venæ ramulo comparavi, dignoscere amplius non poteram, quotiescunque in eam inquirerem.

Postrema hæc animalcula post biduum triduumve adeo numero erant aucta, ut vix credibile sit; atque tum dimidia aquæ pars jam exhalata erat.

Omnis aqua, quam tubo vitreo indidisse me dixi, ac in qua tot minutissimorum animalculorum generationes vidi, non majori erat copia, quam ut eam post accuratum examen, octavam circiter pisi partem æquare censerem; nec eo contentus judicio, talem aquæ quantitatem libravi, eamque duos asses æquare comperi, simul etiam aliquot libravi pisa, quæ vulgo octo asses æquare vidi.

Ope microscopii, quo in prioribus observationibus usus eram, mihi in aqua, quam etiam ex aqua, cui concha inerat, hauseram, magna adhuc vivorum animalculorum copia superesse videbatur: ut hujus rei certior redderer, usus sum microscopio magis augente, alioque instrumento, ac tum tantum vidi minutissimorum animalculorum numerum, ut vix credibile cuicumque sit, & hæc adeo erant exigua, ut aliquot centena eorum simul sumpta crassum arenæ granum mole non æquarent; sed omnia hæc animalcula, tubo vitreo indita, non diu supererant.

Porro comperi animalcula in aqua, cui concha inerat, septem octove dierum spatio usque adeo esse multiplicata, ut, prout opinor, dicere liceat centum quidem myriadum vicibus auctum esse numerum animalculorum, quæ aquæ inerant, antequam concham ei indidissem.

Ad hanc animalculorum tantillo tempore in aqua multiplicationem non semel obstupui, idque eo magis quod varia viderim animalculorum genera, quæ multiplicabantur; nec ullum in aliquo genere detexerim aliis ejusdem generis paulo minus, sed omnia mole erant æqualia.

Sed

Sed jam videns quæ antea dixi , nempe esse animalcula , quæ non natare incipiunt , quin simul plane sint adulta , ac paulo post ad coitum apta , ac præterea una nocte perfectum prodire posse animalculum ; hæcce , inquam , videns solutus sum magna cum voluptate curis quæ me aliquot annis (ob non detectam eorum propagationem ac generationem) detinuerant.

Quum primum Anno 1675. minutissima ac multiplicia in aquis detexissem animalcula , ac ejus rei Regiæ Societatis Londinensis membra per epistolas certiores reddidissem , hæc meæ detectiones , nec apud Anglos , nec apud Gallos fidem ullam mereri visæ sunt , ac eodem etiamnum loco eas aqud Germanos haberi didici.

Ut Tibi , Serenissime Elector , ulterius satisfacere circa magnum animalculorum , quæ aquis insunt numerum , visum fuit his adjungere excerpta quædam ex detectionibus meis , quas Anno 1677. ad Regiam Societatem misi , atque illic lingua Anglica sunt impressæ , hæc ita se habent.

Doctissimo Viro

D^o. HENRICO OLDENBURGIO ,

Regiæ Societati a Secretis

ANTONIUS a LEEUWENHOEK. S.

G Ratissimas mihi , Vir Doctissime , litteras tuas , datas 12. & 22. die superioris mensis , in tempore accepi.

Haud

Haud exiguo perfusus fui gaudio, videns D^o. Boilium ac Grenium mei memores; eos meo nomine ut salutes perquam velim. Gratissimum quoque visu mihi fuit, Acutissimis Philosophis haud displicere meas observationes circa viva in aquis &c: animalcula; sed simul Eos non capere tantum eorum in una gutta numerum.

Non mirum hoc mihi est, utpote conscio quam difficulter id, nisi a testibus oculatis, queat concipi.

Nunquam autem pro certo statui tot aquæ inesse animalcula, sed passim dixi me imaginari mihi tot apparere.

Aquæ vero divisionem, ac animalculorum supputationem, hoc pacto instituere soleo. Imaginatione mihi repræsentō guttam aquæ, pīso æqualem; postea exiguam capio aquæ copiam, quam ad rotundam redigo figuram, ejusdem fere molis cum granulo milii, postremam hanc molem aquæ centesimam circiter ejusmodi guttæ partem æquare mihi imaginor; statuo enim si axis ejusmodi granuli sit 1. tum axem vulgaris pīsi esse quidem $4\frac{1}{2}$. Quod si ita sit, tum ea aquæ moles, quæ ejusmodi granum æquat, juxta vulgares leges metricas circiter est $\frac{1}{10}$ pars guttæ aquæ. Ut V: G:

$$\begin{array}{r}
 45 \\
 45 \\
 \hline
 225 \\
 180 \\
 \hline
 2025 \\
 45 \\
 \hline
 10125 \\
 8100 \\
 \hline
 91125
 \end{array}$$

Atque

Atque ita paulo plura 91. ejusmodi granulis æquant molem vulgaris pifi.

Hanc granuli molem aqueam juste indo tubo vitreo (tum temporis quando animalcula alicui curioso sum exhibiturus) hunc tubulum vitreum iterum in 30. aut 40. pluresve divido partes, atque ita eum microscopio oppono ope duorum pessulorum, sive æreorum, sive argenteorum, a me eum in finem confectorum, ut tubulum vitreum eo pacto microscopio obvertam, quo res exigit, atque etiam vel attollam vel demittam pro arbitrio.

Viro cuidam Doctissimo hac ratione animalcula exhibui, qui aquæ $\frac{1}{3}$ circiter partem, supra memorati granuli, æquanti plus mille vivis animalculis inesse censuit, atque id spectaculum magna cum admiratione vidit; idque eo magis, quum ex me disceret eidem aquæ duo aut tria inesse animalculorum minorum genera, oculorum ejus aciem effugientia, quæque ego ope aliorum Microscopiorum, aliaque methodo, quam mihi soli servo, vidi.

Si jam verum esset illi Viro 1000. animalcula in $\frac{1}{3}$ parte granuli esse visa, tum aquæ unum granulum mole æquanti 30000. inessent animalculorum, ac consequenter uni guttæ aqueæ 2730000.

Alio modo mihi repræsentato molem aqueam arenulæ æqualem, atque in ea videre me mihi persuadeo plus mille animalculis vivis. Arenulæ vero proportionem ad guttam aqueam hoc pacto mihi imaginor; si, nempe, axis grani arenæ sit 1. tum axem guttæ aqueæ esse plus 10. atque guttam aqueam consequenter millies esse majorem arenula, ac plura 1000000.

F

vivorum

vivorum animalculorum inesse guttæ aqueæ; atque hunc in modum, incertam hanc, ac imaginariam animalculorum in aqua instituo numerationem. Sed quantum possum mihi caveo ne numerum augere videar, quemadmodum in superiori epistola mea videri post me numerum dimidio quidem minorem definire, quam alii &c.

Ut Celeberrimis Philosophis magis satisfaciat, iisque certius in posterum constet veritas multiplicium eorum animalculorum in exigua aquæ mole, statui, ubi mihi iterum tot animalcula in aqua obvenerint, eam rem fide dignorum testium testimoniis confirmandam, atque ita ad Te mittendam curare &c.

Dabam Delphis Hollandorum X.
Kalendas Apriles 1677.

*Sequuntur excerpta ex Epistola post obitum
D^o. OLDENBURGII data ad D^o. GUIL-
JELMUM BROUNKERUM.*

Doctissime Domine.

Litteras tuas &c:

Promisi quoque, si posthæc iterum tantus mihi animalculorum vivorum numerus in aqua obveniret, me, ut Doctissimis Philosophis satisfacerem, fide dignorum testimonia transmissurum, quibus promissis ut starem, nunc Tibi mitto testimonia octo Doctissimorum Virorum, quorum quidam testantur se

10000.

10000. alii 30000. imo & alii 45000. animalculorum in mole aquea granulum æquante vidisse.

Passim Viris testimonium daturis commendavi ut dimidium tantum dicerent numeri animalculorum quæ se videre censebant, ratus numerum animalculorum in tam exigua aquæ copia tamen fore tantum, ut apud multos forte non mereatur fidem. Quum in Epistola data VII. Idus Octobris 1676. statuerem guttæ aquæ piperi infusæ plura 100000. vivorum animalculorum inesse, non veritatis terminos excessissem, si tunc eum numerum octies dixissem majorem; Vale Vir Doctissime &c.

Dabam Delphis Tertio Nonas
Octobris 1677.

Porro antehac sæpius dixi de generatione minutissimorum animalculorum in aqua duos tantum asses (quos Belgice *azen* dicimus) pondere æquante, ac tubo vitreo infusa. Hunc tubum aqua repletum per aliquot dies sepositum non videram, verum ubi sub initium Novembris mihi iterum in manus incideret, vidi magnam adhuc animalculorum in eo viventium copiam; cumque antea aqua satis fuisset limpida, jam particulæ plurimæ ita in ea coagulaverant, ut membranam referrent. Hanc iterum ad quintum Novembris observavi, quando multa adhuc animalcula vidi viventia. Sed plurima vitro adhærentia ac mortua esse censui; at 8. Novembris die non nisi

post accuratissimum intuitum pauca aliquot viventia vidi animalcula.

En Tibi, Serenissime Elector, observationes meas juxta temporis seriem chartæ mandatas, ex quibus liquet, quam pauca nobis nota sint, præ magnarum copia, quæ oculis, microscopio non armatis, in Naturæ sinu latent abscondita &c.

Dabam Delphis Batavorum V. Idus
Novembris 1695.

Epistola

Epistola 97.

Data ad Illustrissimum, Generosissimumque Virum,

**D^o. HENRICUM BLEIS-
VICIUM. J. U. D.**

Urbis Delfensis Consulem &c.

In qua

Piscium fluvialium intestina multa pinguedine esse obsita, quum e contrario multi pisces marini ea plane sint destituti. Halec multa gaudet pinguedine. Vulgo ferunt nullum in halecum stomacho repperiri cibum. Quis autem cibus in iis inveniatur. Halec fellis etiam vesicula prædita est. Halec cibo destituta propriis vescitur ovis. Vermiculi in halecum ventris cavitate detecti, quomodo illi eousque penetrarint. Cur haleces modo in profundo mari, modo circa loca vadosa capiantur. Gallinæ occlusæ, præ silicum aut calcis particularum inopia, aliquando vescuntur aciculis, quæ transversim quidem per ventriculum ac musculos car-

*neos protruduntur. Sturionem aere tantum ac aqua
vesci, ut vulgo ferunt, pro falso compertum est.
Aselli majores, &c: non habent vasa adipem
afferentia. De tempore insipiditatis asellorum
majorum; unde illa oriatur. &c.*

Illustri Viro,

D^o. HENRICO BLEISVICIO &c.

ANTONIUS a LEEUWENHOEK. S. D.



Uum sæpius attendissem ad pinguedinem, qua piscium fluvialium, quibus satis magna alimenti suppetit abundantia, intestina aflatim obsita sunt, ac e contrario vidissem plurimos pisces marinos, V: G: Asellos majores, minoresque ac molles, Rhombos, Passeres &c: quantumvis crassos ac pingues, nunquam intestina sua habere ista pinguedine obsita; at interim Halecum intestina, non modo multa gaudere obesitate, sed & totum corpus ea adeo esse impletum, ut aliquando, dum discinditur, pinguedo ex cultro defluat, & præsertim eo quidem tempore ubi halecum lactes aut ova crescere primum incipiunt, unde Nostrates eos *Maatgens-Haringen* dicere solent.

Ad hæc, inquam, cum sæpius attendissem, incessit me cupido sciendi quo alimenti genere haleces vesci solerent, atque eum in finem varios homines, qui haleces capere consueverant, rogavi quem cibum in halecum stomachis, ubi caperentur, invenire soleant

soleant, sed passim illud responsum tuli, se nunquam ullum in halecum stomacho aut intestinis repperisse cibum. Tandem vero incidi in mercatorem, qui naves ad halecum capturam instruere solet, ex quo didici in quodam tractu maris ad Scotiæ littora capi haleces, quarum ventriculi pisciculis quibusdam sunt onerati, sed has haleces non diu posse servari.

Hisce non contentus statui observare tempus, quo in Urbem nostram advehi solent quædam haleces, quas haud longe ab Amstelodamo in sinu, (vulgo dicto de *Zuyder-Zee*) magna copia capi mihi relatum est.

Quum hæ haleces circa medium Martium in corbibus in Urbem nostram venales adveherentur, sex ex iis sumsi, earumque instituens anatomen, vidi in una ex illis materiæ, quam ex stomacho eximebam, tres inesse vermiculos vivos, omnesque eodem modo formatos, atque capillo paullo crassiores; sed in parte, quatuor circiter pilos latos a capite distante, corpus, hac parte rotundum, quadruplo quidem crassius erat. Duorum, ex his animalculis, capita Chylo, sive materia ex stomacho exempta, tecta erant, sed tertii caput aëri erat expositum; & posterius hoc animalculum ore suo, quod per vices aperiebat atque claudebat, aliquantulum aëris attrahebat, qui aer in figuram sphæricam compositus protrudebatur ad crassam illam ac rotundam corporis partem.

Vix exigua hæc aëris sphæricula intraverat crassam illam corporis partem, quam ventrem ego dixerim,
quin

quin animalculum in ea parte rotundum aperiret meatum, per quem aërem foras retruderet

Hæc aëris, cujus globuli alter altero decuplo erant majores, attractio & expulsio tamdiu durabat, donec spectando defatigarer, atque ab eo desisterem.

Hæc halec ad minimum 24. quidem horis mortua fuerat, antequam eam observarem, & forte hæc animalcula fuissent diu supervictura, si in Chylo & intra stomachum mansissent.

Porro in illis animalculis spectavi venam, serpentis in modum inflexam, atque nigricantem, ac juxta animalculi longitudinem tendentem; juxta hanc autem venam exiguas particulas rotundas magna celeritate hac & illac protrudi, quod haud injucundum mihi præbebat spectaculum.

Alia halec nil fere præter materiam quandam rubram in stomacho habebat, quam microscopii ope visam censui particulas fuisse rotundas, quæ per stomachi concoctionem pene erant contritæ; vidi enim eas ex multis constare vasculis, & talis quoque erat Chylus albus, quem etiam ex omnium halecum ventriculis exemi.

Hæcce mihi videnti non mirum visum fuit pisces putare haleces nullum in stomacho habere cibum, quia haleces exiguis illis pisciculis vesci solent, quos, ut opinor, non tantâ copiâ capere possunt, ut eorum stomachus extendatur, quod in aliis piscibus fieri videmus, atque hinc dicunt haleces nullum in stomacho habere cibum.

Videntes jam tantillum cibi in halecum ventriculis inveniri, easque tamen adeo esse pingues eo tempore, quo,

quo, ut supra dixi, earum lactes aut ova admodum adhuc sunt exigua, statuere oportet haleces assidue alimento uti esse solitas, eoque ex tam exiguis constante pisciculis, qui piscatorum oculos effugiunt; quum alii pisces ventriculos ita quidem minoribus pisciculis soleant onerare, ut ii inde adeo extendantur, ut quintam quidem sextamve totius piscis partem constituent; atque hinc fit, ut hi pisciculi aliquando per aliquot dies in illorum piscium ventriculis permaneant, antequam eorum ossa ita concoctione terantur, ut ad intestina demitti queant.

Quum jam videamus haleces tantillum cibi in stomacho & intestinis habere, ac tamen admodum pingues eas fieri, quod, ut opinor, ex alimentorum fit abundantia; concludere oportet, plura in mari esse exigua animalcula, sive pisciculos, quam unquam quis cogitaverit. Atque hinc mirandum non est haleces modo in hac, modo in illa maris plaga, nunc in locis vadosis, nunc in alto mari capi, prout pisciculi, quibus vesci consueverunt, in hac illave plaga degant; adeo ut locus hic mihi videatur illi dicto; ad escam congregantur aquilæ.

Cum autem pridie Kalendas Martias iterum ejusmodi haleces in Urbem nostram venales adveherentur, denuo varias ex iis aperui, ac vidi earum jecur æque magnum esse, ratione molis habita, ac in aliis piscibus, atque illud etiam fellis vesicula esse instructum.

Hæ haleces jam eousque pervenerant, ut multæ jam ovis lactibusque essent destitutæ. In chyli autem, tam ex ventriculo quam intestinis exempti,
G
inve-

investigatione nullam animadvertere potui mutationem, nisi quod in quarundam ventriculis ac intestinis detexerim particulas rotundas, quas pro piscium ovis habebam, idque eo magis, ubi, membrana admodum tenaci, cui rotundæ hæ particulæ involutæ erant, disrupta, viderem materiam interiorem esse fluidam, majoribus minoribusque globulis mixtam.

Porro varios ex his globulis sumsi, quos quantum potui a Chylo separavi, atque aliquot grana, quæ ex halecum ovis ceperam, juxta eos posui, & tunc plane mihi compertum fuit globulos ex stomacho & intestinis exemptos esse ova halecum; unde concluderam haleces, quæ circa hoc tempus in sinu Hollandiæ Australi (*de Zuyder-Zee*) aliquando tantâ copîâ capiuntur, ut vix consumi queant, præ alimenti penuria propriis ovis vesci solitas.

Dein ex cavitate ventris duarum halecum extraxi vermiculum album, pilum equinum crassitie circiter æquantem, cujus corporis pars anterior & posterior, & præcipue quidem circa caudam admodum tenuis erat & acuta; cujusmodi vermiculos in variorum piscium stomachis intestinisque detexi.

Hos vermiculos per stomachum aut intestina penetrasse mihi persuasi, atque ita in ventris cavitatem devenisse, idque quia corpora eorum valde erant dura.

Hæc vermiculi per intestina in cavitatem ventris penetratio multis quidem mira videbitur, non capientibus quomodo vulnus a vermiculo intestino inferri queat, & tamen Chylus ex eo vulnere non effluat in cavitatem ventris.

Sed

Sed cogitare oportet hanc capitis ejus vermiculi, utpote valde acuti, per intestina penetrationem levicula, aut nulla plane læsione peragi, quia caput corpusve non nimium scindunt; atque ita vascula in hac penetratione tantum dilatantur, ac statim post penetrationem iterum occluduntur.

Hanc meam ratiocinationem quum Domino cuidam proponerem, is mihi narravit se domi suæ in area habere cortem gallinis refertam, quas ovorum gratia alit; atque ancillas suas solitas esse arenas sordesque, quas ex cœnaculis everrunt, in gallinarum cortem projicere, ne aciculis quidem, quæ inter sordes forte latent, ex iis exquisitis.

Quum autem gallinæ semper corti sint inclusæ, & illæ non inveniant exiguos filices aut lapillos, quibus vesci solent, aciculas illas deglutiunt. Has gallinas vulgo sub hyemem occidunt. Dominus autem ille, & simul tota ejus familia, ne exceptis quidem famulis atque ancillis, viderunt in harum gallinarum dissectione varias aciculas in earum carne pectorali hærentes, ac simul compertus est aciculam ex corporis cavitate per os pectoris transiisse; alia præterea acicula, in imo pectore, cuspidē suo versus inferiora plane extra cutem propendebat, adeo ut sola ejus superior pars inter cutem & carnem hæreret.

Duæ etiam aciculæ in media ventriculi carne hærebant, quæ per ventriculi membranam (intra quam plures adhuc aciculæ cibo jacebant permixtæ, quæ, ut vero simile, etiam, si gallina superstes mansisset, hac illacve sibi exitum quæsituræ fuissent) penetraverant.

Quod si ita se habeat, non est quod miremur vermiculum, non solum ad ventris cavitatem, sed & ad alias corporis partes posse penetrare.

Die 14. Aprilis iterum haleces venales advehebantur, quando vidi multa inter haleces sparsa jacere ova, unde pro certo habebam tunc temporis pleraque haleces ova sua emittere.

Denuo varias sumsi haleces, atque ex earum intestinis censui eas diutius extra aquas fuisse, quam ex haleces quas antea observaveram; atque unum adhuc animalculum ex intestino exemptum vivens vidi.

Porro ex intestino haud ita procul ab exitu exemi varia ovorum halecum granula, idque ex halece masculina, quæ femine suo masculino plane adhuc erat instructa.

Hinc mihi iterum liquit corticem, sive membranam, horum ovorum adeo esse tenacem, ut nec in stomacho, nec in intestinis queat conteri.

Præterea multas in hoc intestino repperi partes, quæ ab re sensitiva non erant ortæ, & inter eas particulam junci, similive plantæ, cavam, in qua apertissime dignoscere poteram poros, sive tubulos, ex quibus erat composita, & præterea minutissimas particulas planas, ex tubulis etiam conjunctis constantes. Adhæc inveni varias particulas tenues oblongas, quarum formatio accurate dignosci non poterat, quia lux eas penetrare non poterat; inter alia etiam vidi cochleæ concham arenam non majorem, cujus circumferentia rotunda in octo partes sive articulos erat divisa. Octo hi articuli sesqui diametrum constituebant; hæc vero cochlea adeo erat tenuis, ut,
ubi

ubi humor ex ea exhalatus esset , nitidam suam figuram, quam antea habuerat , plane amitteret.

Atque ita mihi conspicuum fuit , haleces non tantum vesci exiguis pisciculis , atque etiam propriis ovis , sed & quodcunque obvium , urgente necessitate , versus stomachum demittere.

Sæpe etiam fando accepi pisces , quos sturiones (*Steur*) vocant non nisi aqua & aëre vesci , cui fabulæ nullam unquam adhibere potui fidem. Statui ergo primum sturionem (qui raro apud nos veneunt) emere , ut , si fieri posset , viderem quo uteretur cibi genere. Quum autem jam exeunte æstate sturio vivus ad nos venalis adferretur , eum emi , hunc tantum in finem ut viderem quid ejus stomachus contineret , atque vidi multas ei inesse particulas squillarum ; nec lubuit ulterius in id inquirere , quoniam jam satis certus eram (ut & antea semper pro certo habui) omnia animalia , ut mole accrescant , necesse habere alimentis uti , atque nec aquæ nec aeri tantum inesseimenti , quantum ad incrementum corporum talium , qualia sunt ea halecum aut sturionum , requiritur.

Quum jam videamus exiguos pisces , & præcipue quidem haleces , quæ tantillum singulis vicibus cibi capiunt , ut vulgo existiment , quia earum ventriculi præ cibo non intumuerunt , quod in aliis piscibus videre solent , eas nullo plane vesci cibo , adeo fieri pingues ; ac e contrario asellos majores , aliosque pisces , qui aliquando uno eodemque tempore sex quidem pisces testaceos in ventriculis habent , nullas tamen pinguedinis particulas , nec inter partes carneas ,

nec intestinis (excepto hepate) adhærentes habere; quid quæso, (salvo meliori iudicio) aliud ex his concludi potest? quam huiusmodi pisces destitutos esse venis, sive vasis pinguedinem ferentibus, quam ex cibis contritis ex stomacho aut intestinis recipiant, & multo minus vasa pingua esse inter partes carneas.

Quoniam autem aselli maiores minoresque &c: destituti sunt vasis, quæ aliquas pingues particulas transferre queant, & tamen magnam semper alimentorum copiam acquirere possunt, tantum alimenti ad partes carneas transit, ut hinc tam duri fiant & sicci (eo nempe tempore quo eorum ova & lactes primum augeri incipiunt, quod æstate fit) ut plane palato reddantur insipidi, atque tum intempestivi dicantur, cum melius tum forte diceretur eos nimis esse pastos, sive nimio usos alimento; quum enim illi pisces in eo sunt statu, ut eorum lactes & ova usque adeo accreverint, ut intra paucas dierum hebdomadas emitte debeant, tum tantum alimenti ad lactes & ova transit, ut duritas partium carnearum imminuatur, atque sic illi pisces iterum palato sapiant, ac tum tempestivi dicantur. Cum vero ova sua lactesque emittunt, tantum alimenti ad ova & lactes requiritur, ut partes carneæ eo destituantur, atque tum pisces e contrario redduntur molles, atque ex eo insipidi.

Quemadmodum autem maiores hi pisces ex minoribus aluntur & incrementa capiunt, sic sæpe cogitavi an non forte exigui pisciculi, quales sunt aselli &c: recens ex ovis exclusi, pro primo utantur alimento minutissimis illis pisciculis, qui incredibili
copia

copia in omnibus aquis inveniuntur, & quidem adeo exigui, ut aliquot centenæ eorum myriades arenæ molem æquare vix queant. Cum enim attendimus ad minutissimos pisciculos, aliquot tantum dies aut hebdomadas natos, ortosque ex ovis percarum, trutarum, luciorum &c: quopactò illi pisciculi semper lente admodum adverso flumine natantes videantur, cogitare tum licet, id fieri, ut tanto melius minutissimos illos pisciculos, ante memoratos, qui secundo flumine illis obviam feruntur, intercipere, atque pro alimento uti queant, donec eousque accreverint, ut aliis, majoribusque piscibus vesci commode possint.

Si enim consideremus oculos supra modum magnos, quibus exigui pisciculi, ex supra dictorum piscium ovis exclusi, sunt instructi, quique alias corporum partes mole longe superant, non levis subire potest suspicio, iis ab initio datos esse oculos tam magnos, ut tanto melius alimento inservientes pisciculos queant intercipere.

En Tibi, Vir Illustris, aliquot observationes, de quibus ante aliquot hebdomadas ex parte Tecum sermonem habui; & ex quibus iterum liquet vulgum circa multas res graviter errare. Vale Vir Illustris &c.

Dabam Delphis V. Kalendas
Januarias 1696.

Epistola

Epistola 98.

Data ad Nobilissimum, Generosissimumque Virum,

DOMINUM

FRIDERICUM ADRIANUM,

Baronem Rhedæ; Dynastam in Renswoude & Emminkhuysen, Toparcham in Moerkerken &c. &c.

In qua narratur

Quendam scriptorem asserere pediculos esse Hermaphroditas. Sæpe sibi Auctorem persuasisse omnes pediculos continere ova. Pediculos non esse Hermaphroditas. Sequioris sexus pediculos instructos esse ovario ovis repleto; ex ovis ovario exemptis non prodiisse pediculos. Eorum ovorum numerus accurate supputari nequit, nunc enim sexaginta videbantur, & mox quidem septuaginta. Quæ in pediculorum maribus pro ovis haberi possent, sunt testiculi, qui quatuor numero, bini juxta se sunt locati. Materia in testiculis & ovis.

Membra

Membra pediculorum genitalia , & aculeus. Ubi pediculus masculinus duriuscule tractatur, aculeum suum extra corpus profert. Pediculorum fæmellæ aculeo sunt destitutæ. Pediculi pyxidulis inclusi ut ova in iis ponerent. Quomodo pediculi sint pasti & quot, quantoque tempore, posuerint ova. Pediculi alteri ex tibialibus impositi, ut in eo ova parerent, ac fœtus procrearent. Pediculus sex dierum spatio quinquaginta peperit ova. Fœtus ex iis orti. Pediculus, partis jam quinquaginta ovis, alia adhuc quinquaginta in ovario continebat. Ova octiduo indigent, antequam pediculi ex iis prodeant. Ex ovis a pediculis in pyxidula positis etiam fœtus prodire. Membrum virile pediculi delineatum; ut & testiculi & vasa semen adferentia & deferentia. Aculeus pediculi masculini depictus, ut & aculeus quem pediculi intra caput habent, ejus tenuitas. Pediculorum ova delineata. Duum generum pediculi. Magna pediculorum multiplicatio ob oculos posita. Duæ pediculorum fæmellæ intra octo hebdomadam spatium possunt plures quam decem millia pediculorum videre ex se natos. Varii citati scriptores & quam fabulosa de pediculorum generatione omnes illi proferant, quæ tam altas in plerorumque hominum animis egere radices, ut multo opere ex iis erui non possint.

Viro Nobilissimo, Domino

FRIDERICO ADRIANO,
Baroni Rhedæ &c.

ANTONIUS a LEEUWENHOEK. S.



Oluptas, Vir Nobilissime, quam ex rerum
hactenus (quantum mihi patuit) ignota-
rum detectione haurire soles, animum
mihi addidit pediculosas has meas obser-
vationes Tibi denuo mittendi.

Postquam vidissem animalcula, quæ in Ribetibus,
Cerasis, Rosis & Prunis inveniuntur, omnia sui
similia proferre, ita ut nullum inter ea marem de-
texerim, ut antehac fuse Tibi scripsi; cogitare cœpi
de pediculis, a quibus homines, & maxime, qui præ
inopia raro aut nunquam vestes mutare possunt plu-
rimum vexari solent; idque eo magis, quia memini
quendam scriptorem, de iis scribentem, asserere eos
esse Hermaphroditas.

Hanc ob causam, non una, sed octo decemve
quidem vicibus pediculos ære meo mihi comparavi,
eosque identidem dissecui, & sic sæpius mihi persuasi,
omnes quos aperiebam pediculos, ovis, quæ lendes
vocant, esse onustos.

Antea jam dixi pediculos partem corporis posticam
instructam habere aculeis, quibus, ut mihi persuasi,
homines pungere solent, ubi nimium a vestibus
premuntur.

Hanc

Hanc meam scrutationem per aliquot continuos dies prosequens , tandem comperi pediculos non esse Hermaphroditas , quoniam continuo in fœmellis reperi ovarium ovis repletum , & in quo plerumque quinque , aut etiam sex quidem erant ova plane perfecta.

Hæc ova aliquoties per duas aut tres hebdomadas aeri exposita reliqui , ac passim comperi , unum aut alterum ex iis tam perfectam servare rotunditatem , acsi primum ex pediculo forent exempta , cum e contrario cætera omnia redderentur plana , ac liquor ex iis exhalaretur ; quumque ova illa quæ rotunditatem suam servaverant aperirem , materia liquida ita ex illis effluebat , acsi ova recens ex ovario forent exempta , ac sic aperta fuissent. Hinc nobis iterum apparebat , quam tenax & firmus sit cortex ovi perfecti , ut liquor , licet passim magno calori obnoxius , non exhalaretur. Quædam ex his ovis ex ovario exemptis in calore satis magno servavi , scire cupiens num ex illis recentes prodituri essent pediculi , licet autem hanc observationem ter repetierim , nunquam tamen id mihi videre contigit.

Sæpe etiam conatus sum numerum ovorum in ovario contentorum supputare , sed facere id accurate non potui , partim quia ea non satis pro lubitu poterant dissipari , partim quia multa nimis erant exigua , adeo ut modo conjecerim sexaginta illi inesse ova , mox autem septuaginta quidem numerarim.

Porro post varias observationes detexi id , quod in pediculorum maribus pro ovis habueram , non esse ova sed eorum testiculos.

Hi testiculi sunt quatuor numero, quorum bini prope sibi mutuo adjacent, & præsertim quidem extremitatibus suis, adeo ut videantur vasa semen deferentia conjungi, & plus semel mihi apparuerit, acsi unum tantum vas esset. Singulos ex his testiculis quartam circiter partem ovi pediculi perfecti æquare censui.

Antequam plane certus essem has partes esse testiculos, varios pediculos diffecare necesse habui; quando multæ mihi apparuerunt particulæ oblongæ exiguis anguillis haud abfimiles (sed hujus rei veritas mihi non satis constat, ut de ea cum fiducia loqui possim) at e contrario materia, qua pediculorum ova erant repleta, constabat ex liquore pellucido, mixto majoribus minoribusque globulis.

Dein sæpe ex pediculorum maribus genitalia protuli. Nec semel, non sine voluptate, aculeos ex eorum corporis parte postica produxi, imo & totos exemi, quod tamen fieri non potuit sine fractione tenuium partium cornearum, quæ magna sui parte corpori erant infixæ, & per quas partes aculeus extra corpus protruditur.

Jam usque adeo mihi innotuerant pediculi, ut, quando eos ope microscopii non admodum objecta augmentis viderem, statim dicere possem, generisne essent masculini, an foeminini.

Quæ autem sit causa cur marium corporis pars postica aculeo sit instructa, & foemellarum non item, & cui rei iste aculeus inserviat, id imperscrutabile mihi censeo; sed tamen id vidi, ubi mares aliquanto durius contrēctarem, eos tum posteriorem corporis partem

partem incurvare , acsi tum pararent se ad pun-
gendum aculeo suo : imo etiam vidi eos hoc in casu
aculeum extra corpus suum proferre.

Bis quoque pediculos inclusi pyxidulæ aperculo
striato tectæ , prius ejus parti interiori obducto serico
nigro , partim ut pediculi facilius infigerent ungui-
culos suos serico , quam ligno , partim ut ova , quæ
forte ponerent , eo melius mihi forent conspicua ,
quoniam autem mensibus Decembri & Januario has
observationes institui , pyxidulam semper calidam
servavi , sciens pediculos frigoris esse impatientes ,
quem in finem eam interdum imposui sacculo in fe-
moralium meorum cingulo latente , noctu vero eam
juxta me in lecto locavi.

Interea vidi pediculos mihi duo tantum peperisse
ova , eaque affixa fibræ serici pyxidulæ obducti.

Hoc viso de novo novem sumsi pediculos , non ex
minimis , & inter eos unum marem , quos etiam
includi pyxidulæ , cui imposueram duas particulas
lanæ crassæ , ut pediculi ova sua lanæ affigerent ;
ubi hi per sex horas fuerant occlusi , pyxidulam ad
candelæ lumen aperui ; & vidi singulos pediculos hos
lumen pro viribus fugere , adeoque omnes capita sua
sub filis laneis occultare , sic ut nil nisi postica cor-
porum pars appareret. Quod vero unum tantum
occluserim marem & tot fæmellas , inde factum est ,
quod mihi persuaderem , multa in ovario ova reddi
fœcunda ad primum coitum , ut in gallinis &c : id
fieri constat.

Quum autem pediculi fame premerentur , identidem
posticam corporis partem aliquantulum attollebant ,

atque aculeos suos , quos extra caput proferebant , quique iis alimento capiendo inferviunt , inter serici fila ingerere conabantur.

Hi mei conatus , ad pediculorum ova colligenda , non alium instituebantur in finem , quam ut scirem quanto temporis spatio indigeant ova , antequam ex iis novi prodeant pediculi ; idque quia vulgo ferunt pediculos intra paucos dies multorum esse proavos ; imo quidam ajunt eos intra 24. horas esse avos ; quum ego e contrario censerem , ab eo tempore quo ovum est partum , antequam ex eo prodeat pediculus , & is eo progrediatur ut ipse iterum ova pariat , quatuor quidem requiri dierum hebdomadas.

Postquam pediculi octodecim horas fuerant occlusi , vidi eos filis laneis decem affixisse ova , & post dilapsas alias duodecim horas tredecim numeravi ova. Tunc temporis etiam vidi maximam corporum eorum partem plane esse albam , idque quia sanguis , per quem antea ex parte rubuerant , inter excrementa erat emissus. Omnes ergo cepi , eosque exteriori parti manus meæ imposui , ut ex ea iterum alimentum caperent ; septem autem ex iis statim aculeos suos cuti ingerebant , ac sanguinem ex manu fugebant , at reliqui adeo erant debiles , ut progredi nequirent : num autem hæc debilitas iis orta sit ex eo , quod nimis diu alimento fuissent destituti , an vero ex eo , quod dum caperentur durius sint contrectati , atque inde aliquot in corpore vasa sint læsa , id me fugit.

Valde mirabar septem hos pediculos , dum aculeos suos cuti ingerebant , & præcipue dum sanguinem
ex-

exfugebant , non majorem mihi excitare dolorem ; hic enim adeo erat exiguus , ut vix sentirem aliquid in manu mea fieri.

Præterlapsis iterum duodecim horis , fila illa lanæ denuo observavi , ac tum plura quam triginta numeravi ova.

Quod autem jam duodecim horarum spatio ex septem pediculis septemdecim accepiſſem ova , ad hoc non parum feciſſe mihi perſuaſi alimentum , quod ſanguis ex manu mea hauſtus iſſis præbuerat. Idcirco eos iterum manui meæ impoſui , ex qua omnes magna aviditate alimentum quærebant , imo uſque adeo , ut ſanguis recens ſuctus ex quorundam parte corporis poſtica ſtatim efflueret ; cum alioquin , ubi alimentorum inopia urgentur , eorum excrementa dura ſint & ſicca. Obſervavi quoque pediculos ſanguine ſatiatos quieſcere , nec locum mutare , non aliter quam ſi laſſi forent.

In poſtrema hac ſanguinis ex manu mea exſuctione , unus ex pediculis mihi tantum intulit dolorem , ut ægre admodum ferrem ; hujus cauſam eſſe mihi perſuaſi , quod partem quandam nervoſam forte punxerit.

Post alias undecim horas 38. aut 39. numeravi ova ; atque tum iterum ſeptem illos pediculos manui impoſui , atque eos ad ſatietatem uſque ſanguinem ex ea exſugere ſivi , poſtea eos iterum pyxidulæ incluſi , atque alia eis dedi fila lanæ , quibus ova ſua affigerent.

Quum autem poſtridie ova , ab octava vespertina ad octavam matutinam poſita numerarem , comperi ea viginti & ſeptem numero eſſe.

Ab

Ab octava autem matutina ad octavam vespertinam unum tantum positum erat ovum, cum tamen septem illos pediculos, inter quos unus erat mas, mane & vesperti sanguinem ad satietatem usque ex manu mea exsugere sivissem.

Sequenti mane iterum ova numeravi, eaque ad numerum viginti & octo accrevisse vidi, adeo ut passim compererim pleraque ova noctu esse parta; hæc autem ova non late inter fila lanea erant sparsa, sed prope sibi mutuo adjacebant: tunc etiam pediculus inter strias operculi penetraverat, qui, cum eæ moverentur, plane est contritus.

Sequenti luce, quæ diei 17. Januarii erat pediculi quatuor pepererant ova, ac inter sex illos unum conspexi, qui sanguinem non exsugebat, quem & postridie mortuum repperi, & ex ejus corpore dissecto tria exemi ova plane perfecta: illa autem nocte reliqui sedecim adhuc pepererant ova.

Die 18. Januarii quinque reliqui pediculi unum tantum posuerant ovum, & inter eos iterum unus nullo utebatur alimento, qui & sequenti mane mortuus erat, quando etiam iterum decem numeravi ova.

Postridie, qui 19. erat Januarii dubitavi num unus ex tribus reliquis pediculis unum peperisset ovum; at in sequenti nocte tres reliqui (quartus enim mas erat) duodecim peperant ova, & nullus dubito, quin, si singulis sex horis pediculos nutritissem, quod jam singulis duodecim horis tantum egeram, plura mihi ova, quæ lendes vocant, parturi fuissent. Ab ulteriori verò circa hos pediculos destiti inquisitione, ratus ex illis ovis novos non prodituros pediculos; atque

ARCANORUM NATURÆ.

atque ideo pyxidulas , cui omnia ova , filis laneis affixa , inerant , seposui.

Præterea proposueram puero orphano cuidam nova induenda dare tibialia , iisque imponere duos aut tres pediculos adultos sequioris sexus , eaque tibialia sic supra genua ligare atque obsignare , ut certus esse possem pediculos ex tibialibus evadere non posse , atque adeo investigarem , quot ova aut pediculos exiguos illi pediculi sex septemve dierum spatio producerent. Sed propositum hoc mutavi , ratus eertio rem me futurum , si ipse id experirer , nec metuendum mihi esse , illum pruritum ac dolorem in altero ferre pede , quem plerique pauperes ætatem suam toto corpore ferre coguntur.

Alterum igitur pedem exui tibiali albo , quod gestare consueveram , atque ejus loco indui tibiale nigrum tenue & plus dimidio quidem obsoletum , quia in tibiali nigro ova parta , ac exiguos pediculos ex ovis ortos , facilius detegi posse conjiciebam.

Huic tibiali imposui binos pediculos fæmellas , eosque haud exiguos ; dein alterum sumsi tibiale nigrum , quod juxta rotunditatem in vittam tres circiter digitos latam eo modo dissecui , quo mala corticibus suis privari solent ; idque eum in finem , ut tibiale , cui pediculi erant impositi eâ supra genu aliquot spiris cingerem , quia ejusmodi genuale mihi noctu molestiæ esse non poterat , utpote quod contrahi atque extendi posset , & tamen hoc pacto pediculi impedirentur , ne ex tibiali evaderent.

Alter ex his pediculis primo se circa talum locabat , ubi , ut mihi persuasi , per biduum manebat ; alter

vero manebat eo loci ubi eum primo locaveram, nempe supra suam.

Postquam hi pediculi per sexiduum tibiali infuissent, id exui, alterumque repperi prope locum ubi eum locaveram, nempe supra suram, ubi quinquaginta quidem pepererat ova, sed præcipue quidem duobus in locis, licet eum sæpius circa genu sensissem.

Mirum hoc mihi videbatur pediculum hunc, omni destitutum lumine, ova sua, variis diebus parta, sic circa eundem locum locare posse.

Hunc pediculum, quem quinquaginta jam quidem ova, peperisse pro comperto habebam, aperui & ovarium ex eo exemi, atque ova ex eo quantum potui dispersi, ac tum quinquaginta quidem ova me videre adhuc censui; & quis dixerit, quot quidem ova pepererit antequam eum tibiali imposuerim, aut etiam quot ova hæserint in ovario, quæ visum meum effugerint.

Porro quæsi alterum pediculum, qui se circa talum locaverat, sed eum non inveni, licet, dum tibiale exuerem pedem hoc pacto tibiali fricuerim, ut nullus pediculus cuti adhærere potuerit.

Interim pedem purgavi, atque etiam tibialis pedem perquisivi, sed pediculum non detexi, at tandem circa tibialis extremitatem, ubi pedis pollicis locus erat, detexi aliquot ova, quæ post accuratam supputationem triginta novem, aut quadraginta esse censui.

Quoniam autem ex omnibus illis ovis nullum adhuc videbam pediculum, cum tamen pes meus, nec consequenter etiam ova, frigore non laboraverat, putavi

putavi omnia hæc ova esse infœcunda , certo enim mihi persuadebam intra triduum pediculos ex ovis prodituros.

Attamen unum circa talum inveni pediculum exiguum , & lende , five ovo pediculi , quadruplo circiter majorem ; quo de pediculo cogitavi me forte , cum majorem pediculum tibiali imponerem , minutissimum cum majori pediculum cepisse ; idque eo magis quia passim minutissimos pediculos inter majores animadverto , quos supra numerum indictum mihi addunt.

Cum autem pediculum illum non invenirem , cogitavi eum , dum pedem purgarem , ubi eum inventum iri non putaveram , evasisse.

Tibiale hoc nigrum iterum indui , non quidem cogitans ex lendibus five ovis pediculos prodituros , sed solummodo ut viderem quousque exiguus ille pediculus intra sex , octove , dies accresceret.

Postquam jam decem dies plane erant elapsi , ex quo pediculos primum tibiali imposueram , nec præterita nocte , nec sequenti die vel minimum senseram pruritum ; cum autem præcedenti vespera solito propius foco affedissem , atque ex eo pedes mei valde incaluissent , credidi pediculum illum præ nimio calore esse mortuum.

Tibiale ergo exui , eo solummodo fine ut exiguum illum pediculum quærerem , quem brevi detexi usque adeo jam auctum , ut jam semi adultus esset ; hic vero pediculus mas erat.

Sed , quod maxime mirabar , viginti quinque quidem pediculos vidi discurrentes , sed præcipue circa ova , & hi triplicis quidem erant molis.

Maximum genus biduum natos esse censui, secundum genus, paullo minus, unius tantum diei foetus judicavi, & hi aliquanto majores erant duobus ovis; utrumque vero hoc genus jam corpora habebant rubicantia ex sanguinis suctione; minimos jam primo ovis esse exclusos mihi persuasi, quia ovis non erant majores; hi autem nullo adhuc usi erant alimento, & paulo magis ad flavum, quam ad album vergebant colorem.

Porro multos cassos vidi ovorum cortices, ex aliis vero ovis brevi pediculos exclusos fore opinabar.

Ejusmodi ovum aperui, atque recentem pediculum ex eo exemi. Hoc vero tot pediculorum in tibiali spectaculum tantum in me peperit fastidium, ut tibiale illud, & simul omnes in eo pediculos e fenestra projecerim.

Dein totum crus, pedemque dure admodum fricui, ut, si forte exiguus aliquis pediculus pilo alicui adhereret, eum hac frictione occiderem, ac post dilapsas iterum quatuor horas hanc frictionem repetii, ac tum denuo album purumque indui tibiale.

Ante multos jam annos pediculum aperui, atque ex ovo, ab ovario detracto, exiguum pediculum exemi, quod mihi postea nunquam ita obvenit; hujus rei non aliam excogitare potui causam, quam ejusmodi pediculum ova sua deponere non valuisse, & sic pediculum in ovo, licet matri adhuc incluso, esse perfectum.

Cum jam videamus pediculum bis trium dierum spatio plura quinquaginta ovis parere posse, ac tum plura etiam quam quinquaginta intra corpus habere, non

non est quod miremur , ex uno pediculo tot alios posse oriri. Quumque ab alia parte videamus pediculorum ova octo quidem requirere dies , antequam ex iis novi pediculi prodeant , potius credendum est , ovum recens partum tribus quidem indigere hebdomadibus , antequam ex eo oriatur pediculus aptus ad genus suum propogandum , quam cum vulgo dicendum pediculos intera paucos dies multorum posse esse abavos.

Primo quidem proposueram investigare , quanto temporis spatio indigeat pediculus antequam plane sit adultus , sed ab hoc meo proposito postea destiti : postquam jam conspexeram ex ovis , ab pediculis illis in tibiali positis , novos prodiisse pediculos , duas sumsi pyxidulas ovis pediculorum refertas , quasque jam ante biduum seposueram ; has iterum in femoralium cingulo locavi , atque noctu juxta me in lecto posui. Quoniam aliquot abhinc diebus observaveram , multa pediculorum ova , quæ admodum fuerant limpida , ex altero latere jam reddi obscura , haud aliter quam si nobis repræsentaremus , materiam in ovis graviolem versus fundum sidere : sumsi (postquam ova per decem dies fuerant posita) ovum , in qua materia maxime quidem subsidisse mihi videbatur , quod aperui , atque perfectum ex eo exemi pediculum , in quo non tantum oculos pedesque , qui ordine admodum concinno jacebant , sed & pedibus affixos unguiculos dignoscere poteram ; adeo ut mihi jam liqueret , imaginariam in ovo coagulationem , non aliam esse , quam pediculorum incrementum.

Cum jam ova paulo plus undecim diebus fuissent parta, aliquot exiguos pediculos per pyxidulam discurrentes vidi.

Sed objiciet mihi forte quis, exiguos illos pediculos hyeme ob frigus non citius ovis fuisse exclusos; at respondere licet, toto illo tempore gelu non contigisse; me passim lectum calefactum intrasse, atque interdum pyxidulam semper fuisse calidam, quoniam inferior mea vestis (quæ ad genua usque descendit) pellibus satis densis est duplicata.

Quemadmodum autem ova, quæ pyxidulæ inerant, non uno die, sed variis diebus parta erant, sic etiam ex iis aliquot continuos dies exigui pediculi prodierunt, idque usque adeo, donec ex omnibus ovis nil restaret præter cassas testas, exceptis quibusdam, in quibus pediculi mortui erant.

Antea dixi pediculos non esse Hermaphroditas; hac in parte ut aliis ulterius satisfacerem, ex variis maribus membra genitalia exemi, eaque omnia eodem modo inveni formata, excepto solummodo, quod subinde hanc illamve particulam, quam in uno videbam, non ita in alio dignoscere potuerim.

Fig. 1. A B C D repræsentat membrum genitale pediculi masculini, ita ut a me corpori exemptum, microscopio oppositum, ac pictori traditum fuit, ut id quam accuratissime delinearet: omnia vero circa C sunt inflexa, ubi etiam exigua cernitur apertura, ac si illa foret, per quam semen masculinum egereretur.

Sed quoniam mihi videre quidem contigit, ex extremitate B exiguum liquoris globulum prodire, qui

fig: 1.




fig: 2.



fig: 3.




fig: 4.



fig: 7.



fig: 8.




fig: 9.



fig: 5.



fig: 6.



qui ob materiam suam viscosam non exhalabatur , fateor me nescire quid hac de re statuendum est.

In Fig. 1. E F A D exhibetur corpus rotundum , cui membrum masculinum est conjunctum , & ex quo oriri videtur ; hoc vero raro adeo apparet rotundum , quia passim admodum irregulariter contrahitur ; in hoc autem , ut mihi persuasi , semen , ubi in testiculis ad maturitatem suam pervenit , demittitur , ut tempore coitus adsit , quia testiculi nimis longe a membro masculino absunt.

Quæ Fig. 1. E F G repræsentantur , sunt , ut vero simile videtur , vasa , tum spermatica , tum sanguinea , & nervi.

Fig. 2. L M N O aliud exhibet membrum masculinum , aliique oppositum microscopio ; hoc vero non aliam ob causam delineandum tradidi , quam ut exhiberetur corpusculum illud eminens , in L repræsentatum ; hæc autem pars bis , terve , tantum mihi apparuit.

Eo viso mihi persuasi , hoc forte esse organum , cujus ope mas in coitu fæmellæ adhæret ; quod nempe , ubi genitalia maris genitalibus fæmellæ sunt illata , tum demum illud corpusculum proferatur , ut ejus ope genitale maris intra genitale fæmellæ cohibeatur , atque hoc pacto coitus reddatur diuturnior ; quod in multis animalibus , & præsertim quidem minutis , fit.

Fig. 2. H I K exhibet idem corpus , quod Fig. 1. E F A D fuit repræsentatum , quodque jam arefactum , & contractum , hanc nactum est figuram.

In eadem Fig. 2. circa N etiam videre est exiguam aperturam , quam Fig. 1. circa C cernere licet.

Visum

Visum quoque fuit duos testiculos delineandos curare, qui Fig. 3. P Q R S exhibentur.

In hisce testiculis non potuerunt spectari vasa eorum semen deferentia, quia illa pars, ubi ea locum habent, quæque circa P est, intestini parte, aliisque organis tecta erat.

Mirum hoc mihi in pediculis videbatur, quod bini ejusmodi testiculi unius tantum vices supplerent. Quotquod enim aperuerim pediculos masculos, in omnibus duo testiculorum paria hoc modo juncta vidi. Atque eo magis hoc mirabar, quod nunquam audiverim aliquod animal binis testiculorum paribus esse instructum.

Ut tanto melius aliorum curiositati fatiscerem, aliud etiam testiculorum par, alteri oppositum microscopio, delineandum tradidi.

Fig. 4. V W X Y T repræsentat par testiculorum ab aliis intestinis separatorum.

Fig. 4. X Z exhibetur vas semen deferens, eo autem vase testiculos aliquantulum protraxi, ut id hoc pacto paulo magis extenderetur, atque eo melius posset delineari; & præterea ut vasa semen adferentia, quæ sæpe mihi apparuerant, pictori ob oculos ponerem, hæc vero hic in T A & V A exhibentur.

Vasa hæc semen adferentia, hoc quidem modo locata, non in naturali suo sunt situ; passim enim compori ea tendere, sive inflexa esse in orbem ab V versus W, & ab W ad X, atque ab X versus Z. Atque ita etiam alia ab I versus Y, usque ad Z. Adeo ut vasa semen adferentia ac deferentia eadem ferantur viâ, sed quamdiu hic concursus duret, me fugit.

Aculéum

Aculeum etiam pediculi masculini, quem in postica corporis habet parte, quique subflavi est coloris, (similis colori unguiculorum, pedibus pediculi affixorum) quem non extra corpus exserit, antequam eo uti velit, hunc, inquam, aculeum etiam microscopio opposui, ac delineandum curavi.

Fig. 5. B C D exhibetur pars aculei, eo usque, quo pediculi masculini eum extra corpus exserere solent, vel potius quo ego eum extra corpus protrudere potui; hætenus enim aculeus, nec nervis, nec partibus carneis obsitus est.

In hoc aculeo videri potest crena sive cavitas quædam totum aculeum transiens, quæ facta videtur ad liquorem aliquem ex corpore versus aculei extremitatem deferendum, ubi pediculus eo ad pungendum uti vult; licet nullum tamen liquorem in aculei extremitate animadverterim.

Hæc aculei pars ita est delineata, ut ejus cavitas oculo sit obversa, unde jam aculeus rectus esse videtur.

Eundem aculeum, latere suo visui obverso, microscopio opposui, unde aculei curvitas melius jam apparet, quæ hic Fig. 6. E F G cernitur. Atque eousque etiam aculeus nullis aliis partibus erat obsitus, sed visu versus inferiora, Fig. 6. circa G H I E demisso, apparebat pars aculei cornea, ex qua is partim protruditur, quæque aculeo pungenti dat rigiditatem ac firmitatem.

Cui autem usui hi aculei inserviant, & quo tempore iis uti soleant, ea de re jam antea cogitata mea aperui; sed de ratione, cur soli his instructi sint mares,

ac non fæmellæ , aliquot quidem feci conjecturas , sed veram ejus rei rationem investigare nondum potui.

Antehac jam curavi delineandum aculeum , quem pediculi in capite habent , nec egerere solent nisi ubi alimentum quærunt ; simul etiam tunc dixi , eam partem , quam primo pro aculeo habebam , revera non esse nisi thecam aculei multo tenuioris : cum autem jam forte fortuna pediculi caput diffinderem , incidi in aculeum , (ejusque thecam) qui mihi supra modum longus apparuit , quare eum etiam delineandum tradidi. Fig. 7. K L est theca , atque L M ipse tenuissimus aculeus , ex parte extra thecam prolatus. Quum autem jam videamus , adeo tenuem pediculo esse aculeum , non est quod amplius miremur , læsionem ex pediculi punctione non majorem nobis adferre dolorem , si nempe nervus non lædatur.

Passim quoque animadverti , ubi pediculus sanguinem suctione ex corpore extrahit , tum minutissimam maculam rubram in cuti , circa ejus caput , excitari , unde didici , tenuissimum illum aculeum solummodo factum esse ad vasa sanguifera perforanda , atque hoc peracto eum nulli esse usui.

Ubi autem aculei L M incredibilem tenuitatem compararem cum pilo ex manu mea evulso , quam accuratissime microscopii ope licuit , censui ejusmodi pilum septingentis quidem vicibus crassiores esse aculeo.

Quod cum ita sit mirandum non est , ex decem pediculis , quos manui meæ imposueram , ut sanguinem ex ea exlugerent , unius tantum punctiorem
mihi

mihi fuisse sensilem : ac præterea licet 25. quidem tibiali inessent pediculi , quorum duæ tertiæ partes jam sanguinem meum suxerant , eos tamen tam parum mihi fuisse sensiles , ut ne unum quidem in tibiali vivere censerem. Hanc ergo ob causam cogitavi plurimum forte dolorem , a pediculis hominibus illatum , excitari punctione illorum aculeorum , quibus pediculi masculi in parte corporis postica sunt instructi.

Quum pediculorum ova , lendes ea vocant , accuratius examinarem , censui eorum cortices compositos esse ex partibus squamosis rotundis , quarum singulæ constabant ex multis minutissimis globulis , aliis alios mole superantibus , quod haud injucundum mihi præbuit spectaculum. Sed ubi cassas ovorum testas , ex quibus exigui pediculi prodierant , intuerer , vidi me in opinione mea falsum fuisse , ac illas partes squamosas rotundas , quas videre mihi persuaseram , non esse nisi materiam in ovis , quæ ad pediculi , intra ovum , incrementum inserviret.

Visum quoque fuit corticem ovi pediculi exhibere , ut corni posset ex qua ovi parte pediculus erumpere soleat.

Fig. 8. NOP repræsentat corticem ovi pediculi. QR est pilus sive lana ovis , cui ovum pediculi affixum est , ope materiæ cujusdam viscosæ , quam pediculus una cum ovo extra corpus profert.

In N exhibetur pars ovi instar operculi , quæ , ut vero simile , eum in finem adeo fragilis facta est , ut a pediculo , intra ovum perfecto , possit infringi & aperiri , cum alia exigua animalcula , dentibus aut

ferris instructa , iis ova sua perforant , ac sic ex iis evadant.

Fig. 9. S T V alium exhibet ovi corticem , in quo circa T apparet corticem exiguum horum ovorum æque membrana esse instructam , ac in gallinarum , aliarumve avium , ovis videmus interiorem testarum partem membrana esse tectam.

Sub illo ovi operculo , quo perrupto , pediculus ex ovo evadit , alia adhuc latet tenuis membrana , quæ etiam a pediculo est perrupta , atque , a pictore quoque delineata , in T repræsentatur.

Non etiam possum , quin his addam , me inter pediculos , mihi allatos , duo invenisse genera ; quidam enim aliquantulum nigricabant , idque non solum corporibus , sed & pedibus & capite ; cum alioquin cætera membra cum aliis plane convenirent.

Multi , pediculos nudo tantum oculo videntes , sibi persuaderent quatuor quidem pediculorum esse genera ; ubi enim pediculorum fæmellæ nullo , aut non multo usæ sunt cibo (qui sanguis passim est) alios albedine longe superant ; atque etiam ubi sanguine sunt satiata , sanguis non ita per earum cutem pellucet , ob multiplicia ova quibus earum corpora sunt imprægnata ; cum e contrario mares , ubi sanguine (qui cibus eorum est) sunt repleti , corpora habeant plane rubicunda , atque adeo fæmellas rubedine longe superantia.

Animadverti quoque , ubi pediculos manui meæ imposueram , atque ego , dum progredierentur , manum aliquantulum inverterem , tum pediculos ob manus lævitatem , in qua pedes figere nequirent , ab ea decidere.

Ex

Ex hac observatione mihi mirum visum non est, pediculos locum mutantes, aut sanguine sugendo non occupatos, non corpus humanum adscendere, sed potius indusum, aliasve vestes (in quibus etiam ova sua deponunt) atque iis adhærere, quoniam facile pedes suos lino aut lanæ infigere queunt.

Videntes jam pediculum, ut antea diximus, sex dierum spatio quinquaginta quidem parere ova, ac tum corpus pluribus adhuc habere imprægnatum, facile etiam percipimus egenum quendam, cujus corpus centum pediculorum fæmellis est oblitum, quique vestes ac lintea non aliquando mutare potest, ac præterea pediculorum occidendorum, præ pigritia, curam non gerit, aliquot mensibus a pediculis, ut ita dicam, posse devorari. Ut vero magna pediculorum multiplicatio tanto melius ob oculos ponatur, faciamus aliquem corpori suo adhærentes habere binos mares, totidemque pediculorum fæmellas, easque fæmellas intra duodecim dies ducenta parere ova, ac sex diebus post ex illis ovis prodiisse centum mares ac totidem fæmellas, qui post alios octodecim dies plerique ovis ponendis sunt idonei; atque etiam singulas ex iis fæmellis duodecim dierum spatio iterum centum parere ova, ex quibus post aliud sex dierum spatium iterum recentes prodeant pediculi; quod si ita ponamus numerus pediculorum ex duabus illis fæmellis ortorum ad decem millia adscendet; atque ita patebit duas fæmellas intra octo hebdomadas posse videre decem millia pediculorum ex se ortorum, quod, nisi experientia doctus, non facile alias credidissem; & quid si eorum generatio

tempore caloris æstivi duplo quidem celerius peragatur?

Non jam referre libet artem incomparabilem, qua cutem, pedes, cæterasque corporis partes formatas comperi, non etiam artificiosissimam ovorum formationem. Neque injucundum erat videre celerem agitationem, qua sanguis humanus in pediculo, tam in stomacho quam intestinis, assidue sine intermissione huc illuc protrudebatur, ne in quiete coagularetur, quod si fieret pediculis mortem afferret. Tandem, ut verbo dicam, ineffabiles in pediculo animadverti perfectiones, quod & antea sæpius dixi, & tamen tam contemnendum plerisque habetur hoc animalculum, ut non sine fastidio de eo sermones haberi audiant.

Haftenus observationibus meis chartæ mandatis, consului Jonstoni descriptionem animalium, scire cupiens quid is de pediculorum generatione scribat, & quas ille fabulas ex veterum scriptis, circa horum generationem, citaret; dein has sequentes vidi.

Eos ex ipsa carne oriri, ac aliquot excitari tuberculos, ubi prodituri sunt, atque iis perforatis eos prodire, putavit Aristoteles. Theophrastus eos sanguini corrupto originem suam debere censuit; ac Mercurialis eos oriri ex materia liquida, calida ac putrefacta quæ intra cutem abundat.

Ego autem id præcipue in sanguine phlegmatico obtinere censerem, quoniam sanguis felleus ac melancholicus eos extinguit, atque ei felle obliti evanescent.

Si locum consideremus Galenus iis locum intercutem assignare videtur : ast eos in toto repperiri corpore, quoniam universa passim cutis poris est plena, nemo inficias ire poterit.

Fateri tamen oportet eos plerumque in capite ac circa axillarum angulos, atque inguina erumpere, illic enim pleraque superflua colliguntur, atque sordes illic pilis tectæ, ob negatam exhalationem, facile putrescunt &c : Necesse ergo est illic latere eorum principium, ac quasi esse animatum &c.

Apud Dioscoridem etiam legi, quod, si ovis ab lupo mordeatur, ac postea vestes ex ea lana fiant, eæque vestes ex sudore madefiant, tum lanam illam pediculis ortum dare, quod & testantur Aristoteles atque Plutarchus; tale quid etiam fieri, si panni adipe equino oblinantur, inveni apud Mouphetum &c:

Kircherum postea consulens hæc de iis dicentem audivi.

Pediculi, qui homines vexare solent, originem suam nec carni, nec sanguini corrupto, nec etiam putrefactioni debent. Si enim ex ipsa carne orirentur, omnes tum pariter homines, æque divites ac pauperculi, ab iis vexarentur: attamen passim degere videntur apud pauperes, qui multum sudant, & vestes mutare nequeunt. Quod ex sanguine corrupto non oriantur ex eo palam fit, quod experientia doceat in nosocomiis passim debiles, ac malignis laborantes febribus a pediculis esse immunes, licet antea pleno exercitu fuerint instructi. Hinc ego opinor pediculos nasci ex spiritibus seminalibus, in alimentis nostris

nostris latentibus. Quoniam enim assidue subtilis quædam materia per poros exhalatur, quæ crassiores aliquot partes secum ducit; hinc fit ut illa materia inter cutem & carnem hæreat, ubi, si subtilis est, in pulices, si aliquanto crassior, in pediculos, at si multo crassior, in cimices mutatur. Quod autem ajunt ex ficubus, magna copia consumtis, multos etiam oriri pediculos, non ita intelligendum id censeo, ac si immediate ex ficubus orirentur, sed tantum in ficubus latere materiam, quæ ad cutem prolata facile in pediculos mutatur, ei rei enim aptæ sunt ficus ob calorem suum atque humiditatem.

Quod pediculi a sanguine melancholico, sive sanguine admodum crasso, extinguantur, id meo judicio (salvo tamen meliori) ex eo solummodo fit, quod sanguis non satis sit fluidus, ut possit penetrare per aculeum, aut aperturam quæ pediculi caput transit, & in qua sanguini, ubi pediculus alimentum suum attrahit, celerrimus, & instar fulminis ictus, inditur motus, qui tamen in sanguinem illum crassum non cadit. Si autem tam parvus ac tenuis sit meatus in capite pediculi adulti, ex eo etiam colligi potest quam arctus sit ille meatus in capite pediculi recens ovo exclusi; adeo ut, etiamsi pediculi adulti sanguine illo condensato vitam sustinere possent, tamen recens nati pediculi ab eo, ut opinor, enecarentur, quoniam pediculi solummodo aluntur ex materia illa sanguinis tenuissima, quam sanguinis serum vocant, atque globuli, qui sanguinem rubrum reddunt, in intestini extremitate colliguntur, aut illic coagulantur (postquam ipsis aliquoties celerrimus inditus fuit motus,

motus, quo huc illuc per reciprocationem trudebantur) ac ut excrementa egeruntur; atque hinc fit ut nulla corporum pediculorum pars aliquam ex sanguine contrahat rubedinem, præter stomachum ac intestina.

Ast ubi pediculi stomachus ac intestina sanguine sunt repleta, atque is tum frigescit, unde stomachi ac intestinorum ejus motus non satis est vehemens, ad sanguinem in debita agitatione servandum, hinc globuli, sanguinem reddentes rubrum, in stomacho ac intestinis quidem dissolvuntur, atque sic per totum pediculi corpus sparguntur, quamvis pediculus tum parum adhuc se movere queat.

Hic jam denuo audimus fabulas, quas Veteres de pediculorum generatione commenti fuere, quæque tam altas in plerorumque animis egere radices, ut non nisi magno labore ex iis evelli queant; imo dolendum est etiamnum adhuc inveniri Viros, haud plane obscuros, qui veteres hos errores non solum ore, sed & scriptis suis tueri non dubitant. Ipse dum hæc scribo, sæpe risum vix contineo, ob aniles has circa pediculorum generationem fabulas, quas, ut verosimile mihi videtur, sine ullo scrutinio ex cerebro suo cuderunt; quod si aliter se haberet, utique ovorum pediculorum fecissent mentionem; atque sic, omnibus errantibus, singuli aliis veritati propiores sibi visi sunt.

Sed hic finem imponam pediculoso huic sermoni, qui triplo quidem proluxior est, quam ipse primo cogitaveram; has autem observationes denuo institui, tum ut mihi ipsi satisfacerem, tum ut alios convin-

cerem aliquot quidem requiri dies , antequam ex ovo recens parto novus prodeat pediculus , atque adeo multo plures adhuc requiri antequam novus ille pediculus iterum eo pervenerit , ut ad generationem aptus sit ; ac tandem ut scirem quantopere pediculi per generationem multiplicentur. Vale , Vir Illustris , & mihi fave.

Dabam Delphis Batavorum X. Ka-
lendas Martias 1696.

Epistola

Epistola 99.

Data ad Amplissimos Gravissimosque Viros,

*Rerum Indicarum Orientalium
Moderatores;*

Inscripta vero

Viro Amplissimo,

D^o. NICOLAO WITSEN,

*Consulum Reipublicæ Amstelædamensis
Præsidi, Rerum Indicarum Moderatori, &
Regiæ Societatis Londinensis Membro &c:*

In qua

*Putatum olim flores myristicos albos
(Witte Foulie) oriri annis non frugiferis, in qua
tamen opinione fuerunt decepti. Vermium tela
inter flores myristicos reperta. Illi vermes in ani-
malcula volatilia mutantur. Omnia folia involuta
sunt tenuibus membranis, qua materia intermedia
ab exhalatione vindicatur. Flores myristici a ver-
mibus*

mibus intra membranas suas comeduntur, & hinc albi fiunt. Ejusmodi vermis delineatus, ut & animalculum volatile ex hoc verme ortum; atque ejus alæ. Vermiculi qui nucibus myristicis nocent, non item noxii sunt floribus myristicis. Folium floris myristici delineatum, in quo & exhibetur, quopactò albedinem suam contrahat. Nux myristica cortici suo involuta ope ligulæ alitur; hoc transfertur ad animalium in utero materno incrementum. Animalcula nuces myristicas comedentia, cortices duros, quibus eæ involutæ sunt, perforare queunt. Ligula, cujus ope nux myristica alitur, tam varia habet vasa, ac ipsa arbor. Tabulata, in quibus flores myristici servantur, undequaque sunt pingenda. Animalcula volatilia, dum flores myristici siccantur, ova sua iis imponere queunt. Acari florum myristicorum odorem non ferunt.

Viro Amplissimo

D^o. NICOLAO WITSEN &c.

ANTONIUS a LEEUWENHOEK. S. D.



Uum ante hac audirem de floribus myristicis (qui aliis macer, vel macis dicuntur) albis, cogitavi eos non esse odoris aut saporis adeo grati, ac flores rufos; idque eo magis quod jam ante triginta, & quod excurrit, annos

annos audiverim Medicum quendam jactare, se eam invenisse artem, qua floribus myristicis albis eum posset dare colorem, qui optimis ejusmodi est floribus. Cum autem jam acciperem flores illos albos tam parvi haberi, ut ex aliis eligerentur ac cremarentur, atque eorum albedinem oriri ex eo, quod non satis prospere creverint; valde cupidus fui flores illos myristicos albos contemplandi.

Quidam autem rerum Indicarum præfectus, quocum sermones habebam, mihi indicavit tempus, quo Aromatum lectores in Camera Indicæ Societatis inter alia flores myristicos albos ex rufis essent lecturi, simul mihi concedens ut eo tempore promptuarium adirem, atque ita curiositati meæ circa flores myristicos albos satisfacerem. Tunc autem temporis magna cum admiratione vidi, flores illos albos non constare nisi ex tenuibus membranis, ac simul adverti aliquam telam (quam a vermiculo quodam confectam mihi persuasi) aliquot florum foliis esse annexam; sed hæc tela non minus annexa erat foliis florum rubrorum quam alborum.

Octo decemve ex his telis domum meam attuli, easque illic observavi, & obsitas vidi particulis nigricantibus oblongis, quas excrementa esse censui illius vermiculi, quæ, dum telam hanc texebat, atque etiam ante id tempus, egresserat.








Deinde in variis etiam telis jacentes vidi particulas, quas pro reliquiis habebam pupularum, ex quibus animalculum volatile migraverat; quoniam autem uni ex cuticulis illis derelictis variæ adjacebant plumulæ, forma haud absimiles plumis illis, quibus

animalculorum volatiliū , quæ Nostrates tineas (*Motten*) vocant , alæ sunt obsitæ ; ex eo mihi persuasi , animalcula illa volatilia , quæ ex illis telis ac cuticulis , sive pupulis , prodierant , aliquo modo forte cum illis tineis , ratione molis , convenire.

Ut hac in parte mihi ulterius fatisfieret , postridie iterum adii Cameram Societatis Indicæ , ubi tum ego , tum & alii integram quidem horam impendimus quærendis vermiculorum illorum telis , inter alia autem mihi dederunt floris myristici folium valde contractum , in quo tela aliqua dignosci poterat. Hoc folium aperui , atque injacens detexi animalculum volatile album , idque non tantum mortuum , sed & aliquot pedibus privatum ; animalculum id tam mole quam forma haud abfimile erat tineis supra dictis , aut animalculo illi volatili alboque , quod in granariis vulgo invenitur , atque ex cujus ovis prodeunt noxii illi vermiculi , quos Nostrates *de Wolf* vocant : attamen aliud genus est ; quum enim vermiculorum illorum alborum , qui in granariis inveniuntur , excrementa sint rotunda ; e contrario illorum vermiculorum , (qui flores myristicos exedunt , & ex quibus animalcula illa volatilia alba , supra memorata , quæ similiter flores myristicos consumunt , prodeunt) excrementa sunt oblonga.

Hoc meo scrutinio satisfactum mihi esse censui , quod nempe ex omnibus illis telis , quibus cuticulæ derelictæ inerant , ejusmodi animalculum volatile ortum esset.

Domum reversus denuo omnes perscrutatus sum telas , quas inveneram , atque ex variis exemi membranas ,
five



sive cuticulas, ex quibus animalcula volatilia evaserant; atque etiam in duabus cuticulis inveni animalcula illa volatilia alba, sed valde præ ariditate contracta; simul perfectam vidi pupulam, in qua animalculum volatile extinctum erat.

Hanc pupulam accuratius observans, clare conspexi ejus pupulæ pelliculam, atque illas cuticulas derelictas, quas in telis invenisse me dixi, plane eodem modo esse formatas.

Visum fuit pupulam illam ita, ut nudo oculo apparebat, delineandam curare, quæ ergo Fig. 1. A B exhibetur, quatenus pictor lineamenta, quæ in ea inveniuntur, prosequi potuit.

Fig 2. C D repræsentatur animalculum volatile, ex ejusmodi pupula ortum, cujus alas paulo longiores fore mihi persuasi, nisi animalculum, dum ex floris myristici folio, cui inclusum erat, erumpere omnibus viribus niteretur, eas infregisset; in quo etiam conatu illud mortuum esse existimo.

Postea observare cœpi flores myristicos quos vocant albos, quorum aliquam copiam domum meam attuleram, atque statim vidi omnem materiam, quæ undique membranis fuerat inclusa, ex membranis esse exesam.

Hac autem materia, quæ plerumque ex globulis constat oleosis, in quibus tota florum myristicorum vis consistit, ex vasis suis, sive membranis (quibus omnium germinum folia, quantumvis exigua, sunt instructa, quæque materiam intermediam tuentur, ne exhaletur ac plane exarescat) exesa, nil restat præter tenuissimas illas membranas, constantes ex
mi-

minutissimis vasculis , quæ juxta folii feruntur longitudinem , quæque albedinem quandam exhibent , unde jam flores myristici vocantur albi , cum revera nihil sint præter tenuissimas foliorum membranas.

Hæ foliorum membranæ interiori sua parte , variis in locis , obsitæ erant particulis oblongis , quarum utraque extremitas cusptide erat instructa , ac minimæ ex iis aliquantulum erant pellucidæ ; quoniam autem hæ particulæ variæ erant molis , mihi persuasi omnes esse excrementa egesta ab exiguis animalculis , quæ materiam membranis florum myristicorum inclusam exederant ; atque excrementa illa ideo mole a se mutuo differre , quod ab variæ ætatis animalculis forent egesta ; in hac autem opinione confirmatus fui , considerans omnia eodem modo esse formata.

Porro sæpius vidi ex floris myristici folio latiori alteram etiam membranam esse consumptam , adeo ut unica tantum membrana superesset.

Varias etiam perscrutatus sum membranas , sive flores myristicos albos , si forte aliquod detegerem animalculum , sed omnem operam perdidi , quare omnes illas membranas abjeci.

Dein varia iterum domum meam attuli florum myristicorum folia , ratus me certe tandem inventurum animalcula , intra membranas extincta.

Tandem post longum scrutinium jacentem vidi particulam albam arenula non majorem , quam Microscopio oppositam , animadverti esse animalculum , cujus pars corporis postica pellucida erat & oblonga ; quoniam autem superior pars corporis aliqua materia erat obsita , ea , dum eam ab illa purgarem , a parte inferiori abrumpebatur. Hæc

Hæc a me facta detectio mihi animos addidit ad ulterius inquirendum , persuaso me majora quidem ex hoc genere animalcula inventurum. At in florum myristicorum membranis plane exesis nil tale detegere potui , unde cogitavi vermes , qui hæc folia ita consumserant , adeo robustos ac magnos esse factos , ut jam ad alia migrassent folia , vel mutati essent. Idcirco observare statui folia florum myristicorum alba , quæ proxima forent foliis adhuc sanis & illæsis , ut & illa folia , quæ magna tantum ex parte erant consumpta , qualia sex septemve attuleram ; in his foliis pauca aliquot detexi animalcula , quorum corporum pars postica forma conveniebat cum forma animalculi supra memorati. Hæc animalcula non modo paulo erant majora , sed & eorum corpora erant rubicunda , unde collegi hanc rubedinem ortam esse ex alimento , quo usa fuerant , nempe materia oleosa , ex qua flores myristici magna ex parte constant , & e contrario animalculum illud pellucidum mortuum esse antequam alimento aliquo usum fuerat.

Aliquot ex his animalculis , sive vermiculis , microscopiis opposui , ut illud quod maxime mihi placeret delineandum traderem , quia omnia quæ detegebam non modo erant mortua , sed & adeo exsiccata , ut ad minimum contactum vel ipsa , vel saltem eorum pedes infringerentur.

Fig. 3. exhibetur ille vermiculus tantus quantus nudo oculo apparebat , isque ex maximis qui hæctenus mihi obvenerant.

Fig. 4. EFGHIKLMNO repræsentatur idem vermiculus , qualis microscopio oppositus a pictore

M

est

est delineatus, in quo cerni possunt multi articuli, crenarum instar excavati, quibus corpus est instructum, ut & multiplices pili, quibus passim est obsitum; atque simul etiam sex breviculi pedes, quorum singuli nitidis instructi sunt unguiculis, quorum etiam extremitates ornatæ sunt articulis dentatis, qui in G & N exhibentur.

Attendentibus ad inferiorem corporis partem, tam in ventre, quam tergo plurima apparent vascula sanguifera, quæ ab utraque corporis parte circa HI & ML sunt crassiora, atque illic ex interiori corpore provenire videntur; hæc autem vascula sanguifera in varios tenuissimos disperguntur ramulos, quorum varii ab H versus M, ut & ab M versus H lati, ac sibi mutuo obviam facti conjunguntur, atque ita non solum fit ab illis ramulis circa H & M, sed & per integrum corpus, at omnia hæc vascula pictor prosequi non potuit.

Ubi pictor circa caput oculos figeret, illic etiam tot se conspicienda præbebant organa, ut non omnia delineari possent.

Circa O & F exhibentur bina nitidissima cornua, ut & eorum articuli, ac pili quibus obsita sunt.

In E videre est ejus os, vel potius binas dentium instar forfices, quarum ope vermiculus (ut opinor) florum myristicorum folia, quibus vesci solet, imminuit, ac quasi ab membranis materiam abradit.

In PP repræsentantur duo organa quibus vermiculi caput est instructum.

Non me fugit, hæc animalcula ac omnia similia dici infecta, siye animalcula exsanguia, quia, ut
verosi-

verosimile mihi videtur , illi , qui hæc eo nomine donarunt , nec sanguinem , nec vasa sanguifera in iis detegere potuerunt ; sed hunc ipsis errorem , utpote ex ignorantia ortum , condonandum puto.

Hi vermiculi a me detecti in admirationem me rapuerunt , quia nullos unquam ejusmodi vermiculos in nucibus myristicis detexeram , idque eo magis , quia hi vermiculi ex florum myristicorum oleo aluntur atque subsistunt , atque nuces myristicæ etiam ex parte ex materia oleosa constant. Quod autem animalcula , quæ in nucibus myristicis cibum suum quærunt , in floribus myristicis non inveniantur , id ex eo fieri existimo , quod animalcula , nuces myristicas perrodentia , atque ex illis viventia , materiam in illis oleosam fugiant , ac solummodo subsistant ex illa nucum materia , quæ nullo plane , aut admodum paucò oleo est permixta.

Detectis his vermiculis in Fig. 4. exhibitis , qui etiam materiam subtilem , intra membranas tenuium ac oblongorum foliorum florum myristicorum exedere sciunt , atque iterum ex illis foliis evadere , nulla membranis illata læsione , præterquam eo in loco ubi primum eas penetraverant ; his , inquam , detectis dubius hæsi , quid de eorum generatione statuumdum mihi esset , idque eo magis quod omnia , quæ videre dabatur , animalcula non solum erant mortua , sed & valde exsiccata ; si autem viva fuissent , nullus dubito , quin eorum generationem investigassem.

Postquam jam per aliquod tempus ab hoc meo scrutinio destitissem , atque interea temporis intentis

quasi oculis intuitus fuisssem hujus vermiculi formationem, & præcipue quidem ejus articulos crenarum in modum excavatos, mihi incidit, ejusmodi animalcula, quotquot mihi cognita erant, non sui similia procreare, sed ea mutationi esse obnoxia, sicuti erucæ, varii vermes, ut & pulices, atque ejusmodi animalcula primo in pupulas mutata, & dein ex illis pupulis in animalcula volatilia aut currentia, tum demum apta esse ad coitum ac ova parienda.

Cum autem inter florum myristicorum membranas hos vermiculos sive animalcula detexissem, mihi persuasi hos vermiculos, ubi mutati fuissent, vel instante eorum mutatione, florum myristicorum folia fuisse derelicturos.

Quoniam vero in posterioribus meis observationibus incideram in vermiculum, quem mutatum tamen adhuc pelliculæ suæ inclusum mihi persuaseram, sive esse vermiculum in pupulam mutatum, tertio adii Cameram Societatis Indicæ, & magnam copiam florum myristicorum (quos albos dicunt) cribro injici curavi, atque in eo cribari, ratus inter materiam subtiliorem, quæ ex cribro excideret, multa animalcula mutata repertum iri.

Atque hoc pacto duos quidem manipulos accepi materiæ, multis minutis florum myristicorum particulis mixtæ; observavi autem pleramque hanc materiam subtilem constare ex animalculorum excrementis.

Adhæc manipulum sumsi materiæ, quæ per cribrum ceciderat, antequam Aromatum lectores flores myristicos albos ab aliis separassent.

Domum redux factus utramque hanc materiam, quæ per cribrum ceciderat, observavi, & centum quidem animalcula in ea inveni, quæ ex vermiculis illis per mutationem orta esse mihi persuasi.

Duo etiam repperi animalcula volatilia, qualia inter nuces myristicas antea observaveram.

Atque etiam duas pelliculas, quas ab illis vermiculis relictas mihi persuasi, ubi in pupulas mutarentur.

Præterea vidi animalculum, quod curculionem (*Kalander*) vocant, sed, ut reliqua alia, mortuum.

Omnia illa animalcula, quæ per mutationem ex illis vermiculis orta esse pro certo jam habebam, eodem modo erant formata, & præterea ejusdem fere molis, nec multum mole differebant ab adultis vermiculis; si enim omnia hæc animalcula non ex eodem vermiculorum genere essent orta, utique variæ fuissent molis.

Quemadmodum autem erucæ, vermes &c: ubi in animalcula volatilia mutata sunt, omnes illos crenarum in morem excavatos articulos servare solent, qui in ipsis erucis, vermibus &c: fuerant, ita etiam in mutatis his animalculis crenæ illæ dignosci poterant; sed non antequam duo illi clypeoli, quibus pars corporis eorum postica tecta erat, forent sublati; sub his clypeolis complicatæ jacent duæ tenuissimæ alæ, atque ob longitudinem suam duplicatæ; adeo ut vero simile mihi videatur hæc animalcula instructa esse crenis illis quæ in scarabæis circa clypeos, alas &c: conspiciuntur.

Hæc autem animalcula, quamvis in volatilia jam

mutata, tamen cibus uti solita, contra quam in animalculis volatilibus, quæ ex bombycibus aliisve vermibus oriuntur, contingere videmus, ex eo constare existimo, quod aliquot viderim animalcula coloris flammei, alia vero coloris magis sanguinei; priora hæc animalcula haud ita diu mutata fuisse mihi persuasi, eaque idcirco non multum adhuc cibi consumpsisse.

Aliquoties etiam cogitavi horum forte vermiculorum atque animalculorum usitatum in ligno esse alimentum; at ubi in flores myristicos incidunt, qui ratione ligni admodum sunt molles, cumque in iis subsistere queant, eos majori copia in floribus illis myristicis progenerari, ac alias in ligno, & quidem paulo duriori, fieret.

Postquam igitur mutata illa animalcula microscopio opposuisssem, atque clypeolos illos aliquantulum sejunxissem, æque ac si animalculum se ad volandum præpararet, tam mirandum, tantaque arte confectum mihi apparebat opus, ut id etiam delineandum curare proposuerim, licet omnia miracula, quæ in exiguo illa animalculo inveniuntur, prosequi non potuerit pictor.

Fig. 5. A. A B C D E F G H I K L exhibetur animalculum, quod aliquanto quidem longius mihi apparebat vermiculo illo ex quo ortum erat, sed id inde tantum factum mihi persuasi, quod vermiculi, quum mollissimo sint corpore, liquore ex corpore exhalato, contrahantur, cum e contrario animalculorum volatilium, quæ ex illis oriuntur, corpora exteriora sint dura, atque adeo contrahi non queant.

L M

LM & BN sunt duo cornua, quæ ex variis constant articulis, atque pilis obsita sunt.

LB sunt oculi, qui variis instructi sunt organis opticis, at admodum paucis ratione oculorum muscarum.

Hoc animalculum etiam instructum est sex pedibus, quorum extremitates binis nitidissimis armatæ sunt unguiculis; & habent pedum extremitates varios articulos, obsitos multis pilis, seu potius particulis (ut ita dicam) rhamnosis. Duo ejusmodi pedes, eorumque unguiculi in CO & DP exhibentur.

In DE & KI delineati quoque sunt duo clypeoli, quibus animalculum, ubi a volatu quiescit, corporis posticam partem ita tegit, ut mihi persuadeam, nullas ligni particulas, aut florum myristicorum, nec etiam partes aqueas corpori eorum incidentes, alis nocere posse.

His clypeolis attente consideratis, obstupui ad mirandum illud, tantaque arte elaboratum opificium, quod tam parvum nudo oculo apparet, quodque perfectione multum superare censeo majus quodvis animal, quod cernere quotidie datur.

Si attenderimus ad partem corporis posticam, quæ etiam ex articulis, crenarum in modum excavatis, constabat, quales etiam videri possunt in parte corporis postica vermiculi, ex quo hoc animalculum per mutationem ortum antea diximus; atque etiam ad multiplices illas venas, partem illam corporis percurrentes, stupendum est iterum iterumque ad tantam tam exigui animalculi perfectionem.

Si oculos figamus in alas, per eas varia percurrunt

vasa ac nervi, qui alis expandendis inserviunt, præter varias partes cuspidibus eminentes, quibus alarum membranæ oblitæ sunt; adhæc considerare juvat quam nitide hæ alæ, tam juxta longitudinem, quam latitudinem suam sint complicatæ (quod inter G & H exhibetur, in quantum id a pictore delineari potuit) ut undique a clypeolis tegi queant; præter has hoc animalculum minutissima adhuc alia instructum est ala. Nec injucundum est meminisse quot & quam subtilibus nervis ejusmodi ala, quæ in extremitate sua tripliciter est complicata, sit instructa, quam animalculum volaturum tam in longitudinem quam latitudinem expandit, & quorum nervorum ope ea expansis alis conciliatur rigiditas, ut animalculum earum motu per aerem ferri queat.

Ut eo accuratior complicatæ hujusmodi alæ possit formari conceptus, aliquot alas clypeolis subtraxi, easque microscopio opposui, atque unam ex iis, cui pars nervi, a quo alæ motus ejusque expansio dependebat, erat annexa, delineandam tradidi.

Fig. 5. B. Q S T V W X Y repræsentatur ala, ita ut sub clypeolo latuit, cujus pars circa V, ubi ala latissima est, alteri alæ supposita vel imposita est.

In Q R exhibetur pars nervosa, cujus ope non modo ala movetur, sed & a qua sine dubio multi minores dependent nervi, & cujus ope pars alæ complicata W X Y in longitudinem, atque pars Q R in latitudinem expanditur.

In S T videre est exiguam illam alam supra memoratam.

Perfectissimum hoc opificium considerantes, fateri
ite.

Fig: 6.




Fig: 7.




Fig: 8. *Int. d. uijt* F. 2




Fig: 9.




Fig: 10.




Fig: 11.





Fig: 12.



iterum oportet, ea quæ ope microscopiorum nostrorum, atque industria nostra detegimus, non esse nisi umbram earum rerum quæ adhuc in occulto latent, non solum in exiguis ejusmodi animalculis, sed & in majoribus animalibus, ac plantis.

Speramus ergo naturæ indagatores omnem in posterum in id impensuros operam, ut ea, quæ adhuc in ejus sinu occulta latent, ulterius in propatulo ponant, atque ita in hominibus, veritatis lumine illustratis, antiquorum errorum ingenerent fastidium, quod omnium veritatem amantium studium esse decet. Non enim hujus universi Dominum atque Opificem melius nos glorificare posse censeo, quam si summam ejus Perfectionem atque Sapientiam, in omnibus rebus, quantumvis nudo oculo exiguis, modo vitam ac incrementum nactis, elucentes, admiremur semper atque celebrémus.

Visum quoque fuit aliquot florum myristicorum, ex parte etiam alborum, folia delineanda tradere.

Fig. 6. A B K C D E exhibetur pars ejusmodi folii, ubi circa E F G & H conspici possunt folii striæ, quæ admodum levi manu sunt delineatæ, atque albæ videntur; hæ autem partes flores dicuntur albi, atque ex illis materia oleosa est consumpta, & nil præter membranas remansit. Si autem verum esset, hanc albedinem ortam esse ex eo, quod flores non satis excreverint, tum necessario folii extremitates, quæ in D aut C videntur, quoque essent albæ, at jam e contrario coloris erant plane rubicundi, atque saporis satis boni, idque quia vermiculi materiam

N

oleo-

oleosam non ulterius intra membranas consumserant, quam folia alba apparebant.

Inter G & H infra videtur foramen in folii membrana excavatum, quod vermiculum perforasse mihi persuadeo, ut folium penetraret, idque eo magis, quod tenues membranæ partium illarum striatarum, supra memoratarum, plane essent integræ, nec ullum appareret foramen, nisi infra inter A & B.

Si attendamus ad angustam illam ac albam cavitatem, quæ circa I est exesa, facile ex ea colligere possumus minutissimum fuisse vermiculum, qui in meatu tam arcto sese invertere, atque alimentum ex eo petere potuit; quod vero intra has membranas detexi nil fuit præter animalculi excrementa.

Quum ante aliquod tempus in eo essem, ut recentem in nuce myristica investigarem plantam, simul etiam de tegere conatus fui quopacto nux myristica, cortici suo inclusa, alimentum suum ex arbore accipiat. Hunc in finem sumsi nucem myristicam, saccharo conditam, cujus anatomen institui, sed quoniam syrupus durum nucis corticem, ejusve aperturam, penetraverat, atque in ipsa nuce iterum saccharum coagulatum erat, hoc meum scrutinium mihi inutile fuit.

Dum in flores myristicos albos inquirerem, Aromaticum lectores mihi sex octove exhibuerunt nuces myristicas, inter flores myristicos ab iis repertas, quæ cortici suo, atque etiam floribus, involutæ nuce avellana non multo erant majores, ut & duas alias majores; has ego libenter ab iis accepi.

Ubi nuces has paulo accuratius intuerer, vidi membranam, quæ corticem durum, cui nux inclusa est, tegit,

tegit, sub foliis florum myristicorum aliquot in locis esse perforatam, cum tamen flores myristici illis in locis nullo modo essent læsi, atque hinc ego cogitavi hanc forte perforationem esse factam ab illis vermiculis, sive animalculis, quæ antea consumere dixi nucum myristicarum partes minime oleosas, quæque floribus myristicis, aut materia nucum oleosa, vesci non possunt.

Microscopii deinde ope contemplatus sum flores myristicos, ita ut nucem myristicam tegebant, atque etiam ubi eas ab duro earum cortice avulsissem, & vidi flores myristicos, atque etiam membranam, corticem illum tegentem, obsitam esse multis corporibus exsiccatis eorum animalculorum, quæ acaros (*Myten*) dicimus. Verum, quantumvis accurate attenderem, nullum ejusmodi acarum vivum detexi; quoniam autem eo tempore quo nucs myristicas observavi, etiam animadverti acaros florum myristicorum exhalationes fugere, cogitavi florum forte myristicorum sarcinas, quas *Sukkels* vocant (quæ foliis arboris Indicæ [*Cocos-boom* dictæ] primo involutæ, dein adhuc arundine Indica, *rotting* teguntur) in navi fuisse locatas prope locum in quo panes servantur, atque hos acaros ex illo loco per errorem in flores myristicos incidisse, & sic enecatos esse.

Ut hujus rei certior redderer, rogavi quo in loco hæ florum myristicorum sarcinæ in navi locatæ fuissent, ad quod mihi responderunt eas jam locatas fuisse in loco ubi panes recondi solent; at alioquin eas in eodem cum pipere loco reponi solere; hinc jam non

mirum mihi visum fuit flores illos myristicos, has nuces tegentes, tot acaris mortuis esse obsitos; hos enim acaros mihi persuadeo eo tempore, quo is locus panibus est repletus, incredibili numero procreari, qui tamen omnes emoriuntur ubi eo in loco nuces floresve myristici collocantur.

Ubi nuces myristicas floribus suis involutas intuerer, in variis vidi illic loci, ubi flores, nucis cortex, atque ipsa etiam nux alimentum suum atque incrementum ex arbore accipiunt, illic, inquam, loci flores quidem myristicos aliquantulum esse perforatos, cum alioquin plane essent illæsi, atque illic non solum membranam, quæ nucis corticem tegit, sed & ipsum corticem illic molliorem, ita esse perforatum, ut rotundum in eo foramen, ipsam nucem penetrans, appareret; atque etiam ex altera ex duabus nucibus, in quibus ejusmodi foramina mihi apparebant, eximi animalculum volatile mortuum, qualia plura antea in nucibus myristicis detexeram. Dein corticem durum, cui nux myristica inclusa erat, atque in quo rotundum foramen erat excavatum, ferra dissecui, & tum vidi idem foramen intra nucem penetrasse, quando etiam nucem diffidi, ac vidi omnem materiam albicantem, cui parum olei intermixtum est, esse ex nuce consumtam, cavitatemque exesam non repletam nisi excrementis paulo longioribus quam crassis, ac multis sibi mutuo annexis ope telæ, quam vermiculus, ut opinor, subinde, ubi locum suum mutaret, confecerat. Quoniam autem nullam vel minimam partem pelliculæ exutæ in nuce inveni, mihi persuasi, materiam illam albam, qua sola

ver-

vermiculus vesci solitus fuit, non suffecisse ad vermiculum usque adeo alendum, ut plane adultus foret, atque idcirco eum coactum fuisse ex nuce illa migrare, ut alibi ulterius alimentum suum quæreretur.

Mirum vero mihi visum fuit illa animalcula corticem illum durum perforare, atque eum in finem hanc corticis eligere scire partem, quæ cæteris mollior esset: nec semel bisve id videre contigit, sed in decem quidem nucibus myristicis idem animadverti.

Fig. 7. L M N exhibetur nux myristica, cortici suo adhuc inclusa, & floribus involuta, sic ut in Indiis cortex viridis ab ea fuit exemptus. Cortex vero ille durus, atque eum ambientes flores myristici alimentum & incrementum suum acceperunt inter L & M, ubi locus est, in quo nux arbori fuit affixa; antea autem mihi persuaseram nuces myristicas incrementum suum ope corticis illius duri accipere, quod in juglandibus fieri observaveram; ubi vero corticem floribus exueram; atque ipsum durum illum corticem in variis nucibus attento oculo intuitus eram, quin etiam varios cortices subtili ferra dissecueram, comperi me opinione mea falsum fuisse, tunc enim vidi in ea nucis parte, quæ circa L M Fig. 7. apparet, nil posse detegi, quod acceptum illic alimentum indicaret.

At quando accuratius attendebam ad locum ubi cortex ille durus incrementum suum acceperat, statim duo distincta vidi loca, prope sibi mutuo adjacentia, alterum quidem ad alendum corticem, alterum vero, ut mihi persuasi, ad alendam ipsam nucem; hæc dum investigarem animadverti ilico vasa, quæ nuci

alendæ inservirent , non statim corticem ipsum aut inter ejus partes penetrare , quod in nucibus avelanis , amygdalis , malis Persicis & Armeniis , aliisque seminibus , observaveram , sed vasa illa alimentum adferentia in Fig. 7. tendere ab M ad partem acutam N , eaque prope N ipsum corticem durum penetrare ; horum igitur ope tota nux myristica alitur , quoniam nux nulla alia in parte cortici est conjuncta.

Ut autem vasa illa nuci alimentum suum adferentia eo clarius ob oculos ponerem , corticem illum durum , intra quem nux myristica alitur , floribus myristicis eum cingentibus exutum , etiam delineandum curavi , cum primo ligulam , per quam alimentum advehitur , ab ipso cortice separassem , excepto quod eam illic loci , ubi intra corticem penetrat , aliqua sui parte cortici affixam reliquerim , ut eo facilius exhibere possem eam partem , cujus ope nux incrementum suum accipit.

Fig. 8. O P Q exhibetur ille cortex , cui nux myristica inclusa fuit , in Q vero & R repræsentatur ligula , constans ex multiplicibus vasis nuci alimentum suum advehentibus.

In O & Q videre est crenam , in qua ligula QR jacuit , antequam eam ex membrana , quæ ligulam ac totum simul corticem cingit , eximerem ; nec solum hæc ligula crenam , sive cavitatem quandam , in membrana efficere videbatur , sed & in ipso cortice ejusmodi cavitas supererat.

Atque ita jam iterum dicere ausim , quemadmodum animalia in utero materno ope ligulæ aluntur , ita etiam multa semina ope ligulæ incrementum ac
ali.

alimentum suum accipere ; unde etiam denuo nobis apparet , Almam Providamque Matrem Naturam multa uno eodemque operari modo.

Nec me latet hoc meum assertum contrarium esse opinioni quorundam , statuentium animalia intra uterum maternum plurimum alimenti per os suum accipere ; idque eam ob causam , quod facili negotio , ac sine multa aut ulla fere sanguinis fusione , ligulas , quibus animalia in utero sunt ligata , ab iis separare queant ; sed eos meminisse velim , quam facile poma , ut mala ac pira , ubi ad maturitatem pervenerunt , ab arboribus separentur , adeo ut nulla vasorum , quæ alimentum attulerunt , læsio animadverti possit.

Sed redeamus ad ligulam Fig. 8. in Q R exhibitam , hanc , ut ulterius mihi satisfaceret , in tenues dissecui particulas , quarum quasdam microscopiis opposui , ut mihi hoc pacto magna vasorum copia tanto melius appareret ; has particulas , ac apparentia in iis vasa delineari etiam curavi , quatenus pictor ea videre & prosequi potuit.

Fig. 9. A B C D E videre est particulam ejus ligulæ , per quam , ut antea dixi , nux myristica incrementum suum accepit ; omnia autem hæc in ea apparentia vasa oblique sunt discissa.

Si jam attente contemplemur incredibilem vasorum in tam tenui ligula numerum , præter illa quæ oculorum aciem effugiunt (quam enim in Q R exhibuimus partem , ea duplo quidem crassior est ipsa ligula , quia ligula ab membrana eam tegente non est separata , ne quædam in ligula vasa læderentur) ad hoc utique spectaculum dicere ac statuere oportebit , nullum in
tota

tota arbore myristica esse vasculum, cujuscunque etiam sit efficaciam, quin ea ligula eodem etiam sit instructa, quod si aliter se haberet, ligula illa recenti plantæ, intra nucem myristicam latenti, omnia vasa quæ ad arborem ac fructus requiruntur, communicare non posset.

Tandem, ut verbo dicam, omnes illæ perfectiones, quæ in omnium plantarum ligulis, ac consequenter in omnibus feminibus latent, nobis sunt incomprehensibiles, adeoque imperscrutabiles.

Porro corticem nucis myristicæ, in duas partes disruptum, delineandum etiam tradidi, postquam antea illic loci, ubi ligula, supra memorata, corticem penetrat, aciculam per corticem ingesseram, ut sic adhuc liquidius exhiberi posset ligulæ penetratio.

Fig. 10. S T V exhibetur media circiter corticis illius pars, atque in W X repræsentatur acicula, quæ locum ubi ligula corticem penetrat, perforavit.

In eadem figura circa Y videre est partem quandam protuberantem in corticis cavitate, supra quam acicula exit; si autem attendamus ad nucem ipsam myristicam, in ea spectare licebit, eo loco ubi hæc pars protuberans jacuit, puteolum quendam, sive aperturam, atque supra hanc aperturam locum, ubi ligula nuci fuit affixa, hæc autem passim ab nucibus abrumpuntur, quia nucs myristicæ præ ariditate, ac succorum ex iis exhalatione, multum contrahuntur, cum e contrario cortex ille durus nucem cingens parum aut nihil contrahatur, hinc vero fit, ut nux, tum quia jam non tam arcte cortici est inclusa, tum ob gravitatem suam, ac motum ei inditum, ab ligula
sepa-

separetur, atque, ubi agitur intra corticem, aliquem sonum edat.

Mediam quoque corticis duri partem, ea parte, qua arbori arbori fuit conjuncta, exhibui, atque ita delineandam tradidi, uti hic in Fig. 11. F G H. conspicitur; idque ut ostenderem locum in quo animalculum corticem illum durum perforare potuit: hic autem locus in hac Fig. 11. in K. repræsentatur, ubi videtur rotundum foramen, cui animalculum anteriore corporis sui parte infixum erat, ubi illud ex eo eximebam; ea vero pars, per quam cortex ille durus alimentum suum accepit, quæque arbori fuit conjuncta, inter rotundum illud foramen & I. exhibetur, atque ligula, quæ nucis myristicæ incremento inservit, quæque etiam arbori fuit conjuncta, inter K & L conspicua est.

Nuce myristica cortici illi duro exempta, animadverti eo loco, ubi cortex erat perforatus, ipsam quoque nucem aliquo usque esse penetratam; unde mihi persuasi, animalculum, foramine non satis magno in cortice excavato, corporis tantum parte anteriore in in eum se ingessisse, atque ideo exiguum tantum in nuce excavare potuisse foramen; idque tam arcte intra nucis corticem, parte corporis anteriore, fuisse compressum, ut nec antrorsum, nec retrorsum se movere potuerit, atque ideo intra foramen illud a se factum extinctum esse.

Animalculum hoc quoque erat volatile, cujus alæ sub clypeolis tectæ ac complicatæ jacebant.

Fig. 12. M N O repræsentatur nobis nux myristica, in quâ exiguum illud foramen, in parte illa ro-

O

tun-

tunda, quæ inter P & Q spectari potest, excavatum apparet; hic etiam locus est cui recens nucis planta inclusa latet, ubi quoque, quantum mihi observare licuit, passim animalcula nuces penetrant, quod ea pars nucis sit mollissima, & cæteris oleo minus instructa.

Quum jam videamus, non solum hos vermiculos ad adultam usque ætatem alimentum suum ex nucibus petere, sed & eos, in animalcula volatilia mutatos, etiam nucum partibus minime oleosis vesci solere, facile ex illis colligere possumus, hæc animalcula, quantumvis exigua, nucibus valde esse perniciofa.

Si observemus animalcula hæc volatilia, quorum alæ clypeolis tectæ sunt, & quæ alimentum suum quærere debent ex materia dura, quam penetrare necesse habent; ut etiam ad animalcula illa volatilia quæ ex terra prodeunt; dicendum nobis erit, hæc animalcula necessario alas suas habere complicatas & clypeolis tectas: si enim alæ posticis corporum partibus non forent longiores, eæ ad volandum mole non sufficerent; dein si alæ clypeolis non forent tectæ, ubi animalcula ex terra prodeunt, vel in terram penetrant, vel alia, ubi materiam quandam duram (ut ligna, nuces, & id genus alia) perforant, sequê ei insinuant, tum hoc pacto eorum alæ eo modo læderentur, atque implicarentur, ut eæ fierent haud idoneæ animalculis per aerem ferendis.

Porro etiam pro certo habemus animalculum illud volatile album, quod antea in floribus myristicis detexisse me dixi, non esse aptum per se, ad floribus
my-

myristicis aliqua rosione nocendum, atque cum tantum in finem vivere ac volitare, ad ova sua post coitum deponenda; ast vermiculos ex ovis illis ortos floribus myristicis esse perniciosissimos, quod illi admodum magni fiant, præ minutissimis illis vermiculis supra memoratis. Nullus etiam dubito quin in tabulatis, in quibus flores myristici servantur, multa ex albis illis animalculis volatilibus, mole fere æqualibus illis, quæ in granariis nostris volitantia videntur & ex quorum ovis noxius ille prodit vermiculus, quem *de Wolf* Nostrates vocant, volitantia conspici possent.

Præterea mihi persuadeo, si ligna in tabulatis & granariis pingerentur colore illo rubro, quo apud nos vulgo uti solent, hoc pacto multa posse arceri animalcula aromatibus noxia, idque eam ob causam, quod materia ex qua pigmentum illud rubrum conficitur, licet minutissime molæ ope contrita, partes habeat adeo duras, ut nullus vermis, nec is quidem qui semper in lignis vivit, & præsertim quidem exiguus, eas perforare queat. Si autem jam multa in ligno excavata essent foramina, antequam color ei obduceretur, tamdiu ac toties pingendum censeo lignum, donec foramina illa pigmento forent repleta.

Objecerunt mihi, fateor, nuces floresque myristicos exiguo tantum tempore in tabulatis reponi, atque ideo vermiculos in illis ipsis parum noxæ inferre posse; sed etiamsi flores myristici paucis tantum diebus in tabulatis forent repositi, tamen illi ab insectis volatilibus, dum ad exsiccandum sunt expositi, pos-

sunt infici, dum illa ova sua ipsis imponere queunt, ad quam rem non multi requiruntur dies, quod notum sit, multa animalcula ova sua exiguo temporis spatio magno numero ponere solere; atque hoc quidem vero simillimum mihi videtur, quia postea accepimus omnes florum myristicorum sarcinas, (sed alias aliis plus minusve) continere flores illos myristicos albos.

Quod si infecta illa solummodo in tabulatis, in quibus flores myristici, magna copia sibi mutuo impositi, servantur, ova sua ponerent, tum fore mihi persuadeo, ut flores myristici, qui in medio fuerant, parum vel nullo modo forent læsi, quia animalcula ova sua deponentia non intra florum myristicorum acervum penetrarent, sed ea solummodo supremis florum foliis imponderent, atque ita flores intermedi, ubi in sarcinas colligerentur, forent illæsi.

Sed hæc tantum ænigmata nobis sunt, de quibus illi, qui florum myristicorum arefactioni & collectioni adesse solent, melius ratiocinari possent, si forte ad ea attenderent.

Jam antea videram animalcula illa, quæ acaros vocant, non ferre exhalationes florum myristicorum; sed ut plane ejus rei certus redderem, jam de novo sumsi tubum vitreum calamo cygneo paulo crassiore, cujus alteram extremitatem subere obturavi, ac tum ei tubo indidi aliquot centenos acaros, dein alteram extremitatem obturavi folio floris myristici, sed non tam arcte, quin acari juxta illud folium ex vitro evadere possent; ac paulo post tempore vidi aliquot acaros floris myristici folio proximos lente
ad-

admodum procurentes, ac postquam per horæ spatium in vitro fuissent aliquot jam esse mortuos, atque alios parum tantum pedes suos movere; cumque jam circiter 24. horas fuissent occlusi, vidi paucos tantum a floris myristici folio remotissimos pedes suos lente admodum motitantes; cæteri vero acari mortui erant. Sed quando alio tempore exiguum tantum floris myristici partem in tubi vitrei extremitate locarem, vidi acaros multos superstites manere, licet quatuordecim quidem diebus in eo degissent. Sed hisce finio, &c.

Dabam Delphis Batavorum,
VIII. Idus Martias 1696.

O 3

Epistola

Epistola 100.

Data ad Nobilissimum & Amplissimum Virum,

DOMINUM

NICOLAUM WITSEN,

*Consulem Urbis Amstelædamensis
Primarium, &c. &c.*

In qua de

Metallo quod in media Tartaria effoditur. Ubi id liquefit, æris prodeunt bullæ, atque etiam plumbum. De spiritu qui ignis vi ab eo metallo depellitur. De particulis salinis in eo spiritu. De metallo, quæ in insula Sumatra effoditur, & exiguis auri argentique particulis in eo. In lapidum cavitatibus aurum argentumve non invenitur. De metallo, quod ex America advehitur, & argento plurimo est imprægnatum. Argentum atque aurum jam ab initio intra lapides duos hæsit; principio rerum argentum lapidibus cessit, lapides

lapides argento. Quomodo metalla per vapores sursum elatos augeri possint. Que figura fuerit auro & argento magna copia terræ nigræ permixtis. Formicæ ineptæ sunt ad conficiendam resinam, seu ceram Hispanicam, belg: Lak, sed ex ea aluntur. Formicæ non mordent, sed aculeo pungunt, atque ad punctum aliquantum liquoris cuti ingerunt, &c.

Illustri Viro,

D^o. NICOLAO WITSEN &c.

ANTONIUS a LEEUWENHOEK. S. D.



Letteras tuas, Vir Illustris, mihi gratissimas accepi, ac simul etiam metallum, cui plumbum, argentum atque aurum inesse fertur, quodque circa magni fluminis Amur ostia, prope urbem Mersenskoy, in media Tartaria effoditur, quem locum in accuratissima, a Te confecta, mappa Geographica, qua totum Tibi Orbem Eruditum maxime devinxisti, exhibitam facile inveni; interim me, tam ob donatam illam mappam, quam missum hoc metallum, magnopere Tibi obstrictum lubens profiteor.

Diffisso hoc metallo & microscopii ope observato, censui multum ei inesse Antimonii, atque nudo illud oculo intuitus, putavi ob colorem rubiginosum ei inesse ferrum; attamen nil, vel parum tantum Antimonii

timonii detegere potui ; ac multo minus aliquam materiam ferream in eo vidi.

Ubi autem hoc metallum vehementi admoverem igni , statim non sine admiratione vidi illud liquefieri , atque in liquefactione magnam prodire bullarum aërearum copiam , non aliter quam si nobis videre nos imaginaremur sputum quoddam tenax ferro candenti injici ; simul etiam aliquot particulæ plumbeæ liquefiebant ac coagulabantur , quas frigefactas cultello diffecui ; atque ubi eas microscopio observarem nullas nisi plumbeas particulas detexi.

Quædam etiam particulæ vitreæ tum coagulabantur.

Porro aliquam metalli copiam indidi vitro (quod *retort* vocare solent) cui nullus unquam liquor aut materia arida infuerat , illudque vitrum tam vehementi admovi igni ut ipsum vitrum liquefcere inciperet , quo , si pote , detegerem , quænam partes ignis ope ab illo metallo depellerentur.

Hoc dum fieret vidi partes vitreas , quæ ex hoc metallo prodibant , cum vitro , cui metallum inerat , conjungi , quod mirabar , quum ignis non esset vehementior , quam ut vitrum vix liquefcere inciperet.

Animadverti quoque ignis vi ab eo metallo depelli aquam quandam limpidissimam , sive spiritum. In hoc liquore particulas aliquot salinas coagulari vidi , postquam liquor per aliquot horas steterat.

Denuo aliud ejusmodi vitrum sumsi , ut majorem spiritus , ab illo metallo depellendi , copiam colligerem , atque ad particulas salinas ex eo provenientes accurate attenderem.

Spiritum

Spiritum hunc ex metallo expulsum sub vesperam imposui vitro cuidam puro & plano, atque in musæo meo deposui, ac postridie vidi omnem fere liquorem esse exhalatum, atque particulas ex eo salinas pleraque tam irregulariter esse coagulatas, ac si tempore hyberno vapores liquidos, qui tunc intra domos vitris adhærere solent, congelatos videremus, adeo ut paucis tantum in locis aliquot particularum figuras accurate dignoscere possem.

In coagulatas has particulas salinas octo, decemve continuis vicibus, halitum meum exspiravi, cujus calore sal coagulatum magna ex parte iterum in liquorem aqueum convertebatur; quam primum vero id exsecutus essem, liquorem illum microscopio admovi, atque oculorum aciem in eum converti, vidi-que eum brevi iterum exhalari, ac denuo particulas salinas in eo coagulari, inter quas multæ erant figuræ accurate quadratæ, ut A B & C * quæ omnes angulos rectos habebant; sed non diu accuratam hanc servabant figuram, quia tales etiam figuræ in, & juxta præcedentes illas particulas salinas minores, formabantur.

Dein figuras etiam salinas vidi quadrilateras, quæ angulos rectos non habebant, quæque in D exhibentur, sed hæ paucæ erant numero.

Plurimas etiam minutissimas particulas jacentes vidi in ea vitri parte, ubi tantillum illius spiritus jacuerat, ut vix vitrum tegeret; quoniam vero earum particularum figuram ope illius microscopii, quo tunc utebar, accurate detegere non poteram, sum

P

fi

* Vide sequentem tabulam æneam.

si microscopium magis augens, & tum vidi illas particulas, quæ aliæ alias mole aliquantulum superabant, figuras quoque habere quadratas; ex quo mihi persuasi exiguas illas particulas etiam eodem modo esse formatas, quod si ita esset, illæ particulae adeo essent exiguae, ut mille earum myriades simul sumtæ crassum arenæ granulum mole non æquarent.

Sæpe etiam microscopii ope observavi metallum, quod in insula Sumatra effoditur, quodque non nisi aurum argentumve continet, atque etiam animadverti ignis ope ab eo depelli spiritum limpidum, particulis quoque salinis permixtum; simile etiam vidi in metallo ex America oriundo, & multo argento gravi, sed de eo nil in chartis notare visum est.

Sæpe rogatus fui, quid de metallis in fodinis latentibus judicarem, num illa indies accrescant, quod multis placet.

Ad hanc quæstionem raro respondere volui; quum enim sæpe metalla, quæ durissima sunt, ac plerumque in durissimis latent lapidibus, quorum magna potitus fui copia, in lapidibus diffisis, ut microscopii ope aurum ac argentum in iis detegerem, observarem; passim comperi aurum argentumque tam minutis particulis per lapides esse sparsa, & a se mutuo dissipata, ac si aliquot arenulas in mensa quadam sparsas videremus; neque etiam auri argentine particulae majores mihi microscopii ope apparuerunt, quam vulgares arenulae nudis apparent oculis.

Contigit etiam aliquando, ut in lapide tam duro mihi appareret cavitas quædam, in qua nullas vel minimas metalli particulas detegere possem; at videbam aliquot

aliquot particulas Crystallinas in ea coagulatas, quamvis singulæ particulæ non majores essent crasso arenæ granulo; atque hæ microscopii ope visæ non aliter apparebant, quam si nudo oculo videremus partes aliquot Crystalli ex monte excisas, ac sibi mutuo contiguas, in quibus aliquot latera ac cuspides emerent, quæ aliæ alias mole superabant; quod haud injucundum mihi præbuit spectaculum.

Atque etiam in lapidibus incidi aliquando in loca molliora, sed quoniam nec in cavitatibus, nec in partibus lapidum mollioribus, ullas vel minimas auri argenteive particulas detegere potui; mihi persuasi, auri atque argenti particulas, non sensim per vapores subterraneos in lapides hos esse sublatas, atque in iis coagulatas, istas vero jam in rerum principio intra eos fuisse formatas.

Si autem præterea metallum argento ditissimum, quod ex America huc ad fertur inter res visu dignas, contemplemur quando diffusum est, atque animadvertamus quot ac quantæ partes argenteæ in lapidibus illis duris sibi mutuo adjaceant, præter magnam copiam minutissimarum particularum argentearum, quæ præ exiguitate sua oculorum, microscopiis non armatorum, aciem effugiunt, quæque dimidiam quidem lapidis partem constituere nobis videntur; atque adhæc perpendamus lapides adeo duros minime esse disruptos, sed plane integros; iterum concludere oportebit, argentum jam ab initio his lapidibus infuisse: quis enim concipere potest metalla tanta copia duras lapidum partes posse penetrare, adeo ut ipsi lapides illæsi mancant?

Mihi certe persuasi, si tot metallorum partes intra lapides duros intrudi possent, quot jam iis inesse videmus, tum tales lapides plane in partes infractum iri.

In variis etiam lapidibus tantas vidi partes aureas, ut majusculas æquarent arenulas, imo etiam majores, nec tamen juxta illas, etiam microscopii ope, ullas alias partes aureas, earumve vestigia aut signa detegere potui; adeo ut fere mihi persuaserim ejusmodi partes aureas ope humana in illos lapides intrusas; sed ubi lapides ulterius diffinderem, in iis alias iterum vidi ejusmodi particulas aureas, unde rursus pro certo habui eas partes aureas jam ab initio rerum illis lapidibus infuisse.

Ubi maximas argenti particulas, ex metallo illo ditissimo, quod in America effoditur, microscopio opponerem, atque attente intuerer, videremque aliquot instructas esse ramulis, ac quasi foliis, atque alias habere cuspides spinarum in modum eminentes, ac singulas argenti particulas singulari modo esse formatas, concludere necesse habui, in principio, ubi hæ lapidum partes componerentur, multas variæ molis particulas argenteas iis fuisse permixtas, cumque lapidum partes eo tempore aliquanto rigidiores forent partibus argenteis, hinc posteriores ita ab aliis esse pressas, ut tales & tam varias nactæ sint figuras, quales nunc nobis videre datur. Cum præterea contemplaremur partes lapidum, quibus partes argenteæ exemptæ erant, videre licebat figuram, quam partes argenteæ nactæ erant, etiam lapidi esse impressam; mihi autem incredibile videtur in particulis fursum
latis

latis eas posse esse vires , ut lapidibus suam figuram imprimere queant.

Quod si cogitemus eo tempore , quo partes argenteæ ac lapideæ fuere compositæ , partes lapideas quoque fuisse flexiles , facile percipiemus , partes lapideas etiam potuisse cedere particulis argenteis.

Non tamen inficias ire volo passim una cum vaporibus quædam sursum ferri metalla , quæ , ubi motus eorum imminuitur , inter partes lapideas terreasve coagulentur ; quia notum est , si aquæ forti misceatur argentum , atque ope ignis vehementis aqua fortis ab illo argento depellatur , tum aquam illam fortem aliquot sursum ferre particulas argenteas , quæ , ubi agitatio aliquantum cessavit , iterum coagulantur. Sed illa metalla , quæ inter vapores subterraneos sursum feruntur , non minutis particulis per duros lapides sparsa reperientur , sed hæc venarum in modum lapides transibunt , quia mihi persuadeo , in omnibus montibus lapideis , vapores sursum latos in unum locum multo facilius posse penetrare , quam in alia , idque quia lapides non omni loco æque duri sunt.

Potitus aliquando fui aliquot libris metalli , quod nudo oculo nigram referebat terram , sed quod tamen ditissimum erat auri ac argenti. Ex hac terra metallica aliquot partes microscopio opposui , quæ constabant ex particulis aureis argenteisque , & mole arenulas æquabant : harum quædam sex habebant latera , & angulos adeo accuratos , lateraque tam lævia , ac si polita fuissent ; alia quidem latera introrsum ac extrorsum erant inflexa , sed tamen adeo lævia , ut ne vitrum quidem magis politum sit.

Cum autem ejusmodi metallorum partes in terra adeo fragili inveniuntur, majori, ut opinor, ratione asserere licebit, ubi vapores metalla secum ferentes occurrunt partibus metallorum majoribus; tum illas partes, quas vapores sursum ferunt, majoribus illis coagulari, atque ita illa augeri; quam statuere metalla in durissimis ac firmissimis lapidibus accrescere posse.

En Tibi, Vir Illustris, levidenses meas detectiones & cogitata circa metalla, ad quæ aperienda jam ante multos annos rogatus fui; parum autem de iis dicere potui, quia in iis tractandis multa mihi stupenda obvenerunt, quorum rationem investigare non potui.

Maximas etiam, Vir Illustris, Tibi habeo gratias pro communicatione scriptorum, quæ nuperis ex India Orientali reversis navibus ad te missa tuere, circa animalcula, quæ refinam (nobis vulgo *Lak*) seu ceram Hispanicam, & mel conficiant.

Mirandum mihi videtur formicas in ramulis arboris Korindæ conficere ceram illam Hispanicam. Atque ego, salvo tamen meliori judicio, potius inducerer ut crederem, eam confici in arborum ramulis, per vehementem quandam liquoris expulsionem e teneris furculis ex arbore ortis, atque ex ejus partibus adhuc mollibus, formicas ex parte ali, unde homines sibi persuadeant, ipsas formicas conficere illam ceram Hispanicam.

Non etiam induci possum ut credam formicas mordere, atque ex eorum morfu dolorem quendam (tanquam ex inflammatione) excitari; sed potius
credo,

credo, quod & antea demonstravi, formicas in parte corporis postica habere aculeum, quem, ubi eo pun- gere volunt, extra corpus proferunt, ac simul exi- guas aliquot liquoris cujusdam guttulas, quas ubi una cum aculeo intra cutem ingerunt, ex eo liquore excitatur dolor; parique modo pun- gere solent scor- piones, atque animal Indicum, quod *Duyfend-been* Nostrates vocant. Partes enim serras referentes, quas formicæ in capite gerunt, mihi formatæ videntur ut foetibus suis nondum adultis præbeant escam, quam iis comminuant. Ex earum enim descriptione eas nostris formicis admodum video esse similes.

Ad ejusmodi autem observationes major requiritur attentio; multa quoque egregia ex Indiis accipi pos- sent, si homines illic degentes satis essent curiosi ad arcana detegenda: sed dolendum est ex regionibus, ubi tot latent visu & observatione digna, tam paucos ad nos redire, qui aliquid nobis narrare queant, quod hominis curiosi observatione dignum sit; & si qui forte aliquid notabile viderint, tamen veram ejus naturam communicare nequeunt: tandem, ut verbo dicam, multi nullas alias res observare posse videntur, quam ubi res eorum pecuniaria agitur.

Vale Vir Illustris, &c.

Dabam Delphis Batavorum,
Pridie Nonas Julias 1696.

Epistola

Epistola 101.

Data ad Nobilissimum Gravissimumque Virum,

DOMINUM
NICOLAUM WITSEN,

Consulum Reipublicæ Amstelædamensis Præsidem, &c. &c.

In qua

Professorem quendam, telluris motum tueri conatum, coactum fuisse theses suas suppressere. Quam facile intelligi queat telluris motus diurnus. Auctoris propositum est hanc ob causam nemini litem movere. Si tellus quiesceret, nubes in aere suspensæ manere non possent, sed necessario versus tellurem deprimerentur. Sphæra vitrea adornata, cui indita aqua, cera Hispanica, ac globulus plumbeus, idque ad telluris motum exhibendum. Globulus ille plumbeus in sphæra vitrea repræsentat tellurem nostram; cera Hispanica nubes. Celer sphære vitreæ circumrotatio, ac dein quies.

Illustri

Illustri Viro ,

D. NICOLAUS WITSEN, &c.

ANTONIUS a LEEUWENHOEK. S. P. D.



Um ante aliquot annos Illustris Christianus Hugenus a Zuylichem me domi meæ invisere dignaretur, & incideret sermo noster in telluris nostræ agitationem, ego protuli sphæram vitream, eo modo adornatam, quo in hac figura spectari potest. Cumque ei sphæræ hujus motum exhiberem, is hoc spectaculo adeo fuit delectatus, ut haud ingratum me ei opus præstiturum censuerim, si cum tali sphæra donarem: nec me fefellit opinio.

Præterito autem anno Professor quidam extraneus me domi meæ visebat, querebaturque theses a se, circa telluris motum, chartæ mandatas atque publicatas adeo exagitasse animos aliorum Eruditorum, vel potius eorum, penes quos potestas erat, ut eas suppressere necesse habuerit.

Quum vero nos liberiores hauriamus in his regionibus aërem, ubi sententiam suam de telluris motu libere proponere liceat, sæpe postea de Professoris ejus querelis cogitavi, ac tandem in animum induxi hæc meas theses, quibus ante aliquot annos mihi satisfacere conatus fui, chartæ mandare.

Ut nempe appareat quam facile percipi queat
Q
diur.

diurnus telluris motus, atque e contrario quantopere omnium superet captum, quod totum hoc, ut ita dicam, universum singulis diebus ab Oriente versus Occidentem in orbem ferretur.

Nec tamen hisce proposui litem aliquam movere, vel hominibus, qui non ultra quam vident sapiunt, aut etiam illis, quorum res domestica non patitur ut telluris assentiantur motui; sed solummodo mihi ipsi, inter alia mea negotia, hoc pacto satisfeci.

Conflari ergo mihi curavi sphæras aliquot vitreas, quarum diameter, sive axis, septem octoye pollices latos æquabat, & quibus exigua erat apertura. Has ego sphæras aqua replevi, ac tum sumsi ceram Hispanicam rubram, antea malleo frustillatim contritam; particulis his sphæræ inditis, sumsi globulum plumbeum, cui vitri apertura erat pervia; huic globulo plumbeo antea indideram foramen exiguum transmittendo longo ac tenui funiculo ei infixio, postea sumsi particulam suberis, sphæræ aperturæ aptatam, atque in ea angustam terebravi aperturam, quam funiculus, cui globulus plumbeus erat affixus, ægre transibat.

Globulum illum plumbeum, sphæræ vitreæ jam immissum, ope suberis ac funiculi id transeuntis ita locavi, ut aliquantulum ab vitri fundo distaret. Dein sphæram vitream cinxi funiculis, sive vittis, instar retium complexis, quarum extremitates ad pedis circiter longitudinem supra vitri aperturam adscendebant.

Has funiculorum, sive vittarum, extremitates digitis meis sæpe, dum ipsum vitrum in mensa, aut pulvini
nari

ari quiescebat , ita converti , ac si ex iis unum torquere vellem funiculum. His peractis manu mea , qua funiculorum extremitates tenebam , sphæram a pulvinari sustuli , tum vero sphæra vitrea in orbem gyrobat.

Globulum autem plumbeum , sphæræ immissum , repræsentare mihi persuasi nostram tellurem , aquam vero sphæræ inditam aërem illum aqueum quem haurimus , & tandem particulas ceræ Hispanicæ ipsas nubes.

Dum sphæra illa vitrea ita in gyrum circumagebatur , globulus plumbeus , lente tantummodo in orbem latus , quasi in æquilibrio hærebat. At ceræ particulae , quæ , dum vitrum quiesceret , circum globulum plumbeum jacuerant , jam , ubi sphæra ita in orbem circumferebatur , undique sese vitro interiori applicabant , atque ita , quantum per vitri angustiam licebat , ab globulo dilatabantur.

Vitro sic celeriter admodum in gyrum circumacto , eam manum , qua sphæram suspensam tenebam , aliquantulum demisi , tum vero vitrum in chartis quibusdam , aut tapeto , vel pulvinari , mensæ impositis , ne ex mensæ durezza frangatur , quievit.

Dum ita sphæra vitrea deponitur , videre licet partes ceræ Hispanicæ admodum confuse ac irregulariter moveri ; cumque eæ partes , dum sphæra in orbem ferebatur , a globulo plumbeo dilatarentur , jam e contrario eæ versus globulum ferebantur , imo usque adeo ut globulus iis partibus plane fere tegetetur.

Quemadmodum autem jam per vitri motum par-

tes ceræ Hispanicæ , quæ primo globulum plumbeum cingebant , ab eo separantur , ita etiam mihi persuadeo nubés per diurnum telluris nostræ motum, sive gyrationem , in aëre suspensas retineri. Ac porro sicuti , ubi vitrum quiescere incipit , partes ceræ sese circum globulum plumbeum locant , atque eum tegunt , idem , ut opinor , futurum esset , si tellus quiesceret , & totum hoc universum circum tellurem in orbem ferretur ; sic nempe omnes nubes , ac partes aqueæ , cæteræque materiæ graves , inter quas vivimus , in aëre suspensæ manere non possent , sed in tellurem ruerent , atque illic quiescerent.

Cum jam partes ceræ globulum plumbeum cingunt , & tum suberis pars , quæ pro vitri operculo inservit (quamque funiculus , globulum suspensum tenens , transit) aliquantulum attollitur , adeo ut vitri orificium non tangat , sed globulus fundum tamen vitri premat , si tunc quoque temporis funiculus , suberis partem transiens , atque globulum suspensum tenens , aliquantulum digitis circumvolvatur , videre licet quopactò ceræ Hispanicæ partes ab globulo plumbeo , qui tum circa axem suum , ut ita dicam , gyratur , depellantur ; ex quo iterum discere possumus telluris circa axem suum gyrationem idoneam esse ad vapores humidos undique etiam depellendos.

In A B C D E F exhibetur sphæra vitrea , ita ut in pulvinari quiescit , & funiculi G H arcte sunt complicati.

In I videre est globulum plumbeum funiculo K L D affixum , qui funiculus operculum , vitri orificium claudens , per foramen in eo factum transit.

In



H

A 

B 

C 

D 

G

D



L

P


B

F

K

I

A





In vitri fundo circa A , atque circum globulum plumbeum hærent particulæ ceræ Hispanicæ: quum autem manu , ut in H , funiculi aliquantulum attolluntur , adeo ut sphaera vitrea a pulvino separetur , ea ope contortorum horum funiculorum , ut antea diximus , admodum celeriter circumrotabitur , quando ceræ partes sese vitro interiori applicabunt , ut in B F exhibetur.

Ubi hæc autem vitri gyratio subito sistitur , spectari potest quam subito ceræ partes , vitro relicto , admodum confuse per se mutuo moveantur , atque ex parte circum globulum in orbem ferantur , donec tandem circa eum quiescant.

Hoc peracto operculum , vitri orificium claudens , ex eo attollo juxta funiculum D M N P usque ad partem funiculi D N O M , ac tum binis prioribus digitis prehendo funiculum in P , atque sic lente circumvolvo , postquam antea funiculos G H juxta sphaeram subsidere sivi.

Dum funiculum N P (quem tunc erectum teneamus , eodem modo quo antea funiculos G H , idque ita , ut globulum plumbeum vix ac ne vix paulum a fundo attollamus) ita circumvolvimus , videbimus quomodo globulus ita in gyrum actus circumjacentes partes ceræ a se depellat.

En Tibi , Vir Illustris , levidenses meas detectiones atque cogitata , &c.

Dabam Delphis Batavorum ,
Sexto Idus Julias 1696.

Q

Epistola

Epistola 102.

*Data ad*REGIAM SOCIETATEM
LONDINENSEM,

In qua

Excerpta ex litteris ad Auctorem datis ab

*Illustri Christiano Hugenio a Zuilichem, de anguillarum generatione. Nullæ detectæ anguillæ, quæ mascule dici possent, sed omnes uteris erant instructæ. Quorundam exiguorum animalculorum corpora omnia fœtibus sunt imprægnata, adeo ut nullus inter ea mas inveniatur. Num autem hoc etiam ita sit in anguillis, an vero eæ sint Hermaphroditæ, id adhuc investigandum restat. Anguillæ de novo dissectæ, sed nil ulterius detectum. Sanguinis circulatio in exiguis anguillis. Multæ minutissimæ venæ sanguinem in majorem transfundunt venam. Miranda & subita reciprocatio protrusionis sanguinis, tam in cauda, quam pinnis capiti proximis. Celerrimus cordis motus, & sanguinis protrusio. Mira agitatio earum partium, quas branchias, Koonen, Nostrates vocant. Aca-
ri*

ri plane alio modo formati , quam ii quos nos videre solemus. Multi in fico acari. Recens planta ex semine fici. Risu dignum effatum , ex ficis magna copia esis oriri posse pediculos. Unicuique seminis in fico granulo binæ sunt ligulæ , quæ ejus incremento inserviunt. De membrana materiam interiorem cingente. Multa in una fico semina. Planta ex semine fragi. Exigui pili quibus muscarum pedum extremitates sunt instructæ , minutissimis armati sunt uncis. Cancri marini posteriorum suorum pedum extremitates instructas habent pilis , quorum singuli binos serrarum instar habent dentes , quorum ope rupes marinas facile ascendere possunt , &c.

Nobilissimis , & Doctissimis

REGIÆ SOCIETATIS LONDINENSIS MEMBRIS.

ANTONIUS a LEEUWENHOEK, S. D.



Itteras vestras, Viri Nobilissimi , datas VIII. Idus Februarias 1695. mihi que gratissimas in tempore accepi , atque ex iis intellexi humanitatem vestram , qua calcar mihi addere conamini ad ulteriorum a me factarum detectionum , in Naturæ Arcanis , communicationem ; simul ex iis didici alias etiam Litteras ante

te aliquot menses ad me fuisse missas. Sed, non sine dolore, dicere cogor &c.

Cæterum non possum quin Illustribus Philosophis notum faciam, quum antea de anguillarum scripsissem generatione, atque observationes circa eam impressas misissem ad Nobilem Christianum Hugenum a Zuilichem; Illustrem illum Virum sequentes ad me dedisse litteras ex celebri ejus villa, Hofwijk dicta, XIII. Kalendas Novembris 1692.

Acutissimo Viro

ANTONIO a LEEUWENHOEK

CHRISTIANUS HUGENIUS S:

Varia me negotia, variique casus prohibuerunt, ne citius editas nuper a Te observationes attente perlegerem; eæ autem maximam mihi attulere voluptatem.

Est mihi quoque jucundissimum videre, omnium animalium ac insectorum, demonstrari a Te magis magisque generationem ex semine, non vero ex corruptione: quoniam in ea re plane eadem Tecum sentio.

In anguillarum vero generatione mirum mihi quodammodo videtur, earum fœtus in utero absque ullo motu aut vita a Te inveniri.

Nullam etiam in Epistola tua mentionem factam
video

video generis masculini horum piscium, in quibus forte microscopiorum ope semen vivum detegi posset.

Sed non sine maxima injuria omnia simul, a Te peti possent, cum infinita adhuc restent investiganda; atque ideo potius, in iis quæ nobis indies communicas, laudanda est, atque admirandâ, industria Tua ac labor improbus, quo rerum Physicarum cognitio indies augetur, ac illustratur. Id saltem a me, inter alios, fieri, non est quod dubites. Vale Vir Acutissime &c.

Ex eo tempore Illustris ille Hugenius sæpe me domi meæ visit, atque ego vicissim Eum, sed nunquam sermo noster in anguillarum generationem incidit.

Fateri autem necesse habeo me in anguillarum utriusque generis observatione, tum facta antequam mea de anguillis ederem, tum postea subinde repetita, nullam unquam reperisse anguillam, quam masculinam asserere auderem, quia omnes, quarum instituebam anatomen, uteris erant instructæ.

Num autem inter utriusque generis anguillas nulli sint mares (sicuti expertus fui variorum generum animalcula, quæ in ribetum, ceraforum, prunorum ac rosarum frondibus inveniuntur, & nomina sortiuntur pediculorum, addita specie arborum in quibus inveniuntur, omnia corpora sua habere imprægnata foetibus, atque sui similia proferre, adeo ut nullum inter ea marem, nullumve coitum dignoscere potuerim) hætenus investigare non potui.

Non etiam an similis inter anguillas obtineat generatio, an vero singulæ etiam anguillæ instructæ sint

R

semine

femine masculino , atque adeo sint Hermaphroditæ , quales quasdam esse cochleas , ex coitu aliquoties a me viso , mihi persuasi. Id ergo hætenus investigandum restat.

Quod vero antea non dixerim me in omnibus anguillis detexisse uteros , id consulto a me factum est , ut data occasione , melius mihi hac in re satisfaceret.

Exeunte præterita hyeme iterum anguillas decumanas dissecui , non ex iis quæ tota hyeme occlusæ servantur , ut tempore jejunii quadragesimalis care vendi queant , sed quas recens captas esse asserebant ; atque etiam sub finem Aprilis varias denuo observavi anguillas decumanas , ut , si pote , ulterius mihi satisfaceret quam ante hac ; sed quotquot observaverim , nil mihi videre contigit præter ea quæ antea dixi. Cum autem die decimo Junii viderem aliquot pueros occupatos expiscandis aliquot frondibus , ex canalibus Urbem nostram secantibus , & quærendis ex iis exiguis , sed variæ molis , anguillis , quasdam ex minimis in vase figulino aqua repleto domum meam afferri curavi (quod & ilico factum) ut ejusmodi anguillas quam accuratissime observarem , visurus num circa sanguinis circuitum aliquid detegi posset , quod in majoribus anguillis hætenus detegere non potueram.

Minimæ quas mihi attulerunt anguillæ duos circiter , cum dimidio , pollices latos longitudine æquabant , earumque corpora , ratione molis , tenuiora erant corporibus majorum anguillarum.

Reliquæ erant variæ molis , quarum maximæ quinque circiter pollices latos longæ erant ; varias autem

ex

ex minimo genere cepi, quas indidi tubo vitreo, ex parte aqua repleto, eoque adeo exiguo, ut vix in eo progredi possent.

Hiscæ anguillis microscopio oppositis, oculisque demissis in pinnam caudalem, majore, quam unquam antehac, cum voluptate vidi sanguinis periodum, eamque in spatio adeo exiguo, ut, si definirem, multis id hominibus fidem non mereri videretur; quumque attenderem ad extremitatem spinæ, vidi prope imi articuli juncturam multas exiguas confundi venas, atque illic majorem constituere venam; ubi & valvulam esse mihi persuasi, miranda enim celeritate illic sanguinis fiebat protrusio per continuas elevationes, non aliter quam si sanguinem nostrum nudo oculo in arteriam quandam protrudi cerneremus, imo tanta celeritate hæ sanguinis protrusionis peragebantur reciprocationes, ut non tam subito unicam ore proferas syllabam, quam hæ reciprocationes illic peragebantur; adeo ut hoc spectaculum superaret voluptatem, quam ex ullis unquam mirabilibus spectaculis antea hauseram.

Si intuerer pinnas capiti proximas, haud exiguæ quoque mihi erat voluptati in iis conspiciere sanguinis, in multiplicibus vasis sanguiferis, cursum, ut & sub capite inter maxillas.

Dein observavi locum ubi cor situm erat, atque illic, non sine admiratione, vidi celerrimum cordis motum, qui fiebat tum ejus extensione, tum contractione, per quem motum sanguis protrudebatur.

Quum attenderem ad partes rubras, quas plerique pisces in capite habent, quasque in Urbe nostra

branchias (*koonen*) vocant, non potui non mirari earum motum; non solum enim vidi binos ejusmodi branchiarum ordines, in orbem inflexos, sibi mutuo jacere impositos, sed & earum extremitates modo esse sibi invicem contiguas, mox vero aliquantulum a se mutuo recedere, haud aliter quam si nobis præsentaremus follem per vices apertum clausumque; ac, ut verbo dicam, majorem mihi varia hæc spectacula præbuere voluptatem, quam si fuisset in loco, ubi multæ mihi cochleæ, conchæ, plantæque marinæ &c. quantumvis pretiosæ ac raræ fuissent exhibitæ.

In litteris meis datis VI. Idus Julias 1695. scripsi ea quæ de generatione detexeram acarorum (animalculorum vilium ac minutissimorum, sed tamen valde perniciosorum, quod magno numero procreentur, atque farinas, semina, carnem ac lardum, & præsertim quidem fumo indurata aut siccata, ac præterea fruges siccas, ut ficos, uvas & pruna perrodant) atque eos etiam delineandos curavi; quoniam autem sub finem hyemis aliquot desiderabam acaros, adii Aromatopolam, & ab eo sumsi hordeum decortictum, ut inter materiam farinaceam aliquot detegerem acaros; quos & nactus sum, ac domum reversus non sine admiratione vidi, aliquot inter eos esse alterius plane formæ, quam hætenus acaros videram. Inter go enim habebant maculam fusci coloris, nec corpora tantis obsita erant pilis, quam vulgarium acarorum corpora; præterea pars corporis postica alio plane modo erat formata; octo etiam instructi erant pedibus, ac juxta capitis partem anteriorem binis organis,

ganis , duplo quidem crassioribus quam pedes ipsi , sed & duplo quidem brevioribus ; hæc autem organa in extremitatibus suis divisa erant in articulos , instar digitorum , unguibus instructos , quorum unus , omnium quidem crassissimus , alteram sui partem armatam habebat exiguis dentibus , ferrarum in modum formatis.

Videre mihi aliquoties contigit acaros horum organorum , supra caput extensorum , extremos articulos complicantes , non aliter quam si nos manus supra caput sublatas jungeremus , ac digitos complicarem , & hoc pacto ope brachiorum ac manuum caput ab injuria vindicare conaremur.

Adeo ut hi acari nobis multo majori arte viderentur confecti , quam illi quos hætenus videramus.

Porro alterum etiam vidi genus acarorum , præcedentibus quidem ex parte similium , sed ubi eos juxta se positos contemplarèr , mihi apparebat satis eos alterius esse generis , vel saltem ex duorum generum commixtione ortos. Sed duo hæc acarorum genera perpauca erant in materia illa farinacea , ratione vulgarium , quos videbam , acarorum.

Ex hac detectione cogitavi hos forte acaros ex aliis regionibus esse oriundos , atque una cum mercibus , quas Aromatopolæ vendunt , ad nos delatos , sive ex Gallia , Hispania , aut Italia , sive una cum amygdalis ex Africa.

Ut hujus rei pro lubitu certior redderèr , emendas mihi curavi aliquot ficos , nec alias mihi afferri jussi , quam quæ prope adjacerent lateribus dolii , in quo servabantur , easque quidem ex vilissimis ; has ego

ficos observans, vidi in quibusdam varios discurrentes acaros, quos ubi microscopio opposuisssem censui corporum eorum, utpote paulo rotundiorum ac breviorum, formam aliquantulum differre a forma vulgarium acarorum antea a me delineatorum.

Inter alias aperui ficum, quæ bona mihi videbatur ac sapida, atque in ea aliquot centenos vidi acaros fici interiora quasi permeantes; ita, dum ficos edimus, facile inscii aliquot millia animalculorum vivorum simul ad viscera demittimus.

Antea quidem dixi me multum impendisse laboris, ut recentem in fici semine plantam detegerem, sed me id exsequi non potuisse, quod, ut mihi persuadebam, ubi fici legerentur, ut in doliis compactæ ad alias regiones mitterentur, illæ non plane forent maturæ.

In hac vero acarorum investigatione censui quandam ficum, quæ mihi in manus incidebat, maturam fuisse ubi ab arbore avelleretur, atque ideo in animum induxi varia ex ea seminum granula dissecare, & ex multis, perrupto, seu dissecto primum cortice duro, integrum exemi nucleum, seu materiam internam; ac dein aperta membrana nucleum cingente, nec non dispersa materia recentem plantam tegente, integram vidi plantam, constantem ex binis foliis, atque ea parte, ex qua radices atque arboris stipes confectæ fuissent.

Visum fuit recentem plantam ex ejusmodi semine, quæ magno numero uni fico inesse scimus, delineandam tradere, quod sæpe fando acceperim, ex ficis, magna copia comestis, pediculos in stomacho posse pro-

Fig: 1.




Fig: 2.




Fig: 4.



Fig: 3.





Fig: 6.



produci , imo etiam quia aliqui (& inter eos Vir haud plane obscurus) scriptis asserere non veriti sunt , quod ex nimio ficorum esu pediculi possint oriri ; quæ certe figmenta ac fabulas non ridere non possum , persuasus , hoc assertum non aliunde originem suam trahere , quam ex multiplicibus seminum granulis , quibus singulæ fici scatent , quæque ne millenus quidem homo semina esse novit , nedum sciret tantam in unoquoque semine latere perfectionem , quantam integra continet arbor.

Atque adeo veri simile est , homines hæc seminum ficorum granula , ob exiguitatem suam , comparare cum pediculis , & hinc fingere ex ficis nasci posse pediculos.

Fig. 1. ABC exhibetur nucleus , five materia interior exempta ex cortice duro talis seminis , qualia magna numero in unaquaque fico videri possunt.

In AB repræsentatur ea nuclei pars , quæ ligulæ , per quam semen incrementum suum accepit , fuit affixa.

Ea autem pars , ex qua radices ac arboris stipes ortæ fuissent , sita est ab A versus C ; recentis vero plantæ folia jacent ab C versus B. Singula vero ejusmodi seminis granula in ficis a se mutuo sunt divisa , ac suæ quasi involuta membranæ ; adeo ut pro certo habendum sit , unicuique semini , ita ut intra ficum jacer , binas esse ligulas ejus incremento inservientes ; unam nempe quæ corticem durum alat , alteram vero quæ materiæ interiori alimentum suum afferat.

Fig. 2. DEFG videre est recentem plantam ex semine

mine fici exemptam , ubi in EFG repræsentantur bina ejus folia ; ac GDE est ea pars quæ in radices & stipitem excretura fuisset.

Nec cogitandum est exiguam hanc plantam totum constituere ejusmodi seminis nucleum ; sed scire oportet recentem illam plantam (præter membranam eam cingentem) ex parte amiciri materiâ quadam , ex qua tamdiu alimentum ac incrementum suum accipit , donec radix eousque excreverit , ut in ipsa terra subsistere queat ; uti fieri solet in animalculis masculinis in volatiliis ovis , vel in incremento animalium uteris inclusorum , quod antea sæpius dictum fuit. Omne enim spatium Fig. 2. FDG ejusmodi materia est repleta.

Si autem attente consideretur membrana nucleum cingens , non solum videre licet magnum minutissimorum vasculorum numerum , sed & incredibilem in ea copiam puteolorum ; ut verbo dicam , si quis sese insinuare posset omnibus in hoc semine latentibus arcanis , nil nisi mera apparerent miracula ac perfectiones ; nam procul dubio in hac planta exigua omnes latent perfectiones , quibus ipsa arbor instructa est.

Ubi quædam ex his seminibus aliquot horas aquæ imposuisssem , eaque tum aperirem , tam in ea parte , ex qua radix proditura fuisset , quam in foliis , dignoscere poteram magnum numerum vasorum suis sepiementis instructorum , sed quam primum liquor exhalatus foret , omnia illa vasa evanuerant.

Fig. 3. HIK exhibetur talis planta , qualis in fig. 2. delineata fuit , hac solummodo differentia , quod cum

cum illa planta Fig. 2. ita sit delineata, ut foliorum tantum latera viderentur, atque adeo ipsorum foliorum latitudo dignosci non posset, jam planta in Fig. 3. delineata ita microscopio sit opposita, ut foliorum, quibus exigua hæc planta est instructa, latitudo conspici possit.

Ubi necesse habeo tueri systemata mea de animalium ex semine masculino progeneratione (quod sæpe mihi faciendum est coram Viris Eximiis, qui me domi meæ visere dignantur) passim mihi objicitur, cui bono sint tot, in tam exigua seminis masculini copia, animalcula, quum, (ut ajunt) Natura nil frustra produxerit.

Huic objectioni vulgo reponere solco multiplicia semina, quæ ab arboribus proferuntur, quod & antea me dicere memini.

Cum autem jam iterum videamus vulgarem ficum inter quadringenta & quingenta continere seminum granula, atque singulas arbores quotannis multas producere posse ficos, & ex unoquoque semine adulto integram prodire posse arborem; ac consequenter regionem quandam ficibus consitam uno anno tot producere posse semina, ut iis non solum integrum regnum, sed & tota terrarum facies ficibus queat conseri; nec tantum hoc locum habere in ficibus, sed & in omnibus cujuscunque generis arboribus; cum, inquam, hæc iterum videamus, ego, salvo aliorum judicio, rogandum non existimo, cui fini inserviant tot in semine masculino animalcula; sed potius cum reverentia agnoscendam Summi Numinis Sapientiam, cui hæc, ad omnium viventium ac ve-

getabilium propagationem , necessaria visa sunt ; atque ideo harum rerum nobis imperscrutabiles sunt rationes , quas non nisi per conjecturas assequi possumus.

Ubi , fraga comedens , attenderem ad partes illas inæquales , quas in omnium fragorum superficie videre licet , mihi persuasi singulas illas partes esse semina ; ut mihi hac in parte satisfaceret , sumsi unum ex maximis & maturissimis fragis , & varia ab eo decerpsi semina , quæ , dum membranâ suâ exuerem , singula etiam ligula instructa esse comperi , quæ eorum alimento inserviebat : multorum seminum durum aperui corticem , ac vidi singula etiam semina instructa esse ea materia , quam nucleum dicere licet.

Nucleo hoc a membrana eum vestiente separato , plantam ex eo exemi , quam etiam delineandam tradidi , ut constaret , quot quidem una vice semina ad intestina nostra demittamus , ubi unum tantum cochlear fragis repletum ori ingerimus ; nam quum unum ex maximis fragum in quatuor dissecuisssem partes , in quarta ejus parte quinquaginta quidem numeravi semina , ac consequenter ejusmodi fragum ducentis quidem obsitum erat feminibus ; aliud vero minus fragum centum & viginti semina habere censui.

Fig. 4. ABCDE exhibetur exigua planta ex fragi femine exempta : ABC est illa pars quæ in radicem excrevisset : at CDEA sunt duo folia , quæ primum extra terram protruduntur.

Hæc duo folia passim accuratissime sibi mutuo sunt imposita , sed quoniam , dum plantam ex
femine

semine eximerem , aliquantulum a se mutuo recesserant , pictorem jussi ea ita delineare , ut eo facilius utrumque folium spectari posset.

Si jam rursus meminerimus recentem fragorum plantam (nunquam enim fraga sata audivi) uno anno varios a se diffundere ramulos , qui passim in terra satis bona radices etiam agunt , ac in plantas excrefcunt , adeo ut eodem anno ex una planta variæ fiant plantæ , quæ omnes anno sequenti fructus proferunt , & singulæ quidem variæ ferunt fraga , quorum unumquodque tot habet semina , quot antea diximus ; hæc , inquam , si meminerimus , iterum ad tantam seminum , ex plantis ortorum , multitudinem erit obstupescendum.

Ubi res quasdam notatu dignas in exiguis animalculis videre mihi datur , passim soleo examini subjicere animalia majora , quæ aliquomodo cum minoribus illis conveniunt.

Cum ante aliquot annos me videre mihi persuaderem , tenuissimos illos pilos , quibus muscarum pedum extremitates magna copia sunt instructæ , quosque apud multos delineatos videre licet , ac quorum ope res maxime glabras , ut V: G: vitrum , ascendere queunt , hos , inquam , pilos singulos armatos esse partibus uncorum in modum incurvatis , quorum organorum ope eo firmiter vitro adhærere poterant , sed quæ tamen a nullo unquam hætenus descripta esse inveni ; visum fuit partes illas aduncas paulo penitus intueri.

Ut ergo investigationes meas ulterius prosequerer , in mentem mihi venerunt ingentes illi cancri marini

(quamvis nulla ratione comparandi cum muscis, aut id genus animalculis) qui, ut accepi, in Norvegiæ littoribus prope scopulos capiuntur, & aliquando in Urbem nostram venales advehuntur: horum autem cancrorum pedes etiam multis pilis sunt obsiti, quare eos observare statui, atque eorum pilos examinare, & præcipue quidem eos, quibus pedes postici sunt instructi, quod illi pedes destituti sint digitis, sive organis, quibus quodcunque obvium prehensum arcte admodum comprimunt, quibusque alii pedes sunt armati, ac solummodo instructi unguiculo recto, ac præterea plurimis brevibus pilis.

His pilis microscopio oppositis, non sine admiratione vidi, multos instructos esse duplici serie partium instar dentium, ordine admodum concinno juxta se mutuo locatarum, non aliter quam si nobis repræsentaremus cultri partem superiorem duplici dentium serie instructam.

Jam ante aliquod tempus ejusmodi pilum delineandum curavi, ut mirabilis ejus formatio spectari posset; eas autem partes eum in finem esse formatas mihi persuasi, ut, ubi cancer rupes & scopulos adscendit, pedes in iis figere earum ope queat.

Fig. 5. M N O P Q R exhibetur pilus supra memoratus, in quo partes illæ instar dentium satis sunt conspicuæ; hujus vero pili alterum tantum conspicitur latus, ac partes illæ dentibus similes circa mediam pili partem sunt longiores, atque ab Q versus P, ut & ab Q versus R sensim sunt breviores.

In

In Fig. 6. S T pars tantum repræsentatur ejusmodi pili, sed in ea parte utraque dentium series, quibus hos pilos instructos esse dixi, conspicua est.

Citius, Viri Illustres, respondiſſem ad humaniſſimas Veſtras litteras, &c.

Dabam Delphis Hollandorum,
VI. Idus Quintiles 1696.

Epistola 103.

Data ad

*Illustrissimum ac longa Imaginum
serie Inclytum Virum,*

DOMINUM

FRIDRICUM ADRIANUM,

*Baronem Rhedæ, Dynastam in Rens-
woude & Emminkhuysen, Toparcham in Moer-
kerken, &c. &c.*

In qua

*De particulis rotundis quæ, in ostreis in-
ventæ, pro eorum ovis haberi possent, cum tamen
viva sint animalcula. Hæc animalcula inter na-
tandum aliquando quidem conjunguntur, mox ve-
ro separantur. Animalcula sunt semen ostreorum
masculinum; ex duplici constant genere, mascu-
lino, nempe, & fæminino. Non tot in universo
regno inveniuntur homines, quot ex eo genere sunt
animalcula in ostreo masculino. In ingenti ostreo fæmi-*

fæminino centum myriades ostreorum innatorum esse censentur, & quidem viventium. Ostrea imperfecta ex aliis ostreis exempta, &c.

Viro Nobilissimo,

D. FRIDERICO ADRIANO,
Baroni Rhedæ, &c.

ANTONIUS a LEEUWENHOEK. S. P. D.



Uum Tibi, Vir Nobilissime, præterito anno observata a me circa ostrea mitterem, ea sequenti anno, annuente Numine, prosequi statueram.

Sub finem ergo mensis Junii varia nactus sum ostrea, quæ inter conchas in vadis nostris mediterraneis capta erant.

Hæc ostrea tam probe erant pasta, carnes habebant adeo albas, ac tam gratum palato præbebant saporem, ut nunquam meliora me vidisse aut gustasse fatear.

Decem ex his ostreis dissecai, & in eorum quibusdam multas detexi particulas rotundas liquori pelucido injacentes, quæ pro ovis, ex quibus exigua ostrea proditura fuissent, haberi potuissent; quoniam vero aliæ aliis paulo erant majores, & præterea modo figuræ mihi videbantur ovalis, modo plane rotundæ,
cum-

cumque ego hoc spectaculo non essem contentus, atque etiam oculi spectando defatigarentur, ab ulteriori tum temporis destiti inquisitione.

Die Julii decimo denuo alia nactus fui ostrea, quæ numero circiter viginti quinque erant; hæc omnia partim eodem die, partim postridie aperui; & tum post varias observationes comperi eas partes, quæ pro ovis, ex quibus ostrea ortum fuissent ductura, haberi potuissent, revera nil aliud esse nisi viva animalcula, quorum corpora in figuram sphaericam jacebant sibi mutuo conjuncta, adeo ut eorum caudæ versus exteriora prominerent, quas multa animalcula celerrime circum corpus suum contractum agitabant, nec tamen in hac agitatione locum suum mutabant, nisi quod, ex eo, quod corpora eorum graviora essent liquore pellucido, cui innatabant, sensim versus fundum deprimerentur.

Aliquoties videre mihi contigit, animalcula hæc, eo modo conjuncta, postquam sese aliquamdiu ita motitassent, ut jam dixi, aliquantulum a se mutuo separari, & mox iterum aliquo modo conjungi, ac tandem plane sejungi & singula in diversas partes natando progredi.

Ex hisce observationibus mihi persuasi hæc animalcula esse ostreorum semen masculinum, quod semen ex duum generum constat animalculis, masculinis nempe & fæmininis, quod & antea dixi.

In aliis ostreis masculinis animalcula non ita sibi mutuo in orbem erant conjuncta, sed ea incredibili copia per se invicem natitantia vidi: his visis cogitavi hæc forte animalcula separata esse perfectiora, ea-
que

que citius demissum iri , quam illa quæ ita sibi multo erant implicita.

Hæc animalcula adeo erant exigua , ut , post accuratissimum a me institutum calculum , censerem mille ex iis simul sumpta , ostrei nondum nati molem æquare non posse.

Dein tria aperui ostrea magna masculina , quorum diameter quatuor quidem , cum dimidio , pollices latos æquabat , atque in exigua materiæ copia ex iis exempta vidi animalcula ex semine masculino , eaque tanto numero , quanto in aliis antea ostreis conspexeram : cum autem accurate attenderem , quot animalcula ejusmodi ostreo forent inclusa , obstupui , ratus nullum in Europa regnum tot continere homines , quot animalcula in semine masculino unius ostrei spectare mihi contigit.

Imo nullus dubito quin , si alii tria illa ostrea ita vidissent dissecta . ut mihi apparuerunt , illi dixissent non tot in universa Europa esse homines , quot in tribus illis ostreis erant animalcula.

Hæc ostrea , etiam optime saginata , & candore supra modum conspicua , hora decima nocturna , una cum plerisque illis animalculis vivis , in stomachum meum demisi , nil curans quod tantus vivorum animalculorum numerus in stomacho meo degeret : non tamen illa ostrea tanta cum voluptate consumpsi , quam factum fuisset , si ostreorum anatonem , & tot in iis animalcula , non vidissem ; in quo mihi infirmitas mea innotuit , quam ipse non ridere non potui.

Quartum , quod aperui , ostreum magnum , generis

neris erat fæminini , incredibilem in eo detexi copiam ostreorum innatorum , jam usque adeo perfectorum , ut in illis partibus , quas ostreorum vocant barbas , jam locata essent.

Quando innata hæc ostrea microscopio opponebam , vidi omnia quæ apparebant , viventia , modice natando progredi.

Pleraque hæc exigua ostrea , una cum materia aquosa quæ in ostreis erat , ex iis exemi , & duobus indidi tubis vitreis , quorum diameter tertiam circiter pollicis lati partem æquabat ; postea magnam hanc exiguorum ostreorum copiam exhibui aliquot amicis meis , qui me visitabant , ut testes essent magni eorum numeri , quem unus ex illis ad centum quidem myriades adscendere existimabat.

In nullis aliis ostreis detexeram ostrea innata adeo perfecta , ut inter barbas jam essent posita ; sed ex eorum quidem corporibus exemeram magnam ostreorum imperfectorum copiam ; ea enim pars ex qua testæ factæ fuissent admodum adhuc erat tenuis & perspicua , ita ut in quibusdam partes pisculentæ per ipsas testas dignosci possent ; alia nondum eo pervenerant perfectionis ; in alio vero ostreo testæ jam fuscum quendam nactæ erant colorem : at in omnibus his nullum , vel minimum , motum , vitamve , dignoscere poteram , ex quo collegi ostrea alia aliis foetus suos multo citius emittere.

En Tibi , Vir Nobilissime , postremas meas observationes circa ostrea factas , quas instituere magnopere desideraveram , ut nempe in ostreis semina masculina detegerem. Licet autem prioribus a me
factis

factis detectionibus abunde satis demonstraverim (hominibus scilicet præjudiciis non laborantibus) nullos pisces testaceos, nec sponte sua, nec ex cœnis prodire, sed ex naturali generatione; homines, secus sentientes, ex posterioribus hisce, tandem convictos esse oportebit de veritate Systematum meorum circa omnium viventium generationem. Vale Vir Nobilissime, & mihi fave &c.

Dabam Delphis Batavorum,
XVII. Kalendas Sextileis 1696.

Epistola 104.

Data ad

*Nobilissimum Generosissimumque
Virum,*

DOMINUM

FRIDERICUM ADRIANUM,

*Baronem Rhedæ, Dynastam in Rens-
woude & Emminkhuysen, Toparcham in Moer-
kerken, &c. &c.*

In qua

*Errare eos qui rubiginem [Belgis Honig-
dauw] ex aere delabi asserunt. De magna ovo-
rum copia in folio tiliæ. De duplici genere ani-
malculorum ex iis ortorum. Hæc variæ sunt mo-
lis, fœtus procreant, ac mutantur in animalcula
volatilia. De incredibili hujusmodi animalculo-
rum numero in una arbore. De vermiculo in tali
animalculo invento, ex quo musca nigricans pro-
dibat, & unde is ortum duxerit. Multa exigua
animal-*

animalcula aliis minoribus pro cibo utuntur. De incredibili nigrificantis ejus muscæ exiguitate, & ejus ovis. Muscæ illæ nigræ, quæ arboribus nocent, ex aqua oriri nequeunt. Frondium recens ortarum ariditas non fit ex ventis asperis, sed nigrificantes muscæ in causa sunt. Erucæ ex illis ortæ mutantur in pupulas. Vermis qui malum perforaverat mutabatur in pupulam, atque ex illa pupula prodibat musca. Ostrea mense Augusto admodum bona erant & sapida. Rationes, cur vulgo dicant ostrea esse insipida, nisi mensis nomen ingreditur littera R. Ostrea in fluentis nostris mediterraneis admodum mole augentur.

Viro Nobilissimo,

D^r. FRIDERICO ADRIANO,

Baroni Rhedæ, &c.

ANTONIUS a LEEUWENHOEK. S.



Uum hac æstate, Vir Nobilissime, observarem materiam illam liquidam, quæ ex superiori parte foliorum tiliarum protruditur, quamque agricolæ nostrates rubiginem (*den Honigdauw*) sed falso, vocant: non sine admiratione vidi, inferiorem illorum foliorum partem obsitam esse magno numero animalculorum,

mole convenientium cum illis animalculis, quæ in Ribetum, Prunorum, Ceraforum, aliarumque arborum frondibus, inveniri jam antea dixi; imo tantus erat horum animalculorum numerus, ut in uno folio ducenta quidem numerarem; & quis sciat quantopere hic numerus adhuc auctus fuisset? quia paucademum ex iis animalculis usque adeo erant perfecta, ut in animalcula volatilia forent mutata.

Hæc animalcula duorum erant generum, quæ ubi nudo tantum intuerer oculo, fere judicassem ea plane esse similia animalculis illis supra memoratis; at microscopii ope ea observans, vidi ea plane alterius esse formæ.

Alterum enim genus, quorum numerus quadruplo quidem major erat numero alterius generis, admodum lepide erant formata, nec injucundum præbebant spectaculum, quoniam corpus habebant quadruplici macularum nigrarum serie distinctum; quumque in animalcula volatilia mutarentur, exteriores alarum partes, quibus a partibus nervosis aliqua conciliatur rigiditas, etiam nigricantes erant.

Hæc animalcula sensim per genera adeo erant exigua, ut minima ex iis recens parta censerem.

Varia ex his dissecui, atque inter alia quædam, quæ jam in animalcula volatilia mutata erant, atque tot foetus, sensim sensimque minores, ex eorum corporibus exemi, quot me antea in animalculorum, in Ceraforum frondibus inventorum, corporibus detexisse dixi.

Alterum genus animalculorum, subflavorum, nondum eo pervenerant, ut in animalcula volatilia mutarentur.

Sex

Sex ex posterioribus his animalculis tubo vitreo inclusi, quorum, post dilapsas decem horas, unum jam, pellicula sua exuta, in animalculum volatile erat mutatum, nullam maculam nigram nec in corpore, nec in alis habens; ex quo mihi abunde satis constabat, licet corpora eorum eodem modo essent formata, ea tamen alterius esse generis.

Porro aliam tiliam nudo oculo, quantum mihi per arboris alitudinem licebat, observatum ivi, atque animadverti omnia, quæ videre dabatur, folia illis animalculis esse obsita.

Cum autem considerarem arborem, cujus diameter duos circiter pedes crassitie æquabat, atque ingentem foliorum copiam, quibus ejusmodi arbor est ornata, quotque singula folia obsita sint animalculis, ne millesimo quidem homini cognitis; iterum obstupui, mecum observans, quam pauca hactenus nobis sint nota. Animalcula enim, uni ejusmodi arbori insidentia, numero superant omnes in universa Nostra Hollandia degentes homines, præter magnam adhuc minutissimorum animalculorum copiam, quæ præterea in illis frondibus detexi.

Hæc animalcula non tantam foliis inferebant noxam, ut folia inde contraherentur.

Vidi quoque tria ex illis animalculis, quorum corpora valde crassa erant ac brevia, mortua vitroque adsidentia; hæc vitro exemi, atque ea microscopii ope observans, in uno ex illis vermiculum dupliciter spectavi plicatum, seseque moventem, unde pro certo iterum habui, exiguam muscam ovum hujus animalculi corpori ingessisse, ex quo ovo intra animalculi

culi corpus ortus esset ille vermiculus, qui ex illo corpore alimentum suum ac incrementum accepit, ut antea sæpius a me dictum fuit.

Tria posteriora hæc animalcula vitro incluſeram, ac post triduum, quatrimumve, vidi exiguam muscam nigricantem per vitrum discurrentem, quam ortam esse mihi persuasi ex illo vermiculo, quem viventem seque moventem conspexeram: nam in unius animalculi corporis parte postica foramen erat excavatum, atque pars illa corporis interior tela quadam erat tecta, quæ procul dubio ab illo vermiculo fuit confecta, antequam in muscam mutaretur.

Post sexiduum aliam per vitrum discurrentem detexi muscam nigricantem, ac paulo post etiam tertiam, adeo ut jam ex unoquoque animalculo mortuo orta esset musca, singulorumque animalculorum pars corporis postica rotundo foramine esse perforata, ex quibus foraminibus, ut antea dixi, muscæ illæ nigræ evaserant.

Quoniam vero hæc meæ observationes conveniunt cum illis, quas præterito anno circa eadem institueram, jam nobis adhuc magis quam antea certis esse licet, sicuti quædam sunt inter quadrupedes, quæ nullo alio vesci solent cibo, quam aliorum animalium carnibus; ita & idem obtinere in volatilibus, & adhuc magis in piscibus.

Quod si aliter se haberet, animalia terrestria, alites, & magis adhuc pisces intra paucos annos adeo multiplicarentur, ut neque terra, neque aquæ satis omnibus illis forent capaces; atque idem etiam
locum

locum habere videmus in animalculis adeo minutis, ut oculorum nostrorum aciem pæne effugiant.

Sed præcipue id mirandum est, quod vermiculus ille, ex quo illæ muscæ per mutationem prodeunt, solummodo alatur ex tam exiguo animalculo, nudo nostro oculo non majori quam illa musca, quæ ex eo evasit; atque ex eo concludere licet, vermiculi; animalculo illi inclusi, atque ejus corpus exedentis; omnem cibum ejus inservire incremento, & nulla, vel pauca admodum, egeri excrementa.

Exiguam ejusmodi cepi muscam nigricantem, cujus integrum corpus arenæ pondus non æquare censebam, & partem ejus corporis posticam aperui; ex qua tum exemi particulas rotundas, quas ova esse certo mihi persuasi, idque eo magis quod aliæ alias mole superarent, & maximæ quidem particulæ adeo erant minutæ, ut viginti quinque, & plures, simul sumptæ arenulæ molem æquare non possent, minima vero ova adeo erant exigua, ut eorum mille arenam æquare non possent.

Porro varias in Urbe Nostra spectatum ivi tilias, visurus num omnium frondes ejusmodi animalculis essent obsitæ, atque magna cum admiratione vidi omnia folia, quousque oculorum pertingebat acies, animalculis esse obsita, sed ita tamen ut quædam folia pluribus essent onusta animalculis, quam alia.

Præterito mense Aprili duo domum meam venerunt Viri Eximii, allata aliqua aquæ copia, quam servum ex fossa quadam haurire jusserant, in qua aqua se multa vidisse asseriebant animalcula viventia, ex quibus muscas, quas vocant nigras, ortum suum ducere existimabant.

V

Aquam

Aquam eam scrutatus in ea quod quæfiveram pro lubitu invenire non potui.

Quod si verum esset muscas illas nigras ex aqua oriri, eæ muscæ nullo modo ova, aut foetus suos, arborum frondibus imponere possent, sed ova sua necessario aquæ imponere deberent, ut sequenti anno similes muscæ nigræ iterum ex aqua prodire possent; ac, ut verbo dicam, animalcula omnia volatilia, ex aquis ortum suum ducentia, ut genus suum conservent, necessario iterum ova aut foetus suos in aquis deponunt; quod si animalculis illis aqua desit, ut ei ova sua imponant, illa etiam progenerare nequeunt.

Tempore autem verno trium generum observavi muscas nigras, & in quadam horti mei parte quarundam malorum rami omnes frondes ac gemmæ, ex quibus flores prodituri fuissent, adeo erant aridæ & contractæ, ut cum vulgo fere censerem id factum esse ab ventis frigidis, & asperis qui in arbores irruissent, idque eo magis, quod multæ arbores ab iis plane essent immunes, atque in multis aliis hortis vicinis erant arbores in quibus nulla gemma integra remanserat.

Idcirco frondes illas contractas & aridas observatum ivi, atque in iis exiguos detexi vermiculos five erucas; licet vero aliæ erucæ aliis erant majores, omnes tamen mihi eodem modo videbantur formatæ; quoniam vero illæ erucæ non modo folia sed & foliorum ac florum caules perroserant, hinc magna illa frondium orta erat ariditas.

Hisce observatis cogitavi has forte erucas ex muscis
nigris

nigris esse ortas , quæ muscæ ova sua non continuo, nec prope juxta se invicem deponere consueverint , ut multa animalcula volatilia solent ; sed muscas illas nigras ab una gemma in aliam transsilire , ac singulis tantum gemmis duo aut tria imponere ova.

Varias muscas nigras , easque ex minimis , aperui , atque ex iis tot exemi ova oblonga , ut existimarem decem aut duodecim ejusmodi muscas nigras , sufficere omnibus frondibus & gemmis talium malorum , quales meæ sunt , inficiendis ; si enim muscæ illæ nigræ recentium frondium ac florum caules non ita perroderent , ac nunc facere consueverunt , illæ multo minus perniciosæ forent arboribus.

Omnem dein , quam potui , adhibui operam ut quasdam ex illis erucis eo usque perducerem , ut plane essent adultæ , videre cupiens num ex illis per mutationem nigræ proditura essent muscæ , licet id nullo modo in dubium vocarem ; sed omnem operam perdidi.

Postea varias examinavi aridas gemmas arboribus adhuc adhærentes , in quibus aliquot quidem reperi pupulas , sed nullas quas plane perfectas censerem ; licet enim erucæ illæ jam in pupulas essent mutatæ , tamen judicabam ex iis non proditura animalcula viva , quod pupularum , a me apertarum , corpora interiora essent viridia ; ubi enim ejusmodi animalcula mutabuntur , primum cibus ex stomacho & intestinis egeritur.

Sæpius membranam exterioram ab pupula separare tentavi , ut eo facilius mihi alas pedesque , quos & per membranam dignoscere poteram , ob oculos po-

nerem; sed quantumvis levi manu id instituerem, passim tamen animalculum membranæ injacens dif- fregi, adeo ut materia viridis efflueret. Nec præ- terea pupulæ molem suam servabant, ubi enim ali- quantulum jacuerant longitudo earum contraheba- tur.

Postea vidi multa mala, quæ immatura decide- bant, esse ab vermibus perrofa; quoniam vero in ma- lo quodam investigando incidi in vermem albican- tem, censui eum mutationi esse proximum, idcirco eum tubo vitreo inclusi, mali adhuc particulæ invo- lutum, ac post paucos dies vidi eum mutatum in pu- pulam figura pyro similem, dein post alios aliquot dies ex pupula prodiit musca, cujus corporis pars anterior erat nigra, posterior vero, & pedes erant rubicundi; pars autem corporis postica cuspide erat instructa, non aliter quam si formata esset ad fora- men in malo, similive pomo, excavandum, atque ovum ei imponendum.

Jam octiduum est ex quo in Zelandia in urbe fui Zirizea, ubi amici mei, animi recreandi gratia, me deduxerunt in loca, ubi multa ostrea, ex Anglia pe- tita, tam in locis ubi maris fluxus pertingit, quam in locis septis, quorum fundus asscribus ex ligno a- cerno factis est tectis, asservantur. Hæc ostrea co- ram me a fundo educta mihi edenda proponeban- tur; inter ea vero nullum repperi ostreis innatis im- prægnatum, ex quo mihi compertum fuit, tempus generationis eorum præteriisse.

Hæc ostrea supra modum erant alba & faginata, præterea saporis optimi omnium; adeo ut illi errare

cen.

consensendi sint, qui cum vulgo asserunt ostrea non esse tempestitiva, nisi mensis nomen contineat litteram R.

Sed potius dicendum ego existimo, ubi mensis nomen ingreditur littera R, tunc plurimum præterisse calorem, atque adeo tum tempestatem esse idoneam ostreis in dolia compingendis & transmittendis, ita ut non facile corrumpantur.

Tunc temporis etiam edoctus fui quomodo & ubi locentur illa ostrea, quæ *Groenbaarden* Nostrates vocant.

Porro cum admiratione vidi ostrea, illic tantum per quinque aut sex menses asservata, usque adeo excrevisse, uti egomet tum videbam.

Ubi cogitarem, quænam essent rationes, cur ostrea non æque in fluentis nostris maritimis procreentur, ac in fluentis Anglicis, circa eam rem mihi satisfacere non potui.

Hesternæ die accepi gratissimas Tuas litteras &c.
Vale Vir Illustrissime.

Dabam Delphis Hollandorum,
VII. Kalendas Septembris 1696.

Epistola 105.

Data ad

Amplissimum & Gravissimum Virum

DOMINUM

HENRICUM BLEISVI-
CIUM. J. U. D.*Rei-Publicæ Delfensis quondam Con-
sulem. Rerum Indicarum Orientalium
Moderatorem &c.*

In qua

*De ligno querno, quo in focis uti solent,
quodque Nostrates Tel-hout vocant. In media e-
jusmodi ligni parte septendecim erant vermiculi albi
viventes. Hi frigidi parum, at calefacti aliquan-
tulum, plus habebant motus. In ligni cortice ex-
teriori nulla foramina dignosci poterant, cum ta-
men ipsum lignum adeo a vermibus esset perforatum,
ut instar caulis cannabini diffringeretur. Lignum*
tubo

tubo vitreo inclusum. Ex uno ejusmodi ligno tri-
ginta vivi vermiculi exempti. Hi vermiculi in
pupulas mutantur, illæ vero in animalcula vola-
tilia. De oculis ejusmodi animalculorum. Horum
animalculorum corpora clypeolis non sunt instructa.
Vulgo homines existimant, ubi in cortice ligni ex-
teriori foramina non animadvertunt, at contra in-
tra lignum ejusmodi foramina a vermibus excava-
ta apparent, tum vermes intra lignum sponte sua
oriri. Animalcula illa volatilia etiam subere ves-
cuntur. Lignum quernum, quod subito crescit est
firmum & solidum, nec tam facile a vermibus per-
foratur, ac lignum quod lente cressit. Lignum
quod exteriori suo cortice manet cinctum magis ver-
mibus est obnoxium, quam lignum cortice exutum.
Ejus rationes &c.

Amplissimo Viro,

D^o. HENRICO BLEISVICIO &c.

ANTONIUS a LEEUWENHOEK S. P. D:



Um præterita hyeme, Vir Amplissime,
viderem ligna querna, quæ *Tel-houten*
vocant, quæque jam sex circiter annis in
tabulato domi meæ servaveram, magna
ex parte esse obsita pulvere quodam albo,
cum ligni colore conveniente, ejus pulveris partes mi-
hi

hi certo persuadebam esse confectas a vermibus intra lignum latentibus.

Sumsi ergo inter alia lignum multo ejusmodi pulvere tectum, quod juxta longitudinem suam erat diffusum, cujusque diameter pollicem circiter æquabat, longumque circiter erat sesquipedem, germen vero quinque annorum.

In exteriori hujus ligni parte nulla foramina a vermibus excavata, quæ in multis lignis conspiciuntur, dignoscere poteram, etiamsi omnem pulverem, quo obsitum fuerat, ab eo absterfissem.

Hoc lignum antea dupliciter dissectum, diffidi, atque ex media ejus parte septendecim exemi vermes albos ac viventes, & omnes ejusdem molis. Horum vermium corpora erant breviuscula, quæ in orbem contrahebantur, ubi eos ex ligno exemeram; eorum quoque corporum pars anterior duplo quidem erat crassior parte postica; præterea ligno exempti progredi non poterant, nam pedes habebant admodum breves multis pilis obsitos; atque singulos pedes habebant armatos unguiculo erecto.

Non sine admiratione vidi hos vermes eam materiam quam ab ligno abraferant, & simul eorum excrementa, post se in longis illis meatibus, quos in ligno, id perrodendo, confecerant, tam arcte posse comprimere, idque eo magis quod eorum corpora adeo essent mollia, exceptis organis in anteriore capitis parte, quæ non alba erant, sed subflava.

Varios in illo ligno vidi meatus virides, sive aliquantulum situ obductos, sed non aliis in locis, quam ubi vermes erant, unde colligebam hos vermiculos

miculos hyeme quietos jacere , atque ex corporum eorum exhalationibus oriri situm , quando & parum admodum agitationis in eorum corporibus dignoscere potui ; sed ubi eos pyxidulæ indidissem , atque aliquot horis mecum portassem , illique ex eo incaluissem , inde etiam plus motus accipiebant , sed non alium habebant motum , quam quod partem corporis posticam ita antrorsum inclinarent , ut eâ caput ex parte tegerent , ac postea se aliquantulum extenderent.

Licet nullus dubitarem quin hi vermes tempore æstivo in animalcula volatilia mutandi forent ; tamen quatuordecim ex his vermibus indidi pyxidulæ , quæ ope striarum claudebatur , eosque mecum circumtuli , investigaturus quam diu hi vermiculi eo modo superstitites manerent.

Ad has meas observationes obstupui , videns ejusmodi ligna , in quorum parte exteriori nil , quod aliquam referret perforationem , apparebat , adeo esse peresa , ut tam facile quam caules cannabini diffringerentur.

Ubi autem vulgo vident ligna , parte exteriori plane illæsa , adeo esse fragilia & tantum continere materiæ farinacæ , quidam hæc ligna vernacule vocant *Vermollemt-hout* , existimantes hæc ligna ita sponte sua esse carie infecta ; alii vero existimant illos vermiculos , qui in lignis inveniuntur , sponte sua intra lignum oriri , quod , ut antea dixi , nulla in cortice animadvertant foramina.

Sed si consideremus , quam parvum necessario sit ovum , ex quo tam exiguum oritur animalculum ,
X
quod

quod ex illis vermiculis per mutationem provenit, & recentem vermiculum ex ovo natum per rimas, sive vasa ligni majora, sese posse ligno insinuare, atque ita in eo excavare foramina, primo oculorum nostrorum aciem effugientia, hoc pacto nobis hac in parte poterit satisfieri.

Præterea certo mihi persuaseram hos vermiculos non modo in animalcula volatilia mutatum iri, sed & eorum corpora clypeolis fore instructa, quibus alas suas tegerent.

Ut hujus rei certior evaderem sumsi tertiam circiter partem ligni supra memorati (ex qua parte nullos exemeram vermiculos, nec in cortice ejus foramina a vermiculis confecta dignoscere potueram) eamque inclusi tubo vitreo, cujus utramque extremitatem subere obturavi; hunc tubum in Musæo meo deposui in loco, ubi sæpius oculi in eum inciderent, ut hoc pacto animadverterem quid fieret de vermiculis, qui huic ligni parti forte inessent.

Ex eo tempore sæpe occlusam hanc ligni partem contemplatus fui, sed nullam animadverti mutationem, nisi quod materia quædam ab ligno abrosa in vitro jaceret, ut & vermiculus, qui ex ligno eruperat, mortuus.

Die Maji 21 nullam adhuc in ea ligni parte advertens mutationem, sumsi tres alias ligni partes tenues, quas diffregi, atque triginta circiter ex iis exemi animalcula, sive vermiculos jam in pupulas mutatos, at valde adhuc albicantes.

Hæ pupulæ admodum scitè erant formatæ, in iis enim non modo clare dignosci poterant nitidissimi oculi,
uværum

uvarum in modum formati, sed & singulos oculos ex pluribus ducentis quidem constare organis opticis censui; præterea spectari poterant articuli instar crenarum excavati, quibus vermiculus fuerat instructus; adhæc cornua capiti infixæ, pedes, & clypeoli quibus alæ rectæ fuissent; ac, ut verbo dicam, tot & tantæ in tam vili animalculo apparebant perfectiones, ut sine stupore considerari nequirent.

Quinque ex his pupulis tubo indidi vitreo, quem interdum mecum in sacco gestavi, idque ut viderem num ob corporis mei calorem citius in animalcula mutarentur volatilia, quam aliæ pupulæ, quæ pyxidulæ erant inclusæ.

Postquam jam has pupulas triduo mecum circumgestaveram, vidi eorum corpora jam rubrum nacta esse colorem, post septiduum vero omnes pelliculas suas exuerant, quatuor vero corpora habebant colore sanguineo, eoque splendido, infecta; hæque in admodum parvo motu sese in subere, quo vitrum erat obturatum, continebant.

Quintæ pupulæ, licet etiam pellicula sua exutæ, pars corporis anterior erat rubicunda, & posterior plane alba, atque hæc ita mortua erat.

Ipsis Kalendis Junii vidi unam ex pupulis, quas pyxidulæ incluferam, in animalculum volatile esse mutatam, atque ejus corporis partem posticam adhuc plane esse albam.

Postridie Kalendas Junias animadverti duas alias pupulas etiam in volatilia esse mutatas.

Quoniam autem aliquot diebus extra Urbem degeram, die demum decimo Junii observavi pupulas

pyxidi inclusas, quæ omnes in animalcula volatilia mutatæ erant, exceptis duabus tribusve, quæ exaruerant, quasque, dum eas ligno eximerem, a me læsas fuisse censui.

Eodem etiam die vidi octo animalcula volatilia, ex illa ligni particula, quam jam antea me tubo vitreo inclusisse dixi, erupisse ligno infidentia, adhæc varia rotunda foramina in ligno jam esse excavata, per quæ animalcula illa ex ligno evasisse mihi persuasi.

Ubi autem homines harum rerum ignari hæc in ligno vident foramina, quæ antea nulla animadverterant, ex eo colligunt ejusmodi vermiculos sponte sua oriri, ut & antea jam monuimus.

Postridie quindecim conspexi animalcula volatilia, ex quibus duo coierant, ac tum septendecim in ligno observavi foramina rotunda, per quæ animalcula ex ligno evaserant.

Dein vidi multa ex his animalculis sese denuo, per rotunda illa foramina, ligno ingerere, ac mox etiam extra illud excurrere, adeo ut ex eo tempore quatuor solummodo aut quinque simul viderim animalcula.

Nullus dubitaveram quin illa animalcula intra tubum vitreum progenerassent; ratus idcirco jam ex eorum ovibus prodierunt necessario vermiculos, sumsi lignum, ac id in minutas diffidi particulas, at non plura duobus tribusve ejus generis animalculis animadveriti; unde mihi persuasi reliqua evasisse per foramen aliquod, quod in subere erat.

Quædam etiam ex his animalculis volatilibus ita in tubo vitreo occluseram, ut pars suberis pro vitri fundo

do esset , experiri cupiens num & hæc animalcula subere pro cibo vescerentur , quod & factum vidi , ut & egerentia ea excrementa oblonga , & colore suberi similia. Ex quo mihi patuit vermiculos non solum lignum perrodere , atque ex eo incrementum suum accipere , sed & eos , licet jam in animalcula volatilia mutatos , adhuc ligna perrodere solere , contra quam in multis aliis animalculis fit volatilibus.

Animalculum hoc volatile sextuplo octuplove majus censui eo animalculo volatili , quod per mutationem prodit ex vermiculo , qui materiam oleosam ex floribus myristicis consumit ; at clypeoli utriusque alas tegentes fere eodem modo sunt formati.

Cum jam videamus ligna querna tenuia , quæ *Telhouten* vocant , magis esse obnoxia perrosioni vermiculorum , quam ligna crassiora quæ in his regionibus , & adhuc multo magis , quam quæ in regionibus calidioribus crescunt ; ejus rei nulla alia potest assignari ratio , quam quod ligna illa tenuiora , quæ passim ex stirpibus sæpe truncatis & in virgultis excrescunt , lente admodum in crassitiem excrescant , ac consequenter ea ligna necessario sint fragilia & infirma , cum e contra quercuum ligna , quæ subito in crassitiem excrescunt , sint firma & solida , quibus vermes non multum nocere queunt ; quæ ligni querni firmitas & soliditas antea a me fuit exhibita.

Præterea ligna , quæ exterioribus suis corticibus tecta manent , magis obnoxia sunt vermiculorum perrosioni , quam ligna cortice suo orbata ; cujus rei hanc conjicio rationem , quod exigui vermiculi prius apti sint ad perrodendum corticem , quam ipsum lignum ,

ast ubi aliquamdiu alimentum suum ac incrementum ex cortice ceperunt, sensim aptiores redduntur ad ipsum lignum perforandum; cujus rei experimentum animadvertere licet in corbibus, quorum illi minus obnoxii sunt vermiculis, qui confecti sunt ex virgulis decorticatis, quam qui confecti sunt ex virgulis cortice tectis.

Dein aliud repperi genus vermiculorum ex folis corticibus viventium, nec in ipsa ligna penetrantium, & multo majorum illis vermiculis, de quibus in hac epistola egi.

En tibi, Vir Gravissime, observata & notata a me in minuto vermiculo, in hisce regionibus ligna perrodente & corrumpente.

Quum autem id hic in his regionibus animadvertimus, quis noverit, quanta copia tales vermiculi in calidioribus Orientis regionibus progenerentur, qui non solum lignis, sed & nucibus floribusque myristicis sint perniciosi.

Sed hisce finio &c.

Dabam Delphis Batavorum,
IV. Kalendas Septembris 1696.

Epistola

Epistola 106.

Data ad

*Nobilissimum & Illustrissimum Virum***D^m. ANTONIUM HEIN-
SIUM. J. U. D.***Illustrium & Præpotentium D: D:**Ordinum Hollandiæ & West-Frisiæ
Syndicum &c: &c.*

In qua

*De Medico quodam , statuente nullo in
posterum vesci acido , nec piscibus , rato se hoc
pacto vitam suam protrahere posse. Acido & pi-
scibus frui non nocet valetudini ; imo e contra pi-
sces censentur sanitati magis prodesse , quam carnes.
De coagulo. Lac in vitulorum intestino , quod
Lebbe vocant Belgæ , admodum dure coagulatur.
Lac hoc coagulatum eidem Meet vocant. Coagu-
lum vino , ut & aceto permixtum. Exigua in lacte
particulæ , quæ non coagulabantur. Globuli , qui
butyrum erant. Pars lactis coagulati in stomacho
vituli , quæ referebat testam , quam pectinem St.
Jacobs*

Jacobs Schelp *Nostrates* vocant. *Lac coagulatum* a puella evomitum. In agnorum subrumorum stomachis etiam coagulatur lac, sed lac bovinum citius ovino. Coagulum sanguini permixtum. Coagulum saporem habet magis amarum, quam acidum. Coagulatio in ventriculis nostris necessaria est. Particulæ cretæ, ut & oculi cancri aceto inditi. De fellis vesicula in vitulo, & quomodo fel in intestina infunditur. Coagulum aliquamdiu sepositum acidum habebat odorem. Judicium Chirurgi cujusdam de aliquot in infantis ore tuberculis aqua repletis. Fellis vesicula, reperta in vitulo, omni plane felle destituta. De morbo ex tabaci suctione orta. Vir quidam ubi acetum edit rubescit, & sudor ei erumpit. De exiguo in vitulis ventriculo, ab Ianiis Souter dicto. Sphæra ex pilis constans in vituli stomacho reperta. Ubi excrementa vitulorum & agnorum subrumorum sunt tenuia & fluida, non invenitur lac coagulatum in vitulorum intestino, Lebbe dicto, nec in agnorum ventriculo. Si ope acidi fiat coagulatio, acidum nobis necessarium est &c.

Viro Illustri

D^o. ANTONIO HEINSIO &c.

ANTONIUS a LEEUWENHOEK. S. D.



Uoniam, Vir Illustris, varii Medici ac Chirurgi asserunt, multos in mortalium corporibus excitari morbos ab acido in stomacho latente, quod succus coagulare faciat,

faciat , ac præterea mihi succurrit , me ante aliquot annos Expertissimo , & Celeberrimo cuidam Medico , peregre abeunti (qui dum domi meæ potum Indicum Thê biberet , eum potum maxime commendabat & extollebat , & e contrario admodum contemnebat & dissuadebat omnem acidi & piscium usum , addens se eorum , utpote sanitati valde noxiorum , usu in posterum abstinere animo proposuisse , ratus se hoc pacto vitam suam usque ad octuagesimum , & ultra , annum protrahere posse , cum tamen eventus docuerit , eum in hac sua exspectatione fuisse falsum ; & forsan si plus piscium & acidi , at minus vini consumpsisset , longiorem nactus fuisset vitam) respondisse , me non existimare piscium & acidi usum adeo esse noxium ; quum in pagis vicinis , ubi plerique homines expiscatu vivunt , & passim multis vescuntur piscibus , & præsertim ubi in mari piscatui sunt intenti , admodum robusti & sani obvii sint senes , quorum nasus & medius inter oculos locus obsitus sit pilis , digitum latum longitudine æquantibus ; meque ipsum sæpius expertum esse corpus meum , ubi male haberet , ex esu piscium , quibus embamma ex butyro & aceto mixtum erat superfusum , fuisse refectum & recreatum ; nec unquam embammatum ejusmodi acidorum usum mihi male cessisse : imo me existimare , piscium esum esse salubriorem esu carniū , & præcipue quidem hominibus non multum operari solitis , quod pisces facilius in stomacho & intestinis queant concoqui & imminui , quam carnes , quæ passim plus præbent alimenti ; cujus abundantia causa potest esse morborum , ut & eam multorum morborum esse fomitem

mihi certo persuadeo: hæc inquam quum ita sese habeant, sæpius de hac re cogitavi, existimans demonstrari forte posse, ciborum in stomacho coagulationem, si ea per acidum efficeretur, non adeo sanitati obesse, sed potius prodesse.

Quum igitur scirem nundinis, quæ singulis hebdomadibus in Urbe nostra celebrari solent, vendi solere vitulorum intestina, quæ *Lebbens* vocant, quæ sale condita in doliis servantur; hæc intestina, ut & falsugo in qua servantur, coagulum, sive *Lebbe*, dicta ab agricolis emuntur & lacti induntur, ut lac coaguletur, atque ex partibus coagulatis caseos faciant, ejusmodi falsuginem emi mihi curavi, ejusque rei experimentum cepi, sed pro arbitrio id exsequi non potui, quod multiplices mihi obessent particulæ in ea salinæ.

Idcirco volui, ut mihi lanus liquorem ex hoc intestino, vitulo recens exempto, mitteret; at didici, si vitulus paucis ante mactationem horis lac bibisset, multas tum, ubi mactaretur, inveniri particulas lactis coagulatas in intestino supra memorato; & illud lac coagulatum ab laniis huic intestino eximi solere, atque in vase figulino sale conditum asservari; (uti mihi exhibebatur) donec ab agricolis ematur, quibus exigua ejus lactis coagulati copia plus prodest, quam liquor in quo intestinum illud fuit conditum.

Dein alium adii lanum, apud quem ejusmodi vidi intestinum, in quo, etiamsi vitulus, ex quo excisum erat, viginti quatuor ante mactationem horis nullo usus fuerat lacte, aliquot tamen repperi partes lactis coagulatas juglande majores, quas ob duritiem suam,
ubi

ubi intestinum exterius premeretur , animadvertere poteram.

Partes has lactis coagulatas ex intestino excisas , & aqua pura ablutas mecum domum attuli , postquam mihi antea exhibuerant hujus intestini in vitulo situm; quoniam nunquam ante id tempus ad tale intestinum attenderam.

Tunc etiam didici cibos ex stomacho detrudi in ventriculum quendam minorem , cujus interior pars multis partibus instar foliorum est obsita; & minorem hunc ventriculum ab laniorum filiis *Souter* vocari.

Intestinum autem minori huic ventriculo annexum, & cibos ex eo demissos recipiens , quousque latum & amplum est , vocatur *de Lebbe*.

Ubi partes illas lactis coagulatas , quas lanii *de Meet* vocant , tractarem , non sine admiratione vidi eas tam firmiter esse compressas , ut caseum recens factum referret.

Lac hoc coagulatum vitro indidi , atque ei infudi aquam pluviatilem , adeo ut ab aqua ad pollicis circiter lati altitudinem tegeretur; tunc lactis particulas aliquantulum separavi , ut particulæ salinæ , siquæ lacti coagulato inessent , ad aquam transfirent.

Postquam hæc mixtura per aliquot horas seposita fuisset , aquam superiorem infudi chartæ bibulæ , adeo ut guttulæ ex ea stillantes inciderent in vitrum novum purumque.

Aliquam hujus aquæ destillatæ copiam vino immiscui , visurus num hoc coagulum aliquam exerceret vim in particulas salinas in vino latentes.

At postquam vinum ita aliquot horis steterisset im-

motum nullas prorsus prodeuntes vidi particulas salinas, quæ tamen passim in mero coagulari solent. Idcirco statui hujus rei in aceto experimentum videre.

Quoniam autem de aceti, quod nunc temporis, ut ex vino factum, vendere solent, bonitate certi esse non possumus, quod id passim adulterari compererim, ipse ex penu mea expromi jussi acetum ex mero factum, infusum foliis floris calthæ, quod, plus viginti annis in lagena servatum, acidissimum est.

Huic aceto etiam permiscui aliquantulum liquoris destillati supra memorati, sive coaguli, & ubi id per aliquot horas seposuissem, nullas in aceto detexi particulas salinas; sed cum liquor hic octodecim horis fuerat permixtus, pauculas quasdam animadverti particulas salinas coagulatas.

Posthæc sumsi merum Gallicum, atque etiam acetum, quæ singula seorsim in Musæo meo deposui, ut materia liquida ex iis ex parte exhalaretur, atque particulæ salinæ coagularentur; ac tam in mero, quam in aceto magnam detexi copiam particularum salinarum, perquam similiū iis salis particulis, quas ante hæc, tam in vino quam aceto, exhibuisse me memini.

Aceti vero superficie innotabant plurimæ particulæ oleosæ rotundæ, quas ab caltharum foliis ortas fuisse mihi persuasi.

Liquores hosce permixtos postea denuo observavi, at eadem animadverti effecta.

Dein sumsi aliquantulum lacti dulcis, cui immiscui exiguum coaguli supra dicti copiam; lac hoc ita permixtum, quam citissime fieri potuit, visui meo ad-movi, vidique plurimas particulas rotundas, quæ
lac

lac nobis exhibent album , coagulari , cum incredibilis copia aliarum , minorumque , particularum inter & juxta particulas ferretur coagulatas ; ex quo spectaculo didici minores illas particulas , quæ materiæ illi fluidæ innatabant , alterius esse formæ , aliusque materiæ ab iis quæ coagulabantur ; præterea liquori innatantes vidi varios variæ molis globulos pellucidos , quorum minimi non majores erant illis globulis sanguineis , qui , ubi multi nobis simul apparent , sanguinem nobis exhibent rubrum ; at maximos , reliquis non minus pellucidos , alios viginti quinque quidem vicibus mole superare censebam ; hos autem globulos eos esse mihi persuasi , ex quibus butyrum fieret ; adeo ut hinc pateat coagulum vini suam exercere in lac , non vero in vinum ac acetum , quia neutrum eorum vitulis convenit.

Post hæc tertium jussi lanium , ut mihi ejusmodi lac , in intestino illo coagulatum , afferri curaret ; nactus igitur sum partem rotundam ,cujus diameter duorum circiter erat pollicum latorum ; figura vero ferme similis erat testis illis piscium testaceorum , quas petines , *St. Jacobs Schelpen* vocant ; cum pars ejus exterior crenis esset distincta , interior vero esset concava. Crenæ hæc exteriores , ut opinor , factæ sunt ab rugis , quas intestinum hoc , pene vacuum , contrahit.

His visis in memoriam mihi rediit , ante aliquot annos Medicum quendam , ex necessariis meis , mihi attulisse frustum materiæ cujusdam albæ , quod puella quædam eodem mane evomuerat , ac simul me rogasse , ut , si fieri posset , expedirem cujus materiæ frustum

illud evomitum esset. Postquam illam materiam aliquantulum separassem, eamque microscopii ope observassem, censui eam esse lac coagulatum, atque eam puellam parvo ante tempore lacte fuisse usam, quod & verum esse compertum est.

Exinde etiam cogitavi fieri posse, ut partes illæ, sive lactis, sive alterius cujusdam cibi, in stomacho coagulatae & induratae miram quandam nanciscantur figuram, adeo ut per gulam egestæ quandam ranæ similitudinem præ se ferant; atque inde nata potuit esse fabula, quam mihi obtrudere quidam voluerunt, quod nempe aliquis, cui tale quid acciderat, ranarum semen imbiberit, & ex eo in ejus stomacho orta fuerit rana.

Porro adii lanium eo ipso tempore, quo intestina ex vitulo recens mactato eximebat; hic etiam vitulus viginti quatuor horarum spatio lac non biberat, & tamen comperi aliquam adhuc lactis coagulati copiam inveniri in intestino illo, sæpius supra memorato.

Lanius ille mihi asserebat se nunquam lac coagulatum in minori illo ventriculo, *de Souter* dicto, reperisse, & tribus horis, postquam vitulus lacte usus fuit, jam intestinum illud, *Lebbe* vocatum, plenum esse ac tumidum lacte coagulato, aliaque materia tenuiori; & ex eo tempore materiam sensim in illo intestino minui, atque in aliud tenuius intestinum demitti.

Ex eodem etiam didici lanio, lactis coagulationem similiter peragi in agnorum subrumorum stomachis, & si illi agni matribus suis eripiantur, ac dein lacte bovino saginentur, tum majorem esse ejus lactis coagulationem, quam

quam si materno fruantur lacte ; idque eam ob causam (ut perspicax ille lanius addebat) quod lac ovinum plus in se habeat pinguedinis.

Dein lac dulce magnæ coaguli copię immiscui, scire cupiens num omnes illæ particulæ minores, quas sine coagulatione, liquori pellucido innatantes, me vidisse ante dixi, hoc pacto coagularentur ; at quotiescumque & quamcunque coaguli copiam lacti affunderem, multæ tamen particulæ, seu potius globuli, liquori pellucido innatare perseverabant, nec ullam in iis coagulationem animadvertere potui.

Cum autem aquam illam destillatam, quæ lacti coagulato infusa fuerat, intuerer, ei innatantem vidi incredibilem minutissimarum particularum copiam, quibus ob nimiam earum exiguitatem nullum aliud nomen assignare potui, quam globulorum.

Num vero particulæ salinæ, quæ lacti coagulato insunt, eam in aquam pluviam exercuerint vim, ut multæ etiam ex aqua particulæ sint coagulatae, adeo ut microscopio conspicuæ redderentur, id hætenus investigare mihi non licuit.

Postea semel iterumque manum meam acu pupugi, adeo ut ad utrumque ictum sanguinis gutta ex ea efflueret, cui statim aliquantulum coaguli immiscui, observaturus num etiam in sanguine non magna videri posset partium coagulatio ; idcirco sanguinem ita permixtum aliquoties coram oculis (microscopio armatis) motitavi, quod haud injucundum mihi præbebat spectaculum ; incredibilis enim globulorum sanguineorum, per se mutuo volutorum, copia non sine admiratione apparebat ; præterea censebam globulos illos
minus

minus coagulari, quam si nullum iis additum fuisset coagulum.

Cæterum cum jam sanguis medii minuti spatio coagulo fuisset permixtus, detexi multas particulas pellucidas, agitato huic sanguini innatantes; harum quidem moles aliquantulum augebatur, at tamen adeo erant minutæ, atque ab particulis circumjacentibus ita pressæ, ut nulla in iis figura dignosci posset; tamen, quantum visu assequi valui, videbantur particulæ salinæ irregulares, æque singulæ diversæ formæ, atque ita coagulatae, uti saccharum liquefactum iterum induratur.

Haftenus autem impervestigabile mihi fuit an ea partium coagulatio facta sit ex sale in lacte, an in sanguine latente, an ex utroque.

Dein sumsi guttulam aquæ ab coagulo destillatæ, eamque bis terve gustavi, ejusque saporem magis amarum quam acidum esse comperi.

Cum jam videamus quanta partium coagulatio fiat in lacte, ope lactis coagulati in certo quodam vituli intestino; quis norit quæ coagulatio, non modo lactis, sed & vini, aceti, salis &c: particularum, in stomachis nostris peragatur? Utique id certum est in infantibus lactentibus, lac maternum nimia copia ab iis suctum, ac statim ab iis evomitum, quam primum ab ubere materno sunt avulsi, jam esse coagulatum; adeo ut hinc colligendum sit, coagulationem in stomachis nostris esse necessariam, quod & antea sæpius a me dictum est.

Antea dixisse me memini, ubi cretam vino aut aceto inderem, tunc particulas salinas ex vino aut aceto aliam nactas fuisse figuram, multasque ex aceto prodiisse aeris bullulas.

Hac

Hac igitur occasione iterum animi gratia duas particulas cretæ , arenulis non majores , aceti guttulæ indidi , atque iterum animadverti ex illis cretæ particulis tam incredibilem prodire aeris bullularum copiam , ut eam non facile , nisi testi oculato , persuaferis.

Hæ cretæ particulæ in aceto quiete non jacebant , sed movebantur , quia non modo ab omnibus lateribus , quæ cernere dabatur , aëris conficiebantur bullulæ , sed & ex bullulæ in fundo excitabantur.

Illæ autem aeris bullulæ , quæ prodibant ex eo loco , ubi creta vitri fundum premebat , quoties illic bulla formaretur , cretam parumper ab vitro elevabant ; quoniam vero eæ bullæ modo ex hac , modo ex illa cretæ parte prodibant , creta in continuo servabatur motu , imo & nonnunquam aliquantulum protrudebatur , idque tamdiu donec aeris bullulæ essent confectæ.

Hæc dum chartæ mando , subit mihi , quod cum ante aliquot annos Medicus quidam me in Musæum suum , variis rebus visu dignis refertum , deduceret , is mihi inter alia , ut miri quid exhibuerit duas partes rotundas ac planas , quæ superficiem suam habebant rosæ figuræ similem , quarumque crassities cultri partem superiorem circiter æquabat ; hæ quoque mole sua non excedebant digitorum nostrorum ungues , & colorem habebant cinereum.

Hæ partes ita constitutæ imponebantur patinæ , dein tantum iis infundebatur aceti , ut vix ab eo tegerentur , mox vero inde aliquis iis indebatur motus , quo lente , modo versus hanc , modo versus illam partem aliquantulum propellebantur.

Z

Tunc

Tunc Medico illi me roganti quænam esset hujus motus causa, respondi me non tantum ejus agitationis percipere rationem, sed & me nullum dubitare, quin ejusdem molis possem præparare particulas, quæ eandem habituræ essent agitationem, quam in partibus supra dictis cernere licebat.

Hoc ut efficerem sumsi duas ex maximis quæ dantur, partibus oculorum, ut vocant, cancerorum, has lima usque adeo imminui, ut planæ essent, dein superficiem earum in rosæ figuram efformavi, ac tum Medicum illum domum meam arcessivi, ut partium hoc modo præparatarum agitationem mecum contemplaretur, quæ eadem plane fuit, quæ fuerat earum partium quas apud Medicum illum videram, ac præterea addidi rationes ejus agitationis, quas antea de particulis cretæ aceto impositis protuli, quibus illi Medico satisfactum fuit.

Ante hac dixi me in coagulo saporem animadvertisse magis amarum quam acidum, unde ratus sum forte fellis ope lactis coagulationem peragi.

Hac in re ut mihi satisfaceret statui adire lanium, ut inquirerem num fel in intestinum illud, quod *Lebbe* vocant, infunderetur, mox vero vidi fellis vesiculam non infundi in illud intestinum, sed paulo infra illud in aliud intestinum magis tenue.

Dein fellis vesiculam abscindi curavi, ita ut pars ejus arteriæ sive vasis, per quod fel in intestinum infunditur, maneret intestino affixa.

Partis hujus intestini utraque extremitate feli ope obturata, vasi, sive arteriæ, per quam fel transit in intestinum, ingessi tubum cavum, ejusque ope in-
testinum

testinum vento replevi, quem tamen ad me per eandem aperturam non sensi redeuntem, unde collegi, in intestino esse valvulam, ita ut fel quidem ex vesicula in illud intestinum posset infundi, at non ita vice versa chylus ex intestino in fellis vesiculam.

Post hæc intestinum hoc aperui, ut valvulæ ejus formationem viderem; & comperi vas illud, sive arteriam felleam non directe in intestini penetrare cavitatem, sed eam prius per digiti circiter lati spatium ferri inter partes, sive membranas, intestinum illud constituentes, atque illic aperturam habere oblongam, per quam fel in intestinum infunditur, adeo ut ejus aperturæ obturatio valvulæ nomen non mereatur, quia apertura oblonga & juxta intestini sita est longitudinem; quæ idcirco potius dici potest cæsura, cujus utraque extremitas instructa est partibus aliquantulum in rotunditatem eminentibus; hæ partes eminentes, ubi ventus per arteriam in intestinum inflabatur, atque ideo cæsura illa juxta longitudinem suam aperiebatur, quam primum ventus intrasset, ad se mutuo accedebant, atque aperturam occludebant; non secus ac si videremus duo labia tam arcte occlusa, ut nulli aut aquæ, aut aëri per ea pateret aditus.

Tum vero fel ex vesicula sua effudi in chartam bibulam, ut materia ex eo subtilissima & fluidissima per chartam illam destillaret, atque ita ego haberem fel magis tenue & fluidum, quam id quod in vesicula erat; sed quantumvis fluidum fel nobis videretur, nil tamen ex eo per chartam bibulam emanabat, præter, post undecim horarum spatium, sex, octove guttulas. His visis cogitavi, sicuti fel chartam illam bibulam

ægre penetrare potuit, multo minus id posse transfundi ad minutissima illa vascula sanguinea, quorum magno numero intestina interiora sunt obsita, quæque a chylo passim impelluntur.

Postquam jam lac coagulatum, cui aliquantulum aquæ infusum erat, biduo in vitro fuerat, odorem nactum erat adeo acidum, acsi lactis serosi acidissimi odorem percepissemus.

Cum jam, ut supra narratum est, videamus aliquot partes lactis coagulati amplius viginti quatuor horis posse manere in vituli intestino; cur non censere licebit, idem in nostris stomachis fieri posse, & lac ejusmodi, aliosve cibos in ventriculo reliquos quandam acquirere posse aciditatem, cujus sapor, ubi ructus sursum fertur, simul in os nostrum inferri potest?

Sed ubi subinde aliquam in ore nostro animadvertimus aciditatem, aut fellis quid in os adscendit, non statim ad minimum incommodum censendum erit id oriri ex nimio acido felleve. Nec similiter, ubi infantis cujusdam lactentis excrementa constant partim ex partibus coagulatis, partim fluidis, statuendum est id etiam fieri ex nimia acidi in stomacho abundantia. Quod ad me, ego potius censerem in ejusmodi infantis ventriculo non sufficere materiam, quæ lac maternum coagulari faciat, quod si fieret, excrementa non essent tam fluida, sed magis dura.

Non sine stupore nuper domi meæ narrantem audivi Dominum quendam, Chirurgum de infante suo lactenti, & quatuor aut quinque vix menses nato, cui aliquot in labiis prodierant tuberculi aqua repleti, censuisse id malum originem suam debere nimio acido

in

in ejus infantis ventriculo latenti. Certe mirari licet hominis ejus stupiditatem, & multo magis cum ob tam egregia responsa etiam magni haberi ab iis, qui dicta ejus pro oraculis habent.

Cum Medico cuidam Celebri, qui nostras regiones quotannis visitare solet, & me obiter etiam compellere, narrarem quantopere Medici ac Chirurghi passim in ore habeant morbos, ortos ex acido in stomacho, ut & fellis abundantia; is mihi asseruit multos oriri morbos ex fellis defectu, seque id quotidie experiri. Idem etiam Medicus existimabat acidum stomachis nostris esse necessarium, & raro ejus nimiam in stomacho inveniri copiam.

Lanius mihi domum meam misit fellis vesiculam ex vitulo excisam; quæ, cum omni plane felle esset vacua, conjeci fel casu quodam esse effusum, at postea didici nullum in ea vesicula inventum fuisse fel, ac sæpius id contingere ut fellis vesicula plane vacua inveniat.

Sed quid dicemus videntes quantopere tabaci usus extollatur apud multos, cum acidum plane contemnatur; non secus ac si omnium corpora plane eodem modo forent constituta.

Quod ad me, cum ego ante multos annos uterer tabaco, ad dentium dolorem ejus ope pellendum, antequam pro media unius fistulæ parte esset herba consumpta, tantam contraxeram infirmitatem, ut necesse haberem foco adjacere, imo & ægre ferrem si quis me modo alloqueretur. At e contrario omnis acidi, sive in cibo, sive cum cibo sumpti, usus mihi semper optime cedit.

Tandem , ut verbo dicam , ipsi melius observare possumus quid corpori nostro profit , quid minus ; quam ut alii nobis persuadere velint , hos cibos sanitati prodesse , hos obesse , ab his cibis cavendum esse , non item ab aliis.

Non possum quin his addam , me aliquoties prandisse cum viro quodam , cui , ubi salmones cum aceto , aliosve pisces , quibus embamma ex butyro & aceto constans superfunderetur , ederet , non modo sudor undique erumpebat , & ex facie defluebat , sed cum facies tum collum plane sanguineum induebant colorem ; nec tamen is verebatur aceto uti , affirmans nullam aliam ei ab aceti esu inferri noxam. Alteri aceto vescenti sudor usque adeo in naso & juxta oculos erumpebat , ut guttatim ex naso deflueret. Ex eo autem , quod videamus tam varia in variis hominibus aceti effecta , colligere licet , quam varios quoque eventus fortiantur necessario medicamenta , in variorum corporibus.

Cum vero videmus partes lactis , in intestino vituli coagulatas tam arcte esse compressas , cogitare oportet , lac primo leviter tantum cohærere , at arctam illam compressionem tantum oriri ex illa vellicatione quæ in stomacho & intestinis sæpius fit spatio unius minuti.

Ab Ianio etiam domum meam attuleram ventriculum illum minorem , *de Souter* dictum , cujus pars interior particulis foliorum instar erat obsita , in hoc reperi stramen contritum ; quoniam vero vitulis saginatis (qualis is erat , ex quo hic ventriculus erat excisus) nil solent præbere nisi lac bibendum , id maxime mirabar ; sed postea edoctus fui , vitulos , quantumvis
multo

multo saginentur lacte , semper tamen edere velle , ideoque nec abstinere stramine in quo jacent.

Ubi minorem hunc ventriculum aperirem , vidi eum circa ejus extremitatem , ubi incipit illud intestinum , quod laniorum filii *de Lebbe* vocant , instructum esse duodecim exiguis organis , singulis diversimode formatis , quædam enim inflexa erant instar uncorum , alia etiam partes habebant aduncas ex dura quadam materia constantes , alia erant aspera ac varie protuberantia , non secus ac si illa organa illum solummodo in finem forent formata , ut cibos evehendos adhuc magis imminuant.

In stomacho majori , seu proprie dicto , ubi ventriculo illi minori conjungitur , pars quædam instar sacci erat extensa , in hac ego animadverti duri quid , juglande paulo majus , quod exsectum comperi nil aliud esse præter magnam pilorum complexorum copiam , quos , ut opinor , vitulus lingua sua aspera lambendo ab cute sua avulsi ; atque illi sensim in illa stomachi parte conglomerati , illic ex continua illa stomachi agitatione , & compressione , rotundam hanc nacti fuere figuram. Hæc pilorum sphaera lanio incognita non erat , dicenti sæpe tales in vitulis inveniri , imo & aliquando quadruplo majores.

Cum igitur , Vir Illustrissime , videamus magnam illam coagulationem , quæ in animalium ventriculis , aut intestinis peragitur , ex eo tuto colligere licet , talem etiam necessario in stomachis nostris fieri coagulationem , ut cibi nobis alimento cedant.

Si enim nulla lactis in exiguorum animalium stomachis fieret coagulatio , lac paucarum horarum spatio
ex

ex stomacho ad intestina deferretur , atque adeo parum alimenti ex lacte ad eorum corpora transfiret.

Adhæc si consideremus feras in desertis degentes ut sunt V: G: Cervi , cuniculi , lepores &c: foetus suos sub diluculum abscondere solere , nec ante vesperam ubera iis præbere , certe si lac ex uberibus maternis haustum in illorum stomachis non coagularetur , & partes sic coagulatae sensim versus intestina demitterentur , illa animalcula , ut opinor , non tam diu sine ubere materno manere possent.

In hac mea opinione confirmatus fui , edoctus ex Ianio quodam , ubi excrementa vitulorum aut agnorum subrumorum sunt tenuia ac fluida , tunc eos parum alimenti ex cibis suis accipere , atque etiam tum temporis nullum lac coagulatum , nec in vitulorum intestino , nec in agnorum ventriculis inveniri. Si igitur , ut omnia in unum contraham , coagulatio in stomachis nostris ope acidi fiat , cum vulgo ajant omne acidum facere ad coagulationem , acidum censendum est nobis utile , imo necessarium.

Facile mihi persuadeo , hæc mea observata quibusdam displicitura , dicturis , me suturem ultra crepidam meam sapere velle , sed parum ego talium judicium aut verba curo , idque eo minus , quod cuivis emunctæ naris homini notum sit , multa apud Medicos per meras conjecturas agi ; quod cum ita sit , utique æque licet mihi mea cogitata circa has res proferre , ac multis insciis Medicis , Chirurgis ac Pharmacopolis , qui vix Medicinam a primo limine salutarunt , & tamen praxin Medicam exercere non verentur , quantumvis ignari constitutionis corporis humani , cujus
tamen

tamen notitia plane necessaria est , ut rectum de re Medica iudicium ferri queat.

Sed , ad finem properans , id solummodo adjungam , me inter has meas observationes denuo spectasse interiora , tam boum , quam vitulorum intestina , atque in illa materia , quam chylus passim versus intestini latera impellit , quæque ab multis hominibus pro phlegmate intestinorum habetur (ut in quadam ex prioribus meis epistolis scripsi) denuo mihi tot apparuisse minuta vasa sanguifera , ut non facile quis crediderit , nisi ipse eorum numerum viderit.

Si autem fieri posset , ut in exiguis his vasculis sanguinis videretur cursus ac periodus , ac præterea observare liceret quo pacto materia ex chylo ad vasa illa transeat ; quantopere miraremur stupenda illa naturæ effecta , cum jam nos contentos esse oporteat earum rerum fictis ex cerebro ideis ?

Sed hisce finem imponam , sperans fore , ut quædam in his meis observatis inveniantur , quæ Tibi , Vir Illustris , non displiceant &c.

Dabam Delphis , Pridie Iduum
Septembrium 1696,

Epistola 107.

Data ad

*Amplissimum & Gravissimum Virum***D^m. HENRICUM BLEIS-
VICIUM. J. U. D.***Vrbis Delphensis quondam Consulem,**& Rebus Indicis Orientalibus Præ-
fectum &c. &c.*

In qua asseritur

*Pisces in aquis limpidis & fluentibus nullis
obnoxios esse morbis. Haleces ab piscatoribus no-
stris captas annum nondum esse natas, & ortas ex
lactibus & ovis præterito anno emissis. Haleces,
lactibus ovisque suis emissis, ex mari Septentrionali
migrant, nec unquam in illud revertuntur. De ha-
lece supra modum magna. Haleces in sinum Hollan-
diæ Australem veniunt ad ova sua illic parienda.
Pisces alosæ Elft dicti intrant flumina, ut lactes
ac ova sua in iis emittant. De araneo marino,
Belg: Pieterman, & acutis ejus circa caput pinnis.*

Com

Conjectura circa magnum dolorem ad ejus punctum excitatum. De punctu scorpionum, & polyporum Indicorum. Censuerunt antehac piscium squamas quotannis novo circulo cingi, easque sic mole augeri, at in hac opinione errarunt. Quod pro circulo priorem squamam cingente habebant, est squama plane nova, priori conjuncta. Squamarum incrementum quotannis aliquo temporis spatio cessat. Piscium duodecennium singulæ squammæ constant ex duodecim squamulis coacervatis. Perca longior duodecim pollicibus latis, & tamen quinquennium nondum nata &c.

Amplissimo Viro,

D^o. HENRICO BLEISVICIO &c.

ANTONIUS a LEEUWENHOEK S.D.



Ostiores meæ litteræ ad Te, Vir Gravissime, datæ erant &c:

Antea scripsi pisces degentes in fluminibus, & aquis profundissimis, aut semper agitatis, nullis obnoxios corruptelis morbisve, ac nunquam præ ætate mori.

Ex eo tempore sæpe cogitavi de halecibus, atque eum in finem subinde halecum contemplatus fui squamas, ac passim mihi persuasi omnes haleces, ab piscatoribus nostris captas, quantum mihi videre licuit, annum nondum natas esse.

Adhæc attendi ad haleces sub initio mensis Junii captas, & clanculum (quod tunc temporis per leges

haleces nondum captare liceat) aliquando mihi donatas, & animadverti eas passim valde esse minutas, præ illis, quæ uno aut altero mense serius capiuntur.

Præterea cogitavi omnes forte haleces, quæ in mari Septentrionali capiuntur, ortas esse ex lactibus & ovis præterito anno partis.

Si enim pro certo habeamus omnes pisces, nobis notos, ubi primum lactes ac ova sua emittunt, annum nondum natos esse, atque ex eo halecum genere, quæ hoc anno capiuntur, plerasque iterum lactes & ova sua emissuras, atque ex illis prodituras omnes haleces proximo anno capiendas; quod si aliter se haberet, certe inter haleces invenirentur quædam, alias mole longe superantes, ut in omni piscium, squammis tectorum, genere observare licet; inde etiam colligere poterimus, ubi haleces lactes & ova sua pepererunt, eas, si non statim, saltem non longo post tempore ex eo mari migrare, nec unquam eo redire.

Ante viginti circiter annos mihi narratum est, in Urbe nostra fuisse halecem supra modum magnam, quæ tunc temporis Magnatibus quibusdam una pransuris, ob rei novitatem, pro munusculo offerebatur. Hæc halec, ut verosimile mihi videtur, ab grege aberraverat, vel in mari nostro remanserat.

Cum itaque videamus in mari vicino nullas capi haleces, uno anno natu majores, easque tunc ab littoribus nostris discedere, adeo ut nullæ earum anno sequenti capiantur, quænam alia hujus rei excogitari potest causa, præter eam, quod haleces, majores factæ, plus indigeant alimentis, ad incrementum & sustentationem suam, quam in mari nostro comparare sibi queant; quod.

quodque idcirco haleces ad ea migrent loca, ubi major solidiorque alimentorum ipsis suppetat copia.

Non semel etiam cogitavi de halecibus, quæ tempore verno magna copia in sinu Hollandiæ Australi capiuntur, atque eo, ut opinor, tantummodo perveniunt, ad semina sua emittenda. Multas etiam harum halecum squamas observavi, & passim censui, eas primum ætatis annum non excedere.

Ut verbo dicam, arcana piscium in mari latentium, tam in eorum adventu, versus quasdam plagas, quam in decessu, non facile quis plane investigabit: quid enim dicemus de alosis, Belg: *Elft*; hi namque pisces, ubi generationis adest tempus, in fluviis nostris inveniuntur; at seminibus emissis denuo se ex fluviis proripiunt; nec unquam, quantum ego resciscere potui, ex eo tempore in mari capi solent.

Ita etiam aranei marini, nobis *Pieterman*, ante triginta circiter annos magna copia circa littora nostra degebant, & magno sæpe numero in Urbem nostram venales advehebantur; nunc vero miri quid videtur, si octo decemve ejus generis pisces simul, idque bis terve integro anno, capiantur.

Acutæ illæ pinnæ, quas illi pisces ad utrumque capitis latus, ut & in ipso capite ac cervice habent, valde feruntur venenosæ, sic ut præteritis temporibus asserere non dubitaverint, variorum manus pedesque ex earum pinnarum ictu fuisse contractos, & paralyfin passos.

Antea sæpius earum pinnarum extremitates contemplatus fui, sed ne vel minimam in iis aperturam, nec acumen, quod extraordinarium in punctione excitare posset dolorem, detexi; atque inde excogitare non potui rationes tam vehementis ex ea punctione orti

doloris; cum sæpe viderim piscarias quasdam, quæ, dum caput ejus piscis abrumperent, & cutem ei detraherent, earum pinnarum acumen non satis evitarant, præ nimio dolore lamentantes.

Cum autem viderem hac æstate tres hujus generis pisces venales, jussi eorum capita mihi asservari.

Earum iterum pinnarum, quas tantum in punctu suo excitare dixi dolorem, extremitates microscopii ope observavi, sed eundem quem antea, habui eventum.

Oculis vero aliquantulum infra extremitates illas demissis, vidi eas pinnas, sive aculeos tectos esse membrana quadam punctis variegata, & sub illa membrana, ab utroque pinnarum latere, satis profundas latere crenas, juxta pinnarum longitudinem latas, & ex parte repletas liquore quodam limpido, & (ut nudo oculo videbatur) aquoso.

Ex hoc spectaculo mihi persuasi, ubi eæ pinnae usque adeo intra hominum cutem intruduntur, ut ea membrana, quam pinnas tegere dixi, loco suo moveatur, atque hoc pacto liquor, in pinnarum crenis latens, cuti ingeratur, idque tam alte ut ille liquor sanguini permisceatur; tum magnum ex illo ictu oriri dolorem; at ubi pinnae non ulterius cuti intruduntur, quam usque quo sunt rotundæ, nec crenæ illæ pertingunt, tum non tantum expectandum esse dolorem.

Et idem etiam observare licet in scorpiorum ictibus: nempe in extremitate aculei scorpiorum exigua est apertura, ex qua, ad aculei punctiōnem, exigua profertur liquoris guttula, quæ simul cuti ingeritur: quod non secus fit in ictu Polypi Indici, ut antea a me vulgatum fuit.

Antehac etiam ex anguillarum decumanarum, aliarumque, squamis detexi illorum piscium ætatem, præterea

terea me dixisse memini, pisces squamas mutare non solere, uti squamæ, cutem nostram exteriorem constituentes, mutari solent, sed piscium squamas quotannis novo quodam circulo circumdari, atque hoc pacto illas squamas quotannis mole augeri.

Hæc fuit aliquot annis mea, circa squamarum piscinarum augmentum, opinio; at observationes meas circa hanc rem ulterius profecutus, aliquo ab hinc tempore comperi me in ea opinione errasse; ubi enim quasdam squamas attentius intuerer, animadverti majorum natu piscium valde esse crassas, & quidem crassiores quam esse potuissent, si squamæ quotannis novo tantum circulo cingerentur.

Tandem igitur detexi eam partem, quam primò habueram pro circulo, de novo priorem squamam circumdante, revera esse partem squamæ recens factæ; imo eam partem quam circulum prioris squamæ esse cogitaveram, revera esse eam qua squama recens facta priorem magnitudine superabat.

Ubi vero coacervatas has squamas a se mutuo separare conarer, comperi aliam ex alia excrevisse; hujus autem tam arctæ harum squamarum conjunctionis hanc excogitavi causam.

Ubi pisces annum jam nati sunt, squamarum, ut opinor, incrementum exiguo quodam temporis spatio cessat; uti videmus pilorum animalium, ut & volucrum plumarum incrementum aliquantulum cessare, & paulo post novos iterum animalibus pilos, & alitibus plumas excrecere incipere. Si enim pilorum plumarumque incrementum nunquam aliquo tempore cessaret, nunquam etiam pilos plumasve excidere posse mihi persuadeo.

Atque ita squamarum piscinarum incremento exiguo

tan-

tantum temporis spatio cessante, aliæ denuo postea formantur squamæ, quæ prioribus squamis conjunguntur.

Quoniam vero squamæ piscis biennis necessario majores excrescunt prioribus, hinc fit ut squamæ piscis biennis undique priores tegant, & ultra eas protendantur.

Sicuti autem fit in squamarum incremento secundo anno, similiter id observari potest tertio & sequentibus annis; adeo ut per consequens piscis duodecennis squamæ singulæ constent ex duodecim squamulis coacervatis, iisque tam arcte conjunctis, & præcipue in mediis squamis, ut exigua tantum parte a se mutuo queant separari; reliqua vero parte separari nequeunt, nisi vi disrumpantur.

Posteriores, quas observavi squamas, erant percæ, duodecim pollicum latorum longitudinem superantis. Hæc perca capta erat in aqua, in qua apuæ (*Spiering*) magna copia progenerantur, quibus percæ illic loci vescuntur & maxime saginantur, unde & ibidem citius mole augentur, quam in aliis aquis.

Unam ex hujus percæ squamis, quantum sine laceratione fieri potuit, separavi, eamque microscopio opposui, ac aliis exhibui, qui mecum distinctissime viderunt eam squamam ex quinque squamis coacervatis constare; igitur illa perca quinquennium nata erat.

Si autem in piscium squamis non quotannis novæ squammæ prioribus jungerentur, majorum piscium squamæ necessario valde forent fragiles, infirmæ ac tenues, sicuti passim comperi squamas halecum, licet satis magnarum, tamen esse tenuissimas. Vale Vir Amplissime, & mihi fave &c:

Dabam ex Musæo meo V. Kalend.
das Octobris 1696.

INDEX

I N D E X

Rerum præcipuarum hoc Libro contentarum.

A.

ACARI florum myristicorum
exhalationes non ferunt.

pag. 108

— alterius formæ, quam vulgares
nostri acari. 132, 133

— magno numero in una fico re-
perti. 134

ACETUM quosdam homines lu-
dere facit. 182

ACIDUM sanitati non obest. 169

— in os nostrum ex stomacho sur-
sum latum, unde. 180

— necessarium est mortalibus. 184

ACULEUS pediculorum masculi-
norum. 60

— extra corpus protruditur, ubi
duriuscule tractantur. ibid:

— delineatus. 73

AER, quantum aeris ab pulvere ni-
trato incenso proveniat: &
quomodo consentur vitra
huic experimento capiendi
idonea. 2, 3

ALÆ muscarum ex Rosarum pedi-
culis ortarum, & duplici pli-
ca intra eorum corpus jacen-
tium. 11

— tenuissima in iis vascula. ibid.

— animalculi volatilis, in flori-
bus myristicis inventi, deli-
neatæ. 96

ALITES etiam se mutuo vescuntur.
152

ALOSÆ in flumina nostra adscen-
dunt ad ova sua emittenda. 189

ANGUILLÆ masculinæ nullæ de-
tectæ. 129

ANIMALCULA reperta in Rosis.
9

— eorum forma & generatio inve-
stigata. 10, &c.

— mutantur in exiguas muscas,
quarum alæ tripliciter sunt
complicatæ. 10

— multiplicia intra partes pisculen-
tas concharum, sive ostreorum,
quæ Veen-Oesters vocantur.
19-21

— sibi mutuo occurrentia tam ar-
cte cohærent, ac si coissent. 21

— hæc valde sunt exigua. 22

— quæ existimantur esse semen ma-
sculinum concharum sive os-
treorum, quæ Veen-Oesters
vocant 19

— quæ revera talia erant. 21

— reperta in aqua cui conchæ erant
injectæ. 31

— hæc concharum innatarum par-
tes carneas comedunt. 32

— subita eorum progeneratio in a-
qua cui concha, testis suis ex-
empta, inerat. 39. &c.

— plura in mari latent, quam un-
quam quis cogitavit. 49

— nuces myristicas perrodentia, id
peragunt in ea parte, ubi nucis
cortex mollior est. 100, 101

— passim eam nucis partem pe-
netrant, in qua recens planta
latet. 106

I N D E X.

- in ostreis inventa, quæ pro ovis haberi poterant. 143
- sunt ostreorum semen masculinum. 144
- in semine ostreorum masculino ex utroque constant sexu. ibid.
- in semine ostreorum masculino magno sunt numero. ibid.
- reperta in tiliarum foliis. 150
- hæc foetus procreant. ibid.
- volatilia orta ex vermiculis, in floribus myristicis inventis, delineata. 87, 94
- orta ex vermiculis albis in ligno querno inventis. 163, 165
- subere etiam vascuntur. 165
- ARANEI MARINI** punctus, cur adeo sit periculosus. 190
- ARIDITAS** frondium non oritur ex ventis asperis, sed ab erucis. 154, 155
- ASELLI** majores destituti sunt vasis adipiferis. 54
- unde eorum oriatur insipiditas. ibid.

B.

- BULLÆ AERÆ** in Metallo Tartarico. 112
- maxima copia in aceto infuso oculis cancerorum, aut cretæ. 177, 178

C.

- CANCRI** magni marini pedum posteriorum extremitates instructos habent pilis, qui armati sunt binis, ferrarum instar, dentibus, quorum ope rupes adscendere queunt. 140

- CIRCULATIO** sanguinis visa in minutissimis anguillis. 131
- COAGULATIO** lactis æque fit in ventriculis agnorum subrumorum, quam vitulorum. 174
- in stomachis nostris necessaria est. 183, 184
- COAGULUM** permixtum vino & aceto, & ejus effectus. 172
- permixtum lacti. 172, 173
 - sanguini. 175
 - amarum habet saporem 176, 178
 - aliquamdiu sepositum acidum habet odorem. 180
 - Meet dictum, quid? 171
 - non invenitur in ventriculo minori vitulorum.
 - non repperire est in vitulis, nec agnis subrumis, ubi eorum excrementa sunt fluida. 184
- CONCHÆ**, absurda circa eas sententia, quod nempe ex aere decident, aut ex vaporibus marinis oriantur, proposita, & rejecta. 28, 29.
- CONCHÆ**, quas Veen-Mosselen vocant observatæ. 18, &c.
- ovarium in iis repertum. 19
 - singula ova membranæ sunt inclusa. 20
 - ova in iis lingulis sunt conjuncta. ibid.
 - materia in earum intestinis ex cæno constat & minutissimis arenulis. ibid.
 - quomodo locum suum mutant. 23
 - conchæ nondum natæ in iis repertæ, æque jam adeo perfectæ, ut earum testæ dignosci possent. ibid.
- earum

I N D E X.

- earum, licet membranis adhuc involutarum, vita & agitatio. 26
- eæ delineatæ. 27
- delineatæ. 25
- cur non majori numero procreantur. 33
- innatæ aquæ impositæ, ut appareret num superstites manerent. 31
- CRETA aceto imposita modice agitur. 177

E.

ERUCÆ ortæ ex muscis nigris, malis valde perniciosis, in pupulas mutantur. 155

F.

- F**EL quomodo in intestinum infundatur. 178, 179
- FELLIS vesicula felle vacua. 181
- FICOS consumptas pediculis ortum posse dare risu dignum est. 135
- FLORES MYRISTICI ab vermibus intra foliorum membranas exeduntur. 87
- eorum albedo non oritur ex eo quod non satis prospere creverint. 85 & 87
- sed ex vermium perforatione. 88
- folium delineatum. 97
- FOLIA omnium germinum tenuibus involuta sunt membranis. 17
- FORMICÆ non mordent, at aculeo pungunt, & simul liquorem quendam cuti ingerunt. 119

- resinam non conficiunt, at ex ea aluntur. 118

G.

GALLINÆ silicibus & calce destitutæ aciculas deglutiunt, quæ per musculos carneos, & per ipsum stomachum penetraverant. 51

GLOBULI in lacte visi, eæ erant partes quæ butyrum constituunt. 173

H.

- H**ALECES, cur nullo vesci dicantur cibo. 48
- cur modo in alto mari, modo circa littora capiantur. 49
- multo gaudent adipe. 46
- quis in earum stomachis invenitur cibus. 46-49
- cibo destitutæ propriis vescuntur ovis. 50
- quodcunque obvium consumunt. 53
- earum ova adeo sunt dura ut in stomacho conteri nequeant. 52
- omnes quæ ab Nostratibus capiuntur unum tantum annum natæ sunt, & ortum ducunt ex ovis lactibusque, præterito anno emissis. 188, 189
- in sinum Australem veniunt ad ova sua & lactes emittendos. 189

J.

JONSTONI de pediculorum genera.

I N D E X

neratione sententia. 78, 79
 — refutata. 80, 81

L.

LAC arctissime coagulatur in vitulis. 171
 — æque coagulatur in ventriculo agnorum subrumorum, ac in intestino vitulorum. 174
 — ejus partes, quæ ope coaguli non coagulabantur. 173
 — coagulatum ab puella evomitum. 173, 174
LEBBE nomen intestini cujusdam in vitulis. 171
LIGNA querna ab vermiculis perrosa, licet nulla in cortice apparerent foramina; ejus rei rationes. 160
 — quæ subito excrescunt sunt solidiora, & vermiculorum perforationi minus obnoxia, quam ligna tenuiora. 165
 — cortice suo testâ vermium rosioni magis sunt obnoxia, quam ligna decorticata, & ejus rei rationes. 165, 166

M.

MEDIUM depellendis insectis aromatibus perniciosus. 107
MEMBRA pediculorum genitalia. 60
 — delineata. 70, 71
METALLUM Tartaricum liquefactum magnam bullarum aerearum copiam ebullire facit. 112
METALLA ab rerum principio

lapidibus inhædere, nec eos penetrare queunt. 114-117
 — quomodo ope vaporum sursum latorum augeri possint. 117
MODUS quo auctor aquæ divisionem, & animalculorum supputationem instituere solet. 40-41
MORBUS ex tabaci suatione ortus. 181
MOTUS cordis celerrimus, & sanguinis protrusio in minutissimis anguillis. 131
MUSCÆ ortæ ex Rosarum pediculis. 10
 — earum alæ tripliciter complicatæ. ibid:
 — — tenuissima in iis vascula. ibid:
 — motus Chyli in earum intestinis. 12
 — ortæ ex animalculis in Cerasorum frondibus degentibus. 12
 — nigrae ortæ ex minutissimo vermiculo, qui corpus animalculi, in tiliarum frondibus reperi, penetraverat, & quomodo id fieri queat. 152, 153
 — — mira earum, ut & ovorum, ex earum corporibus exemptotum, parvitas. 153
 — — causa sunt ariditatis novarum frondium. 154, 155
 — ex aquis non prodeunt. 154

N.

NUBES in aere suspensæ manere non possent, si tellus non quotidie in orbem ferretur. 124

NUX

I N D E X.

NUX MYRISTICA, cortici suo
& floribus involuta, depicta. 101
— quo pacto alatur. 101, 102

O.

OSTREA, inter conchas capta,
observata. 8

— ova in iis reperta, sed non us-
que adeo perfecta, ac antea. 8

— innata magno numero in ostreo
fœminino detecta. 145

— masculina, multa continent ani-
malcula, quæ semen masculi-
num conficiunt. 144

— cur tum maxime dicantur tem-
pestiva & sapida ubi mensis no-
men ingreditur littera R. 157

OVA sive ostrea innata reperta in
ostreis inter conchas captis. 8

— non adeo perfecta, ac ea quæ
antea visa fuerant; ejus rei
rationes. ibid:

— magno numero inventa in con-
cha Veen-Mossel dicta. 19

— -- membranæ jacent inclusa. 20

— -- ligulis sunt conjuncta. ibid:

— hancum adeo sunt firma, ut in
stomacho conteri nequeant. 52

— pediculorum ex pediculis exse-
cta, sed fœtus ex iis non pro-
diere. 59

— -- non facile numerari queunt.
ibid:

— -- plerumque noctu ponuntur.
64

— -- octiduo egent, antequam novi
ex iis prodeant pediculi. 69

OVARIUM in pisciculis testaceis
inter conchas captis; & pisciculi
innati in eo. 16

— in concha Veen-Mossel dicta. 19

— locum suum habet inter partes
carneas ejus conchæ. 24

— in pediculis fœmininis. 59

OVI pediculi cortex delineatus. 75

— constat ex membrana. 76

OVINUM LAC non tam dure
coagulatur, quam lac vaccinum,
& ejus rei ratio. 175

P.

PARTICULÆ SQUAMOSÆ
in pediculorum ovis inserviunt
exiguorum pediculorum incre-
mento. 75

PEDICULI in Rosis reperti. 9

— in eorum cadaveribus inventi
vermiculi, qui in aliud plane
genus muscarum mutantur.
10, 11

— (ita dicti) Ribetum, Cerasorum
&c. corpora sua habent fœtibus
imprægnata, nec ulli inter eos
reperi mares. 129

PEDICULI (proprie dicti) fœmi-
nini ovario sunt instructi. 59

— non sunt Hermaphroditæ. ibid:

— eorum ova non facile numerari
queunt. ibid:

— masculini aculeo sunt armati. 60

— -- hic delineatus. 73

— -- eo fœmellæ sunt destitutæ. 60

— eorum testiculi primo pro ovis
habiti. 59, 60

— -- hi delineati. 72

— membra masculina. 60

— -- delineata. 70, 71

— masculini duriuscule tractati
aculeum extra corpus pro-
ferunt. 60

— frigoris sunt impatientes. 61

I N D E X.

- lucem fugiunt. ibid:
- quomodo cibentur. 62
- quot, & quanto tempore, pepererint ova. 62 &c.
- sanguinem fugentes parum excitant doloris. 63
- -- ejus rei ratio. 74, 75
- pleraque ova sua noctu pariunt. 64
- tibiali inclusi, ut ova parerent, & novi ex iis prodirent pediculi. 65
- quo plus capiunt cibi, eo plura pariunt ova. 64
- cur exiguo temporis spatio magno numero procreantur. 68, 69
- unus sexiduo quinquaginta peperit ova. 66
- duo habent testiculorum paria. 72
- locum suum mutantes indusium adscendunt, non ipsam cutem, & ejus rei ratio. 77
- eorum generatio exhibita. 77
- binæ fæmellæ intra octo hebdomadas 10000 pediculorum ex se natorum videre possunt. ibid
- incredibilis sunt perfectionis. 78
- PERCA** quinquennium nondum nata, & 12 pollices latos longa. 192
- PERCÆ, LUCII &c.** recens ex ovis prodeuntes, cur oculis valde magnis sint instructi. 55
- PERFECTIONES** unicuique innatæ animalculo, non ab ipso dependent, sed ab primo ejus generis individuo. 13
- PERTINACITER** etiamnum tuentibus, piscium testaceo-
- rum spontaneam originem, facilius os posset obturari, si quis, litus maris inhabitans, attente eorum scrutaretur procreationem. 28
- PIGMENTUM** vulgare rubrum inservire potest arcendis ab tabulatis infectis aromatibus perniciosus. 107
- PILI**, quibus muscarum pedum extremitates sunt armatæ, variis instructi sunt uncis. 139
- PISCES** testacei, non ex cœno, sed per generationem proveniunt. 147
- fluviales intestina sua multo adipem habent obsita, ac e contrario pisces marini. 46
- -- ejus rei ratio. 53
- iis vesci sanitati non nocet. 169
- -- imo minus quam usus carni-um. ibid.
- in aquis satis profundis & fluentibus degentes, nunquam præ morbis, aut ætate moriuntur. 187
- PISCICULI** testacei inter conchas capti, investigata eorum generatio. 16
- ovarium in iis repertum. ibid:
- -- in eo pisciculi testacei innati. ibid:
- -- eorum motus. ibid:
- magna in eorum barbis agitatio. ibid:
- triduo extra aquam vivebant. 18
- exigui, inserviunt alimento, ac incremento, recens natorum asellorum majorum, minorum &c. 54

percæ,

I N D E X.

- percæ, lucii, &c. cur semper adverso flumine ferantur. 55
—plures in mari latent, quam unquam quis cogitabit. 49

PLANTA RECENS inventa in semine fici. 134

- -- delineata. 135 - 137
— in semine fragi. 138
— -- delineata. 138, 139

PLUMBEAE PARTICULAE in Metallo Tartarico liquefacto coagulatae. 112

POLYPUS INDICUS, cur ejus ictus adeo sint perniciosi. 192

PULVIS NITRATUS, investigatum quantum spatii granum pulveris nitrati incensum requirat. 3, 4

PUPULAE vermiculi, flores myristicos rodentis, delineatae. 87

- ortæ ex vermiculis albis, qui in lignis quernis repperiuntur, scite admodum sunt formatae. 162

R.

RANAE quæ per vomitum ejectæ dicuntur, non revera sunt ranæ, sed coagulum earum nactum figuram, & id quo pacto fieri queat. 174

RESINA, sive Cera Hispanica, ab formicis non conficitur, sed ab vehementi succorum ex furculis protrusione. 118

RUBIGO ex aere non delabitur. 149

S.

SALIS PARTICULAE repertæ

in Metallo Tartarico. 112

— -- valde sunt irregulares. 113

— -- ulterius descriptæ. ibid:

— etiam repertæ in Metallo in Insula Sumatra effosso, ut & in Metallo argenteo ex America advecto. 114

SCORPIORUM ICTUS, cur adeo sit perniciosus. 192

SEMEN masculinum, ex auctoris opinione, detectum in ostreis. 9

— ostreorum masculinum. 144

SEMINA in ficibus, duabus instructa sunt ligulis, quarum operens planta alitur. 135

— in fragis habent ligulam, plantæ alimento adferendo inservientem. 138

SPHÆRA pilosa in vituli stomacho reperta. 183

SQUAMAE piscium non quotannis novo circumdantur circulo, sed nova sit squama, priori conjuncta. 191

— earum incrementum exiguo temporis spatio cessat. ibid:

SQUILLAE in sturionis stomacho repertæ. 53

STURIONES non solo ex aere & aqua vivunt, ut vulgo ferunt. 53

T.

TELLUS quotidie in orbem fertur. 121

— motus ille in exemplo exhibitus 122 - 125

TESTICULI pediculorum masculinorum pro ovis haberi possunt. 59, 60
bini

I N D E X.

- bini sibi mutuo adjacent ibid: & p. 72
- materia in iis reperta. 60
- delineati. 72
- TUBUS** vitreus aere crassiori vacuus, & accurate obturatus, magnum, ubi infringitur, edit fragorem. 5

V.

- V**ASA feminalia in pediculorum testiculis exhibita. 72
- nuci myristicæ alimentum adferentia delineata. 102-105
- VASCULA** in alis exiguæ muscæ, ex pediculis in Rosis inventis ortæ; mira eorum tenuitas. 10
- VERMICULI** intra cadavera pediculorum in Rosis degentium. 10
- in halecibus reperti. 47
- ——— larius descripti. 47-48
- alterius generis itidem in halecibus inventi, & descripti. 50
- ——— quomodo in ventris penetrare queant cavitatem, adeo ut Chylus in ventrem non infundatur. 50, 51
- in floribus myristicis inventi delineati. 89, 90

- nucibus miristicis noxii, floribus myristicis non nocent. 91
- ——— ejus rei ratio. ibid:
- VERMES** flores myristicos intra foliorum membranas exedunt, & sic eos albos reddunt. 87
- eorum tela intra flores myristicos reperta. 85, 86
- ——— in animalcula mutantur volatilia. ibid:
- ——— pupula delineata. 87
- lignis quernis subito excrecentibus non adeo noxii sunt, quam lignis in virgultis ortis 165
- albi in ligno querno inventi. 160
- ——— eorum descriptio. ibid:
- ——— mutantur in animalcula volatilia. 163, 164
- VITRI** particulæ ex Metallo Tartarico liquefacto conjunguntur vitro, in quo liquefactio instituebatur. 112

Z.

- Z**OUTER (ventriculus vitulorum minor sic dictus) observatus. 182

F I N I S.



